

## DIZRA' CHAWE' CA NACA CHEĒ JĒSUCRISTO SDA BZUAJ SAN LUCAS

*Dizra' dxuchalaj San Lucas, dxē̄ē Teófilo*

<sup>1</sup> Benne' zan ba belunē' ca da gulezéquene' bu-luzúaje' cáteze naca da guca ládujla dxi'u, <sup>2</sup> cáteze na' gulé benne' ca', benne' belelé'ene' nédxudaute ca naca da guca na, na' buluchálaje' dizra' chawe' na'. <sup>3</sup> Cá'anqueze neda' ba bchi'a xánnia' xúgute da ca' gulaca na nédxudaute, na' dxéqueda' chawe' guzúaja' da nigá chiu' cáteze guca, bi nazrí'ite lazra', lue', Teófilo. <sup>4</sup> Dxuna' caní cheē nézenu' naca na da li ca da ba bululé'ene' lue'.

*Gubáz cheē xabáa dxuzenne' ca galaj Juan, benne' guchúe' bēneache nisa*

<sup>5</sup> Gate na' naca Herodes wenná bea cheē xēze ca' zaj nababa Judea, na' zua tu bxruze le' Zacarías, benne' nababe' cue' bxruze ca' gunná be'e Abías ca ni'te. Zru'ula Zacarías na' le' Elisabet, na' nácaqueze Zacarías na' zre sua benne' ca' gulebábale bxruze Aarón. <sup>6</sup> Zacarías ne zru'ule' Elisabet gulaque' xrlátaje lau Dios, ne dxelunē' ca zaj naca da bdx-ixruj bea Xránadxu, ne ca da naxúaj na lu da gunné'. Ca'an guca, quebe nu guzeque gagu zria le' lau Dios. <sup>7</sup> Quebe nu zrí'ine' chilá', lawe' da naca Elisabet na' nu'ula wizre, na' dxúpatē' zaj bezúalē'e gula.

<sup>8</sup> Tu zra, gate belexala bxruze ca' naga nababa Zacarías xelunē' zrin lu xel-la bxruze cheē' lau

Dios, <sup>9</sup> cáteze naca da dxelún bxruze ca', na' bexala Zacarías chu'e lu lataj lá'azxa chee Xránadxu lu xudau' chee guzezxe' xala. <sup>10</sup> Dxácatę na' dzezxe xala na', ca naca benne' ca' zaj zra' chalé'ajla dxuluchálajłęne' Dios. <sup>11</sup> Nadxa ble'e lau tu gubáz chee xabáa chee Xránadxu, ze' chalá'a xabęla chee cugu naga zría xala dzezxe na. <sup>12</sup> Ca ble'e Zacarías gubáz chee xabáa na', guzúe' stebe, ne bzrébele'e.

<sup>13</sup> Gubáz chee xabáa na' guzre' le':

—Zacarías, quebe zrebu', lawe' da ba ben Dios dizra' da dxuchálajłenu' Le', na' nu'ula chiu', Elisabet, walaj tu zri'ine', bi na' guzú' labe' Juan. <sup>14</sup> Wabéle'ęnu', ne gaca chiu' tu da ba neza zrente, na' benne' zan xelebenę' lawe' da ba gulaj bidu na'. <sup>15</sup> Ca'an gaca lawe' da gaca zri'inu' szrente lau Dios. Quebe xí'ajbe' xrise uva wal-la, u da dxususze na bėnneache, na' gate gálajtebe' tu súalezqueze Be' Lá'azxa nen lebe'. <sup>16</sup> Ne chee lebe' benne' zan xelexaque' bi chee Xránadxu Dios. <sup>17</sup> Juan nigá quia laube' lau Xránadxu, na' Be' na', ne xel-la waca da gulezúale na Elías, bėnnea' bchálaję' waláz chee Dios gate nate, xelezúale na lebe', chee guzúabe' tuze benne' ca' zaj naque' xra xrna nen zri'ine', ne chee gulé'ebe' benne' dxeledábague' Dios chee xelune' ca dxenná xrtizra' Dios. Ca'an gaca, gucá'ana cháwebe' bėnneache chee xelezí' lu ne'e Xránadxu.

<sup>18</sup> Zacarías na' bchebe' gubáz chee xabáa:

—¿Ajazra gaca nezda' gaca caní? Neda' ba nagúlale'a, ne cá'anqueze naca nu'ula chia'.

<sup>19</sup> Na' bechebe gubáz chee xabáa na':

—Neda' naca' Gabriel, ne naca' wən zrin chee Dios. Le' gusel-le' neda' chee guchálajlena' lue', ne guzenda' lue' dizra' chawe' nigá. <sup>20</sup> Na'a, lawe' da quebe guxéajle'u da gucha' lue', xegá'anu' quebe gaca nníu' cadxa galaj zri'inu'. Caní gaca na ca zrinte zra chee na.

<sup>21</sup> Dxácatę na' zaj zra' benne' ca' chulé'ajla, dxelebeze' Zacarías, ne dxelexebánene' lawe' da dxezréle'ene', quebe dxedxúaje' lu lataj lá'azxa. <sup>22</sup> Gate bedxúaj Zacarías, québedxa dxaca nnie'. Nadxa guleque bé'ene' ba ble'e Zacarías tu da ble'e Dios le' lu lataj lá'azxa na'. Na' le' bta ná'ase', lawe' da quebe dxaca nnie'.

<sup>23</sup> Ca xeajsé chee zra ca' dxal-la' gun Zacarías zrin chee xudau', na' bezé'e zexíaje' lizre'. <sup>24</sup> Ca gudé na' zru'ule' Elisabet ba zue' zi'i, na' quebe bdxúaje' lataj bchina' chie' ca gazxu' beu', na' dxenné' lu lázrdawe': <sup>25</sup> “Xrana' Dios ba bene' chia' da nigá chee québedxa xuluzúa bėnneache neda' chalá'ala.”

### *Gubáz chee xabáa dxuzenne' ca galaj Jesús*

<sup>26</sup> Ca gudé xrupa beu' gate na' bchálajle gubáz chee xabáa na' Zacarías, na' Dios gusel-le' le' tu xezre nababa Galilea nazí le na Nazaret, <sup>27</sup> chee cheajchálajlene' tu nu'ula cuíde'dau' lebe' María. Lebe' ba zua guchaga na'be' benne' biu na' le' José, benne' naque' zri'ine zre sua wenná bea David.

<sup>28</sup> Gubáz chee xabáa na' guxú'e naga zua María na', na' guzre'-be':

—Padiuzre. Dios dxune' lue' tu culuén. Xránadxu zúalene' lue'. Dios ba bene' tu da cháwedxa chiu' quézcala chee xúgutę nu'ula ca'.

29 Gate María na' ble'ebe' gubáz chee xabáa na', bebánebe' ca naca dizra' na', na' gunabe' lu lázrdaube': ¿Bizr chee na' dxugape' neda' diuzre caní?

30 Nadxa gunná gubáz chee xabáa na':

—María, quebe zrebu' lawe' da ba bzrué'enu' tu culuén da dxun Dios chiu' lue'. 31 Na'a, zua da gunna Dios chiu', na' galaj tu bidu biu chiu', na' guzú' labe' Jesús. 32 Lebe' gácabe' szren, na' xelennáqueze' naque' Zri'ine Dios szrente, na' Xránadxu Dios guné' Le' wenná bea ca guca xra xrtawe' David, 33 chee nna bé'etecaze' xezr la xu Israel, na' xel-la dxenná bea chee' quebe chea-jséqueze chee na.

34 Nadxa María bchébebe' gubáz chee xabáa:

—¿Ájazra gaca da nigá, lawe' da quebe nu benne' biu zúalena'?

35 Gubáz chee xabáa na' gunné':

—Be' Lá'azxa chee Dios sue' xichaj lázrda' u, na' xel-la waca chee Dios szrente sua na nen lue'. Chee le na' bidu na' gálajbe' gácaquezebe' chee Dios, na' sí'queze labe' Zri'ine Dios. 36 Cá'anqueze bila ljwezru' Elisabet wálajqueze bidu chee' lácala ba naque' benne' gula. Ca'an naca, nu'ula na' gu-lenné' naque' wizre, ba zeaj xrupa beu' bnezruj Dios chee'. 37 Quebe bi de da quebe gaca gun Dios.

38 Nadxa gunná María:

—Neda' nácaqueza' wen zrin chee Xránadxu. Gun Dios chia' ca da ba gunnú'.

Na' gubáz chee xabáa na' bezé'e naga zua María na'.

*María zeajxúebe' Elisabet*

39 Ca lu zra na' María guzá'abe' zéajbe' tu xézredau' da zua na laduj xi'a ca' chee ga nababa Judea. 40 Na' guxú'ube' lizre Zacarías, ne bgápabe' diuzre Elisabet. 41 Gate ben Elisabet dizra' da gunné María, na' bidu na' xú'ube' le'e Elisabet guxrítebe', na' guzúale Be' Lá'azxa le'.

42 Nadxa gunné' tu chi'e zizraj:

—Dios ba bene' tu da cháwedxa chiu' quézcala chee xúgute nu'ula ca', lawe' da ba zua da benna Dios chiu'. 43 ¿Núzraqueze naca' neda', za xrna Xrana' ga zua' neda'? 44 Cáteze benda' dizra' da gunnéu', na' guxrite bidu chia' lu le'a lu xel-la dxebé cheebe'. 45 Ba neza naca na chiu' guxéajle'u lawe' da gaca li ca da gunná Xránadxu.

46 Nadxa gunná María:

Bénne'du xu'a dxue lá'ana na Xrana'.

47 Lázdawa' dxebé na ca dxun Dios, weselá chia'.

48 Lawe' da gudxé' Dios gunne xue chia', nácaqueza' wən zrin chee'.

Na'a su lau na, xúgute benne' xelenné' nazi'a tu culuen zren chee Dios.

49 Dios Szrente ba bene' tu da zrente chia' neda'.

Chee le na' lá'azxa naca La Le'.

50 Le' xexache lázrqueze' xúgute benne' ca' dx-elezrebe' Le'.

51 Da zrente ba ben Le'.

Bzue' zrila benne' ca' dxulucá'ana szren cuine'.

52 Bebéajle' benne' blau ca' lu lataj chee', ne bechise' benne' dxexruj lazre' ca'.

53 Bnézrujle'e da gulagu benne' dxeledún, na' benne' gunní'a ca' bca'ane' le' cá'aze.

54 Gúcalene' benne' Israel, benne' wən zrin chee' cá'

lawe' da bezrí lászrqueze' le',  
<sup>55</sup> ca da guchebe lazre' chee xra xrtáudxu ca',  
 chee Abraham, ne chee benne' xrtie' ca' chadía  
 chacanna.

<sup>56</sup> María begá'analebe' Elisabet ca chunna beu',  
 na' ca gudé na' bezrinbe' lízrebe'.

*Ca gulaj Juan, benne' bchue' bénneache nisa*

<sup>57</sup> Ca gudé na' guxá' beu' chee Elisabet na'  
 chee galaj bidu chee', na' guzane' tu bi biu  
 chee'. <sup>58</sup> Benne' walír chee' ca', ne xrtia ljwezre'  
 belezrine' dxelebene' nen le', gate belenne' Dios  
 bezrí lászrele'e le'. <sup>59</sup> Gate guca xrunu' zra,  
 belezrine' chee xelechúgue' lu xpélabé' da gulé'e  
 na naca be' bi chee Dios, na' gulaca lazre' xuluzúe'  
 labe' Zacarías ca le' xrabe'.

<sup>60</sup> Na' gunná xrnabe':

—Quebe gaca. Dخال-la' si' labe' Juan.

<sup>61</sup> Na' gulé'e le':

—¿Bizr chee na'? Quebe nu chilá' xrtia ljwézrele  
 le' ca'.

<sup>62</sup> Na' buluchebe' xra bidu na', bulutá ne'e chee  
 xelenézene' ájazra guzúe' labe'. <sup>63</sup> Na' xrabe' na'  
 gunabe' tu blágadau', na' bzuaje' le'e na: Juan si'  
 labe'. Na' xúgute' benne' ca' belexebánene'. <sup>64</sup> Ca'  
 guca Zacarías benné', na' guzú lawe' dxue lá'ane'  
 Dios. <sup>65</sup> Ca belelé'ene' da nigá, xúgute' benne' walír  
 chee' belexebánene', na' ca naca xezre zaj nrita  
 laduj xi'a ca ga nababa Judea, buluchálaje' ca da  
 guca. <sup>66</sup> Xúgute' benne' belenne' na, gulezú lawe'  
 dxelenné' lu lászrdawe', ne buluchebe ljwezre' tue'  
 xetúe':

—¿Ájazraqueze gun bi nigá?

Naca bea na Xránadxu zúalene'-be'.

*Ca da bil-la Zacarías*

<sup>67</sup> Na' Be' Lá'azxa guzúalene' Zacarías, xra bidu nigá, na' bchálaje' waláz chee' Dios, gunné':

<sup>68</sup> ¡Gaca ba Xránadxu, Dios chee' xezre Israel!

Ba ble'e naga zúadxu, bènneache chee', na' bselé' dxi'u.

<sup>69</sup> Ba gusel-le' tu benne' wál-lale'e, weselá cheedxu. Bénnea' gulaj ládujla xrtia David, benne' wen zrin chee'.

<sup>70</sup> Ca'an guchebe lazre' Dios lu dxu'a benne' ca' buluchálaje' waláz chee' nédxudaute.

<sup>71</sup> Guchebe lazre' guselé' dxi'u lu na' benne' dx-eleze'e dxi'u, ne lu na' benne' dx-elecuídené' dxi'u.

<sup>72</sup> Xezrí lazre' xra xrtáudxu ca', ne quebe gal-la lazre' xel-la wezría lá'azxa chee'.

<sup>73</sup> Da nigá naca na da guchebe lazre' Dios da bzua chache' nen xra xrtáudxu Abraham, da naca tu da gunné' cheedxu dxi'u.

<sup>74</sup> Guchebe lazre' guselé' dxi'u lu na' benne' dx-eleze'e dxi'u

chee' gaca gundxu zrin chee', ne quebe zrébedxu,

<sup>75</sup> ne gácadxu xrlátaje lau Le', ne gácadxu bi cheé'queze' xúgute zra naca bandxu.

<sup>76</sup> Lue', zrí'ina'dau', sí'queze lau' bi guchálajqueze waláz chee' Dios szrente,

lawe' da quia lau' lau Xránadxu, salju' neza chee' Xránadxu,

<sup>77</sup> Guzénenu' bènneache chee', Le' gunité' lawe' dul-la chee',

ne guselé' benne' ca'.

<sup>78</sup> Ca'an gaca lawe' da dxexezrí lazre' Dios dxi'u.

Dxune' na'a dxalaj tu xi' chee xabáa da dxusení' cheedxu,

<sup>79</sup> na' gusení na naga zaj zra' benne' zaj zre'e lu na' xel-la gute,

chee cu'u na dxi'u lu neza xrtante lau Dios.

<sup>80</sup> Bidu na' bgúlabe', ne bgula bénne'du xu'ube' chawe' lu da naca chee Dios. Guzúaquezbe' le'e xixre' lawe' lataj cadxa bzrin zra ble'e laube' xezre Israel.

## 2

### *Ca guca gate gulaj Jesús (Mt. 1.18-25)*

<sup>1</sup> Ca lu zra na' gate dxenná bea Augusto, benne' xezre Roma, benne' dxenná be'e xúgute cue' xezr la xu, le' gunná bé'ene' xelú'u lu xiche xúgute benne' zaj zre'e xezr la xu. <sup>2</sup> Da nigá naca da nédxudau' gulú'u bénneache lu xiche. Guca caní gate naca Cirenio benne' zaj xu'u lu ne'e xezre ca' zaj nababa Siria. <sup>3</sup> Xúgute bénneache dxun na ba xen chjaque' lu xezre naga zaj nababe' chee xelu'e lu xiche. <sup>4</sup> Chee le' na' José guzé'e lu xezre Nazaret, da nababa Galilea, chee bzrine' lu xezre Belén, da nababa Judea, naga gulaj wenná bea David. Bzrin José na' lawe' da naque' xrtia David na'. <sup>5</sup> José guxíaje' Belén chee chu'e lu xiche tu zren nen María. María nigá ba nachébebe' guchaga ná'alébe' José, na' ba bnezruj Dios chee'be'. <sup>6</sup> Dxácaté na' zaj zre'e lu xezre Belén, na' bzrin zra san María bidu chee'. <sup>7</sup> Lu xezre na' gulaj bidu nedxu chee', na' bchelé'-be' ládxe'du ca', na' gúxrue'-be' xu'u naga dxelún chi'e da dxelagu



bea ca', lawe' da quebe ga bzrela tu lataj lu xu'u naga che'e.

*Dxuluchálajle gubáz chee xabáa benne' ca' dxuluxúe' zrila' ca'*

<sup>8</sup> Gagu cuita xezre Belén zaj zra' benne' ca' dxuluxúe' zrila' ca', dxelexegá'ane' le'e xixre' chizrela, dxuluxúe' zrila' chee' ca'. <sup>9</sup> Naga zaj zre'e ble'e lau tu gubáz chee xabáa chee Xránadxu. Na' xel-la naxaní' chee Xránadxu Dios bsaní na naga zaj zre'e. Ca'an guca, belezrébele'e. <sup>10</sup> Na' gubáz chee xabáa na' guzre' le':

—Quebe zrébele, lawe' da dxuzenla' le'e tu dizra' chawe'. Ne chee dizra' nigá xelebéle'e xúgute bénneache. <sup>11</sup> Na'a, lu xezre chee David, ba gulaj tu bidau' gácabe' weselá cheele. Bi nigá naque' Cristo, Xránadxu. <sup>12</sup> Da nigá gaca na tu da gunna bea na cheele. Cheajxrácale bidu dxe'ene nigá, dxélabe' ládxe'du ca', ne debe' tu xu'u naga dxelún chi'e da xelagu bea ca'.

<sup>13</sup> Chadí lau, cuita gubáz chee xabáa na' bululé'e lau zandxa gubáz chee xabáa, dxelúe lá'ane' Dios, dxelenné':

<sup>14</sup> ¡Gaca ba Dios na'ala,  
na' lu xezr la xu nigá sua xel-la dxebeza zri lazre'  
chee bénneache,  
benne' dxelune' ca da dxaca lazre' Dios!

<sup>15</sup> Gate besi'aca gubáz chee xabáa ca', zeajxaque' xabáa, nadxa benne' ca' dxuluxúe' zrila' gulezú lawe' dxelé' ljwezre' tue' xetúe':

—Chéajxquedxu lu xezre Belén cheajnnadxu da ba guca, ca da ba gunná Xránadxu Dios, guzre' dxi'u.

16 Ca'an guca, besí'aca zézxuje', na' xeajlexraque' María ne José, ne bidu dxe'ene na', debe' xu'u naga dxelún chi'e da xelagu bea ca'. 17 Gate belelé'ene' bidu na', na' buluchálajlene' benne' ca' ca da gunná gubáz chee xabáa ca da naca chee bidu na'. 18 Na' xúgute' benne' ca' belenne' da nigá belexebánele'ene' ca da gulenná benne' caní. 19 María bcache' da nigá lu xichaj lázrdawe', na' blaba lazre' ca naca da nigá. 20 Ca'an guca besí'aca benne' ca' dxuluxúe zrila', dxulucá'ana szrene' Dios, ne dxelúe lá'ane' Le' ca naca xúgute' da belenne', ne da belelé'ene', lawe' da guca xúgute' ca da guzre gubáz chee xabáa na' le'.

*Ca guca gate belú'e bidu Jesús lu xudau'*

21 Ca guca xrunu' zra, na' gulechugue' tu lu xpela bidu na' ca da nadxixruj bea na chee Dios, na' belú'e La bidu na' Jesús, cáteze naca da gunná gubáz chee xabáa na', guzre' María nédxudxa ca za gu'e bidu na'.

22 Ca bzin zra chee xelune' ca bdxixruj bea Moisés chee xelexexaque' chawe' lau Dios, na' belú'e bidu na' lu xezre Jerusalén chee xuluzúe'-be' lu na' Xránadxu Dios. 23 Belune' caní lawe' da ba naxúaj lu da nadxixruj bea Xránadxu Dios da dxenná na caní: Xúgute' bi biu, bi nedxu gálajbe' dxal-la' guzúale-be' chee Xránadxu Dios. 24 Na' xjaque' xeajlegu'e dxen chee be xíxre'du ca' lau Dios ca da dxenná da nadxixruj bea na chee Xránadxu Dios, da dxenná na: Chupa bgugu, che chupa bxínnedau'.

25 Ca lu zra na' zua tu benne' biu gula lu xezre Jerusalén, le' Simeón. Naque' tu benne' chawe',

na' dxue lá'anaqueze' Dios, ne dxebeze' benne' sel-la Dios chee guselé' bèneache Israel. Zúale Be' Lá'azxa chee Dios Simeón na'. <sup>26</sup> Be' Lá'azxa ba guzre' Simeón na' quebe gatie' cadxa lé'ene' Cristo, benne' na' sel-la Xránadxu Dios. <sup>27</sup> Simeón nigá guxíaje' lu xudau' lawe' da bsi' Be' Lá'azxa chee Dios le'. Na' gate xra xrna bidu Jesús zaj nu'e-be' lu xudau' chee xelune' cheebe' ca da bdxixruj be'e Moisés, <sup>28</sup> na' Simeón na' guqué'e bidu na'. Bnide'-be', ne be' lá'ane' Dios, gunné':

<sup>29</sup> Xrana', na'a waca gunnu' lataj gatia' lu xel-la dxebeza zri lazre' lawe' da ba benu' ca da guchebe lazru' chia', naca' wen zrin chiu'.

<sup>30</sup> Nen xiaj láuqueza' ba ble'eda' Benne' Weselá,

<sup>31</sup> Bénnea' ba bzu' chee gácalene' xúgute bèneache.

<sup>32</sup> Le' naque' tu xi' da gusení na chee benne' quebe zaj nababe' Israel.

Ne chee Le' gaca tu da ba neza chee bèneache chiu', benne' Israel.

<sup>33</sup> José ne xrna Jesús belexebánele'ene' ca da gunná Simeón chee bidu Jesús. <sup>34</sup> Nadxa Simeón gunabe' lau Dios gune' chee' da chawe', na' guzre' María, xrna Jesús:

—¡Gunná'xque nigá! Bidu nigá, Dios nuzúe' lebe' chee gunbe' chee benne' Israel ca', cheajlecházie' benne' zante lu na' da xriwe', na' benne' zante xelexexase' lau Dios. Lebe' gácabe' tu da dxunna bea chee Dios, na' benne' zante xuluzúe' lebe' chalá'ala. <sup>35</sup> Ne chee lebe' gulé'e lau ca da dxeajlesá lazre' tu tue'. Na' chiu' lue' da nigá gaca na ca tu xia nalá, da cheajsúa lu lázrda'u.

<sup>36</sup> Cá'anqueze zua na' tu nu'ula dxenné' waláz cheē Dios, le' Ana. Nu'ula nigá naque' zri'ine Fanuel, ne xrtia Aser. Ba naque' nu'ula gúlale'e. Bchaga ne'e gate na' naque' nu'ula cuíde'te, na' guzúalene' benne' chee' gazre iza. <sup>37</sup> Na' begá'ane' tuze', ne ba xu'e tapa lalaj tapa iza. Quebe becuase' xudau', na' dxune' zrin cheē Xránadxu Dios te zra chizrela. Dxune' gubasa, ne dxuchálajlene' Dios. <sup>38</sup> Ana na' bzríneze' na', na' ca gudé guzre' Dios: "Xcalenu'", na' guzú lawe' dxuchálaje' cheē bidu Jesús nen xúgute benne' ca' dxelebeze' benne' na' sel-la Dios cheē guselé' benne' Jerusalén ca'.

### *Ca guca gate belexezrine' xezre Nazaret*

<sup>39</sup> Ca belune' xúgute ca da dxenná da nadxixruj bea Xránadxu, nadxa besiá'que' xjaque' naga nababa Galilea, na' belexezrine' xezre Nazaret da naca lazrie'. <sup>40</sup> Na' bidu Jesús bgúlabe', ne gúcadxabe' chuchu, ne gúcadxabe' bi naxéajni'i, na' Dios bca'ane' lebe' chawe'.

### *Ca guca gate bzrin bidu Jesús lu xudau'*

<sup>41</sup> Xra xrna' Jesús, tu tu iza dxjá'aque' xezre Jerusalén gate dxu'u laní cheē xulusá lazre' benne' judío ca da ben Dios, bebéaje' xra xrtawe' ca' lu xezr la xu Egipto. <sup>42</sup> Ca guque Jesús chazrinnu iza, na' xjá'aque' xúgute' Jerusalén, ca dxelúnqueze' ca dxaca laní. <sup>43</sup> Ca gudé laní, na' besiá'que', na' bidu Jesús begá'anabe' Jerusalén, ne quebe guleque be'e xrnabe', ne José. <sup>44</sup> Dxeléquene' Jesús zezabe' ládujla benne' zan ca', na' besiá'que' tu zra nez. Gate belexilje'-be' ládujla benne' xrtie' ca', ne benne' ca' zaj núnbe'e, <sup>45</sup> quebe belexezrelne'-be'.

Ca'an guca belexebi'e zeajxá'aque' Jerusalén chee cheajlexedíjle'-be' na'.

<sup>46</sup> Ca gudé guca chunna zra, nadxa belex-ezrélné'-be' lu xudau', dxe'ebe' ládujla benne' ca' dxuluxuzájle'e da nadxixruj bea Dios, na' dxenbe' ca dxelenné', ne dxuchébebe' benne' ca'. <sup>47</sup> Xúgute benne' ca' dxelenne' dxelxebánene' cheebe' ca naca xel-la sina cheebe', ne ca naca da dx-uchálajlebe' le'. <sup>48</sup> Gate belelé'e xra xrnabe' lebe', na' belexebánene'. Na' gunná xrnabe', dxe'e-be':

—Zri'ina', ¿bizr chee na' benu' caní nen netu'? Cadite stebe ba guzúantu' chiu' dxexílajntu' lue', xrau' ne neda'.

<sup>49</sup> Nadxa Jesús dxe'ebe' le':

—¿Bizr chee na' dxexílajle neda'? ¿Quebe nézele le'e dxal-la' guna' neda' da naca chee Xra'?

<sup>50</sup> Xra xrnabe' quebe guléajni'ine' ca da gúzrebe' le'.

<sup>51</sup> Nadxa bezálebe' le' zeajxá'aque' Nazaret, na' gúcaquezebe' bi wezúa dízra' chee xra xrnabe'. Na' xrnabe' bcache chawe' xúgute da nigá lu lázrdawe'.

<sup>52</sup> Jesús zéajbe' dxegúlabe' lu bel-la' dxen cheebe', ne lu xichaj lázrdaube', na' dxedxúajquezebe' chawe' lau Dios, ne lau bèneache.

### 3

*Juan, benne' dxuchúe' bèneache nisa, dxuchálaje' xrtizra' Dios le'e xixre'*

*(Mt. 3.1-12; Mr. 1.1-8; Jn. 1.19-28)*

<sup>1</sup> Iza chinu' ca dxenná bea Tiberio, benne' dxenná be'e ca naca xezr la xu, na' Poncio Pilato dxenná be'e naga nababa Judea, na' Herodes dxenná be'e naga nababa Galilea, na' Felipe,

benne' biche Herodes, dxenná be'e naga nababa Iturea, ne Traconite, na' Lisaniás dxenná be'e naga nababa Abilinia. <sup>2</sup> Na' Anás, ne Caifás zaj naque' bxruze blau. Ca lu zra na' Dios bchálajlene' Juan, zri'ine Zacarías, naga zua Juan le'e xixre' lawe' lataj. <sup>3</sup> Juan na' gudée' ca naca xézredu ca' zaj nnitan' chalá'a weaj xegu Jordán, na' dxe'e benne' ca' dxal-la' xelexebí'i lázre', ne xeledxúe' nisa chee' gunite lau Dios chee' xtul-le'. <sup>4</sup> Caní guca ca na' gunná Isaías, benne' bchálaje' waláz chee' Dios, gunné':

Nen tu chi'i bénnea' dxenné' zizraj le'e xixre' lawe' lataj. Dxenné':

Le gucueza neza naga te Xránadxu.

Le xulí chawe' neza lase chee'.

<sup>5</sup> Ca naca zritudu ca' le xuzrá na.

Ca naca xi'a ca', ne xí'adu ca' xelexaca na tu li.

Neza xúca'du ca' xelexelí na.

Neza da quebe nalí xelexaca na tu li.

<sup>6</sup> Ca naca bénneache xeledé'enge' Benne' Weselá sel-la Dios.

<sup>7</sup> Gate benne' ca' belezrine' lau Juan chee' xeledxúe' nisa, na' le' dxe'e benne' ca':

—Xrtia bela snia. ¿Ble'e nu benne' le'e chee' cuásale ca naca xel-la dxezrá'a chee' Dios da ba za?

<sup>8</sup> Le gun da gulé'e na ba bebí'i lázrele, ne quebe nnale lu lázrdaule: Nácantu' xrtia ljwezre Abraham. Neda' dxapa' le'e, Dios wazéquene' xexune' xiaj caní xrtia Abraham. <sup>9</sup> Xa waga ba de cuásate na chee' chugue' xaga ca', na' xúgute' xaga da quebe dxelebía na da zixre chawe' welechugue na, na' xuluzré'e na lu xi'.

<sup>10</sup> Nadxa benne' ca' buluchebe' le':

—¿Bi dxal-la' guntu'?

11 Juan bechebe':

—Benne' de chupa zre' dxal-la' gunézruje' tu na benne' quebe de chee', na' benne' de da dxawe' dxal-la' gunézruje' da gagu bennea' quebe bi de chee'.

12 Cá'aqueze belelá' benne' wechizruj ca' chee xeledxúe' nisa, na' buluchebe' Juan:

—Benne' wesede, ¿bi da dxal-la' guntu' netu'?

13 Juan guzre' le':

—Quebe guchízrujle da zrendxa ca da nadxixruj bea na.

14 Cá'aqueze bal-la benne' dxjaque' wedil-la buluchebe' le':

—¿Gazra netu'? ¿Bi da dxal-la' guntu'?

Juan bechebe':

—Quebe guchébele benne', ne quebe gágule le' zria lu da wen lazre' chee' cuale dumí chee', na' le be nen cadite názrujle.

15 Benne' zaj zre'e na' zaj zue' stebe, na' dxuluchebe' lu lázrdawe' che Juan na' naque' Cristo, benne' nase-la Dios. 16 Juan na' gunné':

—Neda', da li dxuchúa' le'e nisa nen nisa. Wida tu benne' gune' da dxulé'e xel-la dxedxúa nisa nigá, guzúe' le'e Be' Lá'azxa, ne xi' chee'. Benne' nigá nápadxe' xel-la dxenná bea ca neda', na' quebe naca chia' cuéaja' xel-la chee' da xu'u ni'e.

17 Ba nuxre' da dxun be' chee', na' guchi'e naga dxine' zrua' xtila. Na' xutupe' zrua' xtila, guzrá' chawe' na lizre'. Guzezxe' xizre chee' na lu xi' da cabata' xul-la na.

18 Ca naca dizra' nigá, ne xezícadxa dizra' zan bchálajlene' benne' ca' ca naca dizra' chawe' chee' Dios. 19 Juan gudil-le' Herodes, benne' dxenná

be'e, lawe' da zúalene' Herodías, zru'ula Felipe, benne' biche Herodes na', ne lawe' da ba bene' da zante da calela. Nadxa Herodes <sup>20</sup> béndxaqueze' da calela, gulu'e Juan lizre xia.

*Da guca gate gudxúa Jesús nisa*

*(Mt. 3.13-17; Mr. 1.9-11)*

<sup>21</sup> Gate ne dxuchúa Juan na' bénneache nisa, cá'anqueze Jesús gudxúe' nisa, na' gate dxuchálajlene' Dios, na' bxfalaj xabáa, <sup>22</sup> na' betaj Be' Lá'azxa lawe' Jesús. Ble'e lawe' ca tu bgugu chiche, na' ben tu chi'e xabáa, dxenné':

—Lue' nacu' zri'ina' nazrí'ite lazra'. Dxezaca ba lázrelena' Lue'.

*Ca naca xra xrtau Jesucristo*

*(Mt. 1.1-17)*

<sup>23</sup> Jesús nape' ca chi dxua iza gate guzú lawe' dxune' zrin chee'. Dxeleque benne' naque' zri'ine José. Naca Jesús zre sua Elí, xra María.

<sup>24</sup> Elí na' guque' zri'ine Matat,  
Matat na' guque' zri'ine Leví,  
Leví na' guque' zri'ine Melqui,  
Melqui na' guque' zri'ine Jana,  
Jana na' guque' zri'ine xetú José.

<sup>25</sup> José nigá guque' zri'ine Matatías,  
Matatías na' guque' zri'ine Amós,  
Amós na' guque' zri'ine Nahum,  
Nahum na' guque' zri'ine Esli,  
Esli na' guque' zri'ine Nagai.

<sup>26</sup> Nagai na' guque' zri'ine Maat,  
Maat na' guque' zri'ine xetú Matatías,  
Matatías nigá guque' zri'ine Semei,  
Semei na' guque' zri'ine xetú José,



José nigá guque' zri'ine Judá.  
27 Judá na' guque' zri'ine Joana,  
Joana na' guque' zri'ine Resa,  
Resa na' guque' zri'ine Zorobabel,  
Zorobabel na' guque' zri'ine Salatiel,  
Salatiel na' guque' zri'ine Neri.  
28 Neri na' guque' zri'ine xetú Melqui,  
Melqui nigá guque' zri'ine Adi,  
Adi na' guque' zri'ine Cosam,  
Cosam na' guque' zri'ine Elmodam,  
Elmodam na' guque' zri'ine Er,  
29 Er na' guque' zri'ine Josué,  
Josué na' guque' zri'ine Eliezer,  
Eliezer na' guque' zri'ine Jorim,  
Jorim na' guque' zri'ine xetú Matat,  
30 Matat nigá guque' zri'ine xetú Leví,  
Leví nigá guque' zri'ine Simeón,  
Simeón na' guque' zri'ine xetú Judá,  
Judá nigá guque' zri'ine xetú José,  
José nigá guque' zri'ine Jonán,  
Jonán na' guque' zri'ine Eliaquim,  
31 Eliaquim na' guque' zri'ine Melea,  
Melea na' guque' zri'ine Mainán,  
Mainán na' guque' zri'ine Matata,  
Matata na' guque' zri'ine Natán.  
32 Natán na' guque' zri'ine David,  
David na' guque' zri'ine Isaí,  
Isaí na' guque' zri'ine Obed,  
Obed na' guque' zri'ine Booz,  
Booz na' guque' zri'ine Salmón,  
Salmón na' guque' zri'ine Naasón.  
33 Naasón na' guque' zri'ine Aminadab,

Aminadab na' guque' zri'ine Aram,  
Aram na' guque' zri'ine Esrom,  
Esrom na' guque' zri'ine Fares,  
Fares na' guque' zri'ine xetú Judá,  
<sup>34</sup> Judá nigá guque' zri'ine Jacob,  
Jacob na' guque' zri'ine Isaac,  
Isaac na' guque' zri'ine Abraham,  
Abraham na' guque' zri'ine Taré,  
Taré na' guque' zri'ine Nacor.

<sup>35</sup> Nacor na' guque' zri'ine Serug,  
Serug na' guque' zri'ine Ragau,  
Ragau na' guque' zri'ine Peleg,  
Peleg na' guque' zri'ine Heber,  
Heber na' guque' zri'ine Sala,  
<sup>36</sup> Sala na' guque' zri'ine Cainán,  
Cainán na' guque' zri'ine Arfaxad,  
Arfaxad na' guque' zri'ine Sem,  
Sem na' guque' zri'ine Noé,  
Noé na' guque' zri'ine Lamec,

<sup>37</sup> Lamec na' guque' zri'ine Matusalén,  
Matusalén na' guque' zri'ine Enoc,  
Enoc na' guque' zri'ine Jared,  
Jared na' guque' zri'ine Mahalaleel,  
Mahalaleel na' guque' zri'ine xetú Cainán.

<sup>38</sup> Cainán na' guque' zri'ine Enós,  
Enós na' guque' zri'ine Set,  
Set na' guque' zri'ine Adán,  
Adán na' guque' ca zrí'inequeze Dios.

## 4

*Satanás da xriwe' dxilaj lazre' na ájala gusebaga na Jesús dul-la*

*(Mt. 4.1-11; Mr. 1.12-13)*

<sup>1</sup> Jesús, zúale Be' Lá'azxa Le', bezé'e xegu Jordán, na' guché Be' Lá'azxa Le' le'e xixre' lawe' lataj.

<sup>2</sup> Na' guzúe' chua zra, na' Satanás da xriwe' gudilaj lazre' na ájala si xe na Le'. Quebe bi gudagu Jesús da chua zra ca', na' ca' gudé na' gudune'. <sup>3</sup> Nadxa gunná da xriwe', guzre na Le':

—Che da li nacu' Lue' Zri'ine Dios, ben xelexaca xiaj caní xeta xtila.

<sup>4</sup> Na' bechebe Jesús:

—Naxúajqueze na lu xiche chee Dios, dxenné': Quegá nen xeta xtílaze gaca ban bèneache, san cá'aqueze nen xrtizra' Dios gaca ban bèneache.

<sup>5</sup> Nadxa da xriwe' guché na Jesús tu xi'a sibe, na' chadite ble'e na Le' xúgute cue' xezr la xu da zaj nnita lu xezr la xu nigá, <sup>6</sup> na' guzre na Le':

—Neda' gunna' Lue' ca naca xel-la dxenná bea nigá, ne xel-la szren chee xúgute xezr la xu caní, lawe' da zaj xu'u da caní lu na'a neda', na' gunézruja' na nu dxaca lazra' gunézruja' na. <sup>7</sup> Gunna' na chiu' che lue' guzú zribu' lawa', ne gucá'ana szrenu' neda'.

<sup>8</sup> Jesús bechebe':

—Gucuasa lue', Satanás, lawe' da dxenná xiche chee Dios, dxé'e bèneache: “Bca'ana szren Xranu' Dios, ne ben zrin chee tuze Le'.”

<sup>9</sup> Nadxa da xriwe' na' guché na Jesús lu xezre Jerusalén, na' bcuén na Le' xichaj ze'e xudau', na' guzre na Le':

—Che da li na' nacu' Zri'ine Dios, guxrite' nigá cheajxezu' lu xu, <sup>10</sup> lawe' da lu xiche chee Dios dxenné':

Dios gusebague' gubáz chee xabáa chee' ca' xuluxe' Lue'.

<sup>11</sup> Xelechísaqueze' Lue' nen ne'e, chee quebe gaca we' ni'u lawe' xiaj ca'.

<sup>12</sup> Jesús bechebe':

—Cá'anqueze naxúaj na lu xiche chee Dios, dxé'e bènneache: “Quebe guchínenu' ca dxaca lazru' Xranu' Dios.”

<sup>13</sup> Gate da xriwe' québedxa bezrela lazre' na ájala gun zrêaje na Jesús, na' becuasa na tu chi'i.

*Jesús dxune' zrin chee' naga nababa Galilea  
(Mt. 4.12-17; Mr. 1.14-15)*

<sup>14</sup> Na' Jesús bezrine' Galilea, ba nápalé'e xel-la waca chee Be' Lá'azxa, na' ca naca xézredu ca' zaj nababa na' buluchálaj bènneache ca naca xel-la waca chee'. <sup>15</sup> Jesús bsédené' benne' ca' tu tu lu xudau' ca', na' xúgute' belúe lá'ane' Le'.

*Jesús dxexezrine' Nazaret  
(Mt. 13.53-58; Mr. 6.1-6)*

<sup>16</sup> Nadxa Jesús bezrine' Nazaret, xezre naga bgule'. Lu zra dxulupá'ana benne' judío ca' guxú'e lu xu'u ga na' dxelezraga benne' judío ca', ca xu'u lawe' dxune', chee gulabe' da naxúaj na lu xiche chee Dios. <sup>17</sup> Buludé'e Lu ne'e xiche naga naxúaj dizra' bzuaj Isaías, benne' bchálaje' waláz chee Dios, na' gate gusalaje' na, na' blabe' naga naxúaj da dxenná:

<sup>18</sup> Be' Lá'azxa chee Xránadxu zúalene' neda',

lawe' da guqué'e neda' chee guchálajlëna' benne'  
baxache' ca' dizra' chawe' chee'.

Gusel-le' neda' chee xexuna' benne' ca' quebe  
chawe' zaj zue',

ne chee guzenda' benne' ba zaj nadxéaje' lu da  
zrinnaj, waca xeelé',

ne chee xexuna' lau benne' la chul-la ca',

ne chee guselá' benne' dxelezaca zi'e,

<sup>19</sup> ne chee guzenda' bënneache ba bzrin zra  
Xránadxu Dios gucá'ane' le' chawe'.

<sup>20</sup> Nadxa Jesús butube' xiche na', na' bdee' na  
lu na' benne' dxuxúe' xu'u na', na' bebé'e. Xúgute  
benne' zaj zre'e lu xu'u na' dxelenné'e Le', <sup>21</sup> na'  
Jesús guzú lawe' dxé'e benne' ca':

—Na'a zra guca ca da naxúaj na laule le'e.

<sup>22</sup> Xúgute' gulenné' chawe' chee Jesús,  
ne belexebánene' ca naca dizra' chawe' da  
dxuchalaje'. Na' buluchebe ljwezre':

—¿Quegá benne' nigá zri'ine José?

<sup>23</sup> Jesús guzre' le':

—Da líqueze le'e wele neda' dizra' nigá: Lue',  
benne' dxexúnu' benne' we' ca', bexún cuinu', ne  
xele neda': Ca da bémentu' benu' lu xezre Capernaum,  
cá'aqueze ben na lázriu' nigá na'a.

<sup>24</sup> Nadxa gunná Jesús:

—Da li dxapa' le'e, tu benne' dxuchálaje' waláz  
chee Dios, quebe nu dxue le' ba lá'ana lazrie'.

<sup>25</sup> Dxapa' le'e, gulezrá' nu'ula zan ba gulate benne'  
chee' lu xezr la xu Israel ca lu zra guzúa Elías,  
benne' bchálaje' waláz chee Dios, gate na' quebe  
guca xiuj chun iza xugachaj, ne gúcale'e gubina' ca  
naca xezr la xu na'. <sup>26</sup> Dios quebe gusel-le' Elías  
lau netú nu'ula, nate benne' chee', zue' xezr la

xu Israel. Gusel-le' le' lau tu nu'ula, nate benne' chee', zue' lu xezre Sarepta, da zua na gagu naga dxe' xezre Sidón. <sup>27</sup> Cá'unqueze gulezrá' benne' zan benne' dxeledxé'ene' we' guzru' lu xezr la xu Israel ca lu zra guzúa Eliseo, benne' bchálaje' waláz chee' Dios, na' netúe' quebe bexaque'. Tuze Naamán, benne' xezr la xu Siria bexaque'.

<sup>28</sup> Gate belén benne' ca' zaj zre'e xu'u na' da nigá, na' belezrá'ale'e. <sup>29</sup> Na' gulasé', ne belexebéaje' Jesús xezre na', na' beleché'e Le' dxu'a chjéaj naga zria xezre na', chee' xuludxixre' Le' na'. <sup>30</sup> Na' Jesús bedé'e ládujla benne' ca', na' bezé'e zexíaje'.

*Jesús dxexune' tu benne' xu'e be' xriwe'*  
(Mr. 1.21-28)

<sup>31</sup> Nadxa Jesús bexíaje' Capernaum, tu xezre nababa Galilea, na' guzú lawe' dxusédene' benne' ca' lu zra lá'azxa chee' judío ca'. <sup>32</sup> Belexebánene' ca' naca da dxusédene', lawe' da dxuchálaje' ca' tu benne' nape' xel-la dxenná bea.

<sup>33</sup> Lu xu'u na' zua tu benne' xu'e be' xriwe', na' dxebezre xe'e, <sup>34</sup> dxenné':

—Bsan netu'. ¿Bizr chee' na' dxunu' netu' zede, Jesús, benne' Nazaret? ¿Za'u guzría xi'u netu'? Neda' núnbe'a Lue', ne nezda' nacu' benne' lá'azxa chee' Dios.

<sup>35</sup> Jesús gudil-le' be' xriwe' na', dxenné':

—Zrize guzúa. Bsan benne' biu nigá.

Nadxa be' xriwe' na' gudín na' bénnea' xu lau xúgute' benne' ca', na' bedxúaj na lu xichaj lázrdau bénnea', ne quebe bi ben na chee'. <sup>36</sup> Xúgute' belexebánene', na' gulé' ljwezre':

—¿Bizra dizra' da caní? Benne' nigá dxenná bé'ene' be' xriwe' ca' nen dute xel-la dxenná bea chee', ne nen xel-la waca, na' be' xriwe' ca' dx-eledxúaj na.

<sup>37</sup> Na' buluchálaje' ca' naca chee Jesús xúgute lu xezre ca' zaj nababa na'.

*Jesús dxexune' xrna zru'ula Pedro*

*(Mt. 8.14-15; Mr. 1.29-31)*

<sup>38</sup> Nadxa bedxúaj Jesús lu xu'u na', na' guxú'e lizre Simón. Xrna zru'ula Simón na' quebe chawe' zue', xú'ule'e da la, na' gulata' xuene' Jesús xexune' le'. <sup>39</sup> Jesús gubigue'e cuite', na' gudil-le' da la na', na' bedxúaj na. Ca ná'queze bexásate', na' guzú lawe' dxusení'e da xelawe'.

*Jesús dxexune' benne' zan quebe chawe' zaj zue'*

*(Mt. 8.16-17; Mr. 1.32-34)*

<sup>40</sup> Ca dxebía gubizra, benne' ca' zaj nnita' benne' quebe chawe' zaj zue' lizre' belú'e le' lau Jesús, na' Le' bze ne'e tu tu benne' ca', ne bexune' le'. <sup>41</sup> Cá'anqueze zánete be' xriwe' belexedxúaj na lu xichaj lázrdau benne' ca'. Dxelenná na:

—Lue' nacu' Zri'ine Dios.

Jesús gudil-le' be' xriwe' ca'. Quebe be'e na lataj xelenné na, lawe' da zaj neze na naca Le' Cristo.

*Jesús dxuchálaje' naga nababa Galilea*

*(Mr. 1.35-39)*

<sup>42</sup> Ca dxaní'sise', bdxuaj Jesús xezre na', guxíaje' naga xeajsú'e tuze'. Na' benne' ca' belexexilaje' Le', na' belezrine' xuluzague' Le' chee quebe xeze'e.

<sup>43</sup> Jesús gunné':

—Dxun na ba xen guzenda' b́enneache xezícadxa xezrdu ca' ca dxenná bea Dios, lawe' da chee guna' caní gusel-le' neda'.

<sup>44</sup> Ca'an guca gudá Jesús ca naca xezre ca' zaj nababa Galilea, na' bchálaje' lu xu'u naga dx-elezraga judío ca' lu xezre ca'.

## 5

### *Dxelezene' bela zan*

*(Mt. 4.18-22; Mr. 1.16-20)*

<sup>1</sup> Gate zua Jesús dxu'a nísadau' chee Genesaret, na' belezrín benne' zan, ne buluchídetē' Le', lawe' da dxelaca lazre' xelenne' xrtizra' Dios. <sup>2</sup> Jesús blé'ene' chupa da dxedá lawe' nísadau' lu nísadau' na', zaj zra' gáguze lu xu bizre, lawe' da ba belexedxúaj benne' wezén bela ca' lu'ule da dxedá lawe' nísadau', na' zaj zre'e dxelexibe' xixruj chee' ca'. <sup>3</sup> Nadxa guxú'u Jesús tu lu da dxedá lawe' nísadau', da naca na chee Simón, na' guzre' Simón guzrigue' na xelate' lu nísadau' na'. Jesús gudxé'e lu da dxedá lawe' nísadau' na', na' guzú lawe' dxusédene' benne' ca'. <sup>4</sup> Ca bexuzre bchálaje', na' guzre' Simón:

—Bsa da dxedá lawe' nísadau' chiu' naga nácadxa situj nísadau', na' le guzal-la xixruj chee'le na' chee senle bela.

<sup>5</sup> Simón bechebe':

—Benne' Wesede, bedú xela bentu' zrin, ne quebe bi bela ne sentu'. Lu dizra' chiu', na'a guzal-la' xixruj nigá.

<sup>6</sup> Ca belune' ca gunná Jesús, na' bela zante gulezene', na' gúcate wadxeza xixruj na'. <sup>7</sup> Nadxa bulutá ne'e gulenné' benne' ljwezre' zaj zre'e xetú



lu da dxedá lawe' nísadau' chee xelácalene' le'. Benne' ca' belezrine', na' bulusezrate' dxúpate da dxedá lawe' nísadau' ca', na' gulácatę na zi'i, ne dxácatę welaze na lu nísadau'. <sup>8</sup> Gate ble'e Simón Pedro da nigá, na' bzu zribe' lau Jesús, gunné':

—Gucuasa cuita' neda', Xran, lawe' da naca' neda' benne' dul-la.

<sup>9</sup> Caní gunná Simón lawe' da dxezrébele'e ne chee da guca na, ne cá'anqueze dxelezrebe benne' ljwezre' ca', gate belelé'ene' bela zan ca'. <sup>10</sup> Cá'anqueze belezrebe Jacobo ne Juan, zri'ine Zebedeo, benne' zaj naque' ljwezre Simón na'. Jesús guzre' Simón:

—Quebe zrebu'. Ná'atęla su lau' senu' bėnneache lu da naca chee Dios.

<sup>11</sup> Nadxa, ca belexebéaje' da dxedá lawe' nísadau' na' dxú'ela nísadau', na' bulucá'ane' ca naca da ca', na' zjácalene' Jesús.

*Jesús dxexune' tu benne' dxé'ene' wę' guzru'*  
(Mt. 8.1-4; Mr. 1.40-45)

<sup>12</sup> Gate Jesús zue' tu xęzre, na' bzrin tu benne' dxé'ene' wę' guzru', na' ca blé'ene' Jesús, bzu zribe', ne gudíxrujtę lawę' lu xu, na' bca'ana szrene' Le', gunné':

—Xran, che dxaca lazru', waca xexunu' neda'.

<sup>13</sup> Nadxa Jesús bte'-be' nen ne'e, gunné':

—Dxaca lazra'. Bache bexacu'.

Ca gunné' ca', wę' guzru' na' bedxúajtę na.

<sup>14</sup> Jesús bsebage' bėnnea' quebe nu xę'e da nigá. Nadxa gunné':

—Guxíaj na'a, xeajlé'e cuinu' lau bxruze, ne gulú'u dumí chee xexádxeu' lau Dios ca da gunná

be'e Moisés chee xeleneze benne' ba bexacu' ca naca xízrawe' chiú'.

<sup>15</sup> Ca naca xel-la waca chee Jesús bziríujdxá na, na' benne' zante belezrague' lau Jesús chee xelenne' da dxuchálaje', ne chee xexune' le' ca naca xízrawe' chee'. <sup>16</sup> Nadxa Jesús bezé'e na', na' bzrine' naga quebe nu chilá' benne', na' bchálajlene' Dios.

*Jesús dxexune' tu benne' naxrú'une ni'a ne'e*  
(Mt. 9.1-8; Mr. 2.1-12)

<sup>17</sup> Tu zra zua Jesús dxusédené', na' bal-la benne' xudau' fariseo ca', ne benne' dxuluxuzájle'e da nadxixruj be'e Moisés, zaj dxe'e na', benne' zá'aque' ca naca xézredu ca' zaj nababa Galilea, ne xezre ca' zaj nababa Judea, ne chee xezre Jerusalén, na' zúale xel-la waca chee Xránadxu Dios Jesús, na' bexune' benne' ca' quebe chawe' zaj zué'. <sup>18</sup> Nadxa belezrín tapa benne' zaj nu'e tu benne' zua zri ni'a ne'e, dee' tu lu blaga', na' gulaca lazre' xelegú'e le' lu xu'u chee xelíxrue' le' lau Jesús. <sup>19</sup> Quebe guca xelezrine' lau Jesús lawe' da zrále'e benne' zan ga na'. Nadxa gulegüéne' chju'ula, ne gulesaluje' chju'u, na' bululétaje' benne' na' de' lu blaga' ládujla benne' zan ca' lau Jesús. <sup>20</sup> Gate ble'e Jesús ca dxeléajle benne' ca' chee', na' guzre' benne' quebe chawe' zué':

—Bénne'dau', ba bnite lawa' dul-la chiu'.

<sup>21</sup> Nadxa benne' ca' dxuluxuzájle'e da nadxixruj bea na, ne benne' xudau' fariseo ca' gulezú lawe' dxelenné' lu xichaj lázrdawe': ¿Nuzra benne' nigá, dxenné' schanni' chee Dios? Quebe nu benne' séquene' gunite lawe' dul-la chee bénneache. Tuze Dios gaque'.

22 Jesús dxéquebe'ene' da dxelenné' lu xichaj lázrdawe', na' guzre' benne' ca':

—¿Bizr chee na' dxéquele le'e caní? 23 ¿Bízrala na quebe naca na stebe guna', che xapa' benne' nigá: Ba bnite lawa' dul-la chiu', u che xapa' le': Guxasa bexíaj? 24 Gulé'eda' le'e neda', Benne' Gulje' Bénneache, napa' xel-la dxenná bea lu xezr la xu nigá chee gunite lawa' dul-la chee bénneache.

Nadxa guzre' benne' na' naxrú'une ni'a ne'e:

—Lue' dxapa', bexasa, bexúa blaga' chiu', ne bexíaj.

25 Ca gunné' ca', bexásate benne' na' lau xúgute benne' ca', na' bequé'e blaga' chee', ne bezé'e zexíaje' lizre' zeajxé lá'ane' Dios. 26 Xúgute benne' ca' belexebáne'e, na' belúe lá'ane' Dios, ne nen xel-la dxelezrebe gulenné':

—Na'a ble'edxu da dxebánequezdxu.

### *Jesús dxenné' Leví*

*(Mt. 9.9-13; Mr. 2.13-17)*

27 Ca gudé na' bezá'a Jesús, na' blé'ene' tu benne' dxuchizruje' waláz chee xezre Roma, le' Leví. Dxe'e naga dxuchízruje', na' guzre' le':

—Ben neda' tuze.

28 Na' guxasa Leví, bca'ane' ca naca chee' ca', na' guxíajlene' Jesús.

29 Ca gudé na', Leví gulu'e tu xrche' zrente lizre' chee bca'ana szrene' Jesús, na' zrále'eqeaze na' xezícadxa wechizruj ca', ne xezícadxa benne' zaj dxe'e dxágulene' benne' ca'. 30 Na' benne' xudau' fariseo ca', ne benne' ca' dxuluxuzájle'e da nadx-izruj bea na gulezú lawe' dxelezí tizre' benne' ca' dxusede Jesús, dxelé'e le':

—¿Bizr chee na' dxe'aj dxágulele benne' wechizruj caní, ne benne' dul-la ca'?

<sup>31</sup> Jesús bechebe':

—Quebe zaj nachine benne' zaj zua chawe' nu benne' dxexúne' le'. Benne' quebe chawe' zaj zue' dxelechínene' le'. <sup>32</sup> Neda' quegá za'a dxennéa' benne' xrlátaje. Za'a dxennéa' benne' dul-la, chee xelexebí'i lazre'.

*Dxuluchebe' Jesús ca naca chee gubasa  
(Mt. 9.14-17; Mr. 2.18-22)*

<sup>33</sup> Nadxa buluchebe' Jesús:

—¿Bizr chee na' dxelúnle'e gubasa, ne dxuluchálajle Dios benne' ca' zjácálene' Juan, ne benne' ca' zjácálene' benne' xudau' fariseo ca', san benne' ca' dxusédenu' tu dxelé'aj dxeláguzqueze'?

<sup>34</sup> Jesús bechebe':

—¿Wazéquele xele benne' zaj zra' laní chee wechaga na' xelune' gubasa dxácate na' zua benne' wechaga na' nen benne' ca'? <sup>35</sup> Wazrín zra gate wechaga na' na' xecuase' nen benne' ca'. Ca lu zra na' xelune' gubasa.

<sup>36</sup> Nadxa bchálajlene' le' ca naca da dxulé'e nigá:

—Quegá nu benne' cheze' tu zre' cube chee xudé'e na tu zre' gula. Che ca' guné', na' guzría xi'e ca naca zre' cube na', na' ládxe'du cube na' quebe gulé'e na cháwedau' nen ladxe' gula na'.

<sup>37</sup> Cá'anqueze quebe gaca cá'adxu xrise uva cube lu bzude xide gula, lawe' da che ca' gundxu, xrise uva cube na' gutín na bzude xide gula, na' gaca ditje xrise uva na', ne bzude xide na'. <sup>38</sup> Chee le na' dxalla' cá'adxu xrise uva cube lu bzude xide cube, na' dxúpaté na' xegá'ana chawe' na. <sup>39</sup> Che tu benne'

xí'aje' xrise uva wal-la gula, québedxa nna na chee' xí'aje' xrise uva cube, lawe' da dxenné': "Nétajdxa da gula na'."

## 6

*Benne' ca' dxusede Jesús dxelálaje' dau zrua' xtila lu zra lál'azxa chee judío ca'*

*(Mt. 12.1-8; Mr. 2.23-28)*

<sup>1</sup> Tu lu zra lál'azxa chee judío ca', gudé Jesús naga naxaza zrua' xtila, na' benne' ca' dxusedene' zjaque' dxelálaje' dau zrua' xtila, na' dxelezhube na nen ne'e, ne dxelawe' zrua' xtila na'. <sup>2</sup> Nadxa benne' xudau' fariseo ca' buluchebe' le':

—¿Bizr chee na' dxunle le'e tu zrin da quebe naca na gunle zra lál'azxa cheedxu?

<sup>3</sup> Jesús bechebe':

—¿Quebe ne gulábale le'e ca ben David ne benne' ljwezre' ca' gate guledune'? <sup>4</sup> Guxú'u David na' tu lu xudau' chee Dios, ne guqué'e xeta xtila da gulú'u bxruze lau Dios, na' gudawe' na, ne bnézrujte' chee benne' ca' zjácálene' le', ne quebe naca chee' xelawe' xeta xtila na'. Tuze bxruze ca' naca chee' xelawe' na.

<sup>5</sup> Cá'anqueze guzre Jesús benne' ca':

—Neda', Benne' Gulje' Bénneache, nápaqueza' xella dxenná bea ca naca chee zra lál'azxa.

*Jesús dxexune' benne' nazrinnaj ne'e*

*(Mt. 12.9-14; Mr. 3.1-6)*

<sup>6</sup> Xetú lu zra lál'azxa chee judío ca', guxú'u Jesús tu lu xu'u, na' guzú lawe' dxusedene' benne' zaj nazrague' na'. Zua na' tu benne' nazrinnaj ne'e xabéla. <sup>7</sup> Benne' ca' dxuluxuzájle'e da nadxixruj

bea na, ne benne' xudau' fariseo ca' dxuluzuzre' Jesús chee xelelé'ene' che xexún Jesús bènnea' lu zra lá'azxa chee', chee xelezéquene' xelawe' zria Jesús. <sup>8</sup> Jesús ba nézene' ca da dxelegú'u lazre', na' guzre' bènnea' nazrinnaj ne'e:

—Guxasa, ne guzé laduj nigá.

Benne' na' guxase', na' guzé' na'. <sup>9</sup> Nadxa gunná Jesús, guzre' benne' ca':

—Na'a gucheba' le'e tu: ¿Bízrala na' waca gundxu zra lá'azxa cheele, da xrlátaje che da calela? ¿Gucache cháwedxu xel-la nabán chee tu benne', che guzría xidxu na?

<sup>10</sup> Nadxa Jesús guné'e benne' ca' zaj naxechaj Le', na' guzre' benne' we' na':

—Bli na'u nigá.

Benne' na' bene' ca', na' bexácate ne'e na'. <sup>11</sup> Na' benne' ca' zaj zre'e na' belezrá'ale'e, na' gulezú lawe' dxuluchebe ljwezre' bi xelezéquene' xelune' chee Jesús chee xuluzría xi'e Le'.

*Jesús dxequ'e benne' chazrinnu ca' xelaque' gubáz chee'*

*(Mt. 10.1-4; Mr. 3.13-19)*

<sup>12</sup> Ca lu zra na' Jesús guxíaje' tu lu xi'a xeajchálajlene' Dios, na' guzúe' bedú xela dxuchálajlene' Dios. <sup>13</sup> Ca guxaní' gunné' benne' ca' dxusédene', ne guqu'é'e chazrinnu benne' ca', na' bzre'e benne' ca' xelaque' gubáz chee'.

<sup>14</sup> Benne' caní zaj naque':

Simón, (bènnea' bzue' le' Pedro),  
Andrés, (benne' biche Simón na'),  
Jacobo, Juan, Felipe, Bartolomé,

<sup>15</sup> Mateo, Tomás,

Jacobo, (zri'ine Alfeo),  
 Simón, (bénnea' dxedábage' benne' Roma ca')  
 16 Judas, (benne' biche Jacobo), ne  
 Judas Iscariote, (bénnea' gudé'e Jesús lu na' benne'  
 ca' dxeledábage' Le'.)

*Jesús dxusédenē' benne' zante*  
 (Mt. 4.23-25)

17 Jesús bdinne' lu xi'a na' nen benne' ca' dxusédenē', na' bzrine' tu lache' nen benne' ca'. Benne' zan zaj zre'e na' zaj nababe' xezre ca' zaj nababa Judea, ne Jerusalén, nen benne' zaj nababe' Tiro, ne Sidón. Benne' caní belelé'e chee xelenne' da dxuchalaj Jesús, ne chee xexún Jesús le' ca' naca xízrawe' dxeledxé'ene'. 18 Cá'aqueze benne' ca' zaj xu'e be' xriwe' belexaque'. 19 Xúgute benne' ca' gulaca lazre' xuluté' Jesús lawe' da dxexún Le' xúgute' nen xel-la waca chee'.

*Benne' ca' naca da ba neza zren chee', ne benne' ca' zaj naque' baxache'*  
 (Mt. 5.1-12)

20 Nadxa Jesús gunné'e benne' ca' dxusédenē', na' guzre' le':

—Ba neza zrente naca na chee le'e, dxéquebe'ele nácale benne' xache', lawe' da waxú'ule le'e naga dxenná bea Dios.

21 'Ba neza zrente naca na chee le'e, dxedunle da dxunna Dios, lawe' da wélajquezle.

'Ba neza zrente naca na chee le'e, dxebézrele ne chee dula, lawe' da guzrízrequezle.

22 'Ba neza zrente naca na chee le'e, gate xelecuide bénneache le'e, ne gate xelxebéaje' le'e chalé'ajla, ne gate xelenné' schanni' chee le'e, ne

gate xulucá'ana ditje' lale ca tu da sban lawe' da nácale bi chia' neda', Benne' Gulje' Bénneache. <sup>23</sup> Le béle'e, ne le sua lu da ba neza lu zra na' lawe' da zrué'ele tu da zren lu xabáa chee Dios. Cá'anqueze benne' xra xrtau benne' caní bulusaca zi'e benne' ca' buluchálajé' waláz chee Dios.

<sup>24</sup> 'Baxache' nácale le'e, benne' gunní'a, lawe' da ba nápaie xel-la dxebé da naca chee xezr la xu nigá.

<sup>25</sup> 'Baxache' nácale le'e, nélajle na'a, lawe' da wadunle le'e.

'Baxache' nácale le'e dxuzrízrele na'a, lawe' da cuezre xáchele.

<sup>26</sup> 'Baxache' nácale le'e gate xúgute bénneache dxelenné' da chawe' chee, lawe' da ca' belún xra xrtáule, gulenné' da chawe' chee benne' wen lazre' ca', benne' gulenné': "Netu' dxuchálajntu' waláz chee Dios."

*Dxal-la' zrí'idxu benne' ca' dxelecuídene' dxi'u*  
(Mt. 5.38-48; 7.12)

<sup>27</sup> Na' gunná Jesús:

—Dxapa' le'e dxénele chia', le zri'i benne' ca' dxelecuídene' le'e, ne le gun chawe' chee benne' ca' dxelezzré'e le'e. <sup>28</sup> Le nne chawe' chee benne' ca' dxelenné' caléla chee, ne le naba lau Dios gaca chawe' chee benne' ca' dxelenné' schanni' chee. <sup>29</sup> Che nu benne' cape' xrágale, le guzete xecha la'a, ne che nu benne' que'e xicha chee, le güe lataj ca'ate' zrale. <sup>30</sup> Le gunezruj núteteze benne' bi nabe' le'e, ne che nu benne' que'e da naca chee, quebe xenábale na. <sup>31</sup> Le gun chee bénneache cáteze na' dxaca lázrele xelune' chee.

<sup>32</sup> 'Che le'e nazri'ile tuze benne' ca' zaj nazrí'ine' le'e, ¿bízraqueze da chawe' dxunle? Cá'anqueze



dxelún benne' ca' dxelunē' da calela. <sup>33</sup> Che dxunle chawe' chee tuze benne' ca' dxelunē' le'e chawe', ¿bízraqueze da chawe' dxunle? Cá'anqueze dxelún benne' wēn da zrinnaj ca'. <sup>34</sup> Che bi dxusanle chee tuze benne' ba nézele wexunne' na, ¿bízraqueze da chawe' dxunle? Cá'anqueze benne' wēn da calela ca' dxulusane' da naca chee' chee' benne' ca' dxelunē' da calela, lawe' da zaj nézene' wulunézrujte benne' ca' le na. <sup>35</sup> Dxal-la' zri'ile le'e benne' ca' dxelezzré'e le'e, ne gunle da chawe' chee', ne gusanle chee' benne' ca' da xelenabe' le'e, lácala quebe xelexexunne' na. Che gunle ca', da zrendxa da si' lu na'le, ne gácale bi ca' chee' Dios szrente, lawe' da naca Le' zri'i lazre' nen benne' ca' quebe dxelexezaca ba lazre', ne benne' wēn da calela ca'. <sup>36</sup> Le xezrí lazre' bēnneache ca dxun Dios, dxezrí lazre' le'e.

*Quebe guzúale chalá'ala le sa' ljuwézrele  
(Mt. 7.1-5)*

<sup>37</sup> Na' gunná Jesús:

—Quebe guzúale chalá'ala le sa' ljuwézrele, na' Dios quebe guzúe' le'e chalá'ala. Quebe bi nnele chee' le sa' ljuwézrele, na' Dios quebe guchi'e chee'le le'e. Le gunite lau chee' le sa' ljuwézrele, na' Dios gunite lawe' chee'le le'e. <sup>38</sup> Le gunezruj chee' bēnneache, na' Dios gunne' chee'le le'e. Dios cu'e lu xcuite chee'le tu xi'ina da nálate, ne da naxí'tequeze, ne guníbetē' na, ne sua dí'atequeze na. Dios gudxíxrequeze' chee'le ca da dxudxíxrele chee' bēnneache.

<sup>39</sup> Nadxa Jesús bchálaje' da dxulé'e nigá, gunné':

—¿Waca tu benne' la chul-la cu'e neza xetú la chul-la? Che ca' gunē', dxúpate' xelebixre' tu lu

xedxu. <sup>40</sup> Netú benne' dxusede gácadxe' szren ca naca bēnnea' dxusédene' le', na' gate xuzre gusédie', gaque' ca naca bēnnea' bsédene' le'.

<sup>41</sup> '¿Bizr chee na' dxenná'u bēbedu na' xu'u na xiaj lau le sa' ljwezru', ne quebe dxéquebe'enu' ca naca da zren da xu'u na xiaj lau' lue'? <sup>42</sup> Che quebe dxéquebe'enu' ca naca da zren na' da xu'u na xiaj lau' lue', ¿ájazra dxunu' dxexázrenu' dxu'u le sa' ljwezru': “Benna lataj xebéaja' bēbedu na' xu'u na xiaj lau'?” Lue', benne' dxun láweze xrlátaje, bebéaj zá'teca lue' ca naca da zren da xu'u na xiaj lau', na' nadxa le'enu' cháwedau' xebéaju' bēbedu na' xu'u na xiaj lau le sa' ljwezru'.

*Naca bea tu benne' ne chee da dxunge'*  
(Mt. 7.17-20; 12.34-35)

Nadxa gunná Jesús: <sup>43</sup> —Tu xaga xrlátaje quebe cuía na da zixre calela, na' xaga da quebe naca chawe' quebe gaca cuía na da zixre chawe'. <sup>44</sup> Tu tu xaga naca bea na ne chee da zixre da dxebía na. Quebe gaca guchíbedxu da zixre chee xaga higo tu lu xaga xeche', ne quebe guchíbedxu da zixre chee lba uva lu xeche' bisigá. <sup>45</sup> Benne' xrlátaje, da xrlátaje dxenné bēnnea' lawe' da naxaza da xrlátaje lu xichaj lázrdawe', na' benne' wen da calela, da calela dxenné bēnnea' lawe' da xu'u da calela lu xichaj lázrdawe'. Dxu'e na' dxenné na ca naca da xu'u lu xichaj lázrdawe'.

*Dxuchalaj Jesús chee chupa lane xu'u*  
(Mt. 7.24-27)

Gunná Jesús: <sup>46</sup> —¿Bizr chee na' dxele neda': “Xran, Xran”, ne quebe dxunle ca da dxapa' le'e? <sup>47</sup> Xapa' le'e aja naca bēnnea' ze'e nen neda', ne

dxenne' xrtizra'a, ne dxune' ca da dxapa' le'.  
 48 Naque' ca tu benne' bene' tu xu'u. Da zren  
 gudene', na' bzrie' lane na lawe' xiaj xre. Gate  
 bdxuaj xegu, na' xeajchú'ule'e na le'e xu'u na',  
 quebe bi guzeque' gune na xu'u na' lawe' da zria  
 lane na lawe' xiaj xre. 49 Na' bennea' dxenne'  
 xrtizra'a, ne quebe dxune' ca da dxapa' le', naque'  
 ca tu benne' bene' xu'u chee' lawe' xu dxeze, ne  
 quebe guzale' lane na, na' gate bdxuaj xegu na', ne  
 xeajchú'ule'e na le'e xu'u na', na' guché na le na, na'  
 tu chí'izqueze bzria xi na le na.

## 7

### *Jesús dxexune' bi wen zrin chee tu benne' Roma (Mt. 8.5-13)*

1 Gate bexuzre bchálajle Jesús benne' ca', na'  
 bezé'e zexíaje' Capernaum. 2 Zua tu benne' Roma  
 na', benne' dxenná be'e lu wedil-la, na' zua tu bi  
 wen zrin chee' nazrí'ile'ene'-be', na' bi na' quebe  
 chawe' zúabe', ne dxaca wátebe'. 3 Gate ben benne'  
 Roma na' ca da dxun Jesús, na' gusél-le' bal-la  
 benne' gula sina chee judío ca', chee xeajleguezre'  
 Jesús xide' xexune' bi wen zrin chee'. 4 Benne' gula  
 ca' belezrine' lau Jesús, na' gulezú lawe' dxelata'  
 xuene' Le', dxelenné':

—Benne' Roma nigá naca chee' gácalenu' le',  
 5 lawe' da dxape' ba lá'ana xezre cheedxu, na'  
 léqueze' bene' tu xu'u cheedxu ga dxezragadxu.

6 Nadxa Jesús guxíajlene' benne' gula ca'. Gate  
 belezrine' gagu naga zua lizre benne' Roma na', le'  
 gusél-le' bal-la benne' ljwezre' xeajleguezre' Jesús:

—Xran, quebe senu' gunne xue, lawe' da quebe  
 naca chia' chu'u lizra'. 7 Chee le na' ne quebe

bexazrda' néda'queza' xedajdilja' Lue'. Cun gunnaze, na' xexaca bi wən zrin chia'. <sup>8</sup> Néda'queza' zua benne' dxenná bé'ene' neda', na' neda' dxenná be'eda' benne' dxjaca wedil-la. Che xapa' tu bēnea': Guxíaj, na' waxíajbe', ne che xapa' xetube': Gudá, na' wídabe', ne che nna be'eda' bi wən zrin chia' da gunbe', na' gunbe' na.

<sup>9</sup> Gate ben Jesús da nigá, na' bebánene', na' gunné'e benne' ca' zjácale Le', gunné':

—Da li, quebe ne cheajxraca' tu benne' xezre Israel dxeajlí lazre' neda' ca dxun benne' nigá.

<sup>10</sup> Gate belexezrín benne' ljwezre benne' Roma na' lizre', na' belelé'ene' ba bexaca bi wən zrin na'.

*Jesús dxusebanē' bi biu cheē tu nu'ula ba gute benne' chie'*

<sup>11</sup> Ca gudé na' Jesús guzé'e zéaje' tu xezre da nazi le na Naín, na' xjácale Le' benne' ca' dxusédenē', ne benne' zante. <sup>12</sup> Gate bzrine' gáguze naga zua xezre na', blé'ene' benne' zaj nu'e tu bi gate zeajlecachē'-be', na' naca be' bi tulicha' cheē xrnabe', nu'ula na' ba gute benne' chie'. Benne' zan, benne' lazriē' zjácale' le'. <sup>13</sup> Gate Xránadxu blé'ene' nu'ula na', na' bexache lazre' le', ne guzre' le':

—Québedxa cuezru'.

<sup>14</sup> Nadxa gubiga Jesús dxu'a xi'ina xu'ube', na' bte' na. Na' benne' ca' zeajlexexu'e-be' gulague'. Na' Jesús guzre' bi gate na':

—Bidau', dxapa' lue', guxasa.

<sup>15</sup> Na' bi na' ba nate bexásabe' gudxe'be', na' bezú laube' dxuchálajbe'. Na' Jesús bunézruje'-be' lu na' xrnabe'. <sup>16</sup> Gate belelé'e benne' ca' da nigá,

na' belezrebe', ne gulezú lawe' dxelúe lá'ane' Dios, dxelenné':

—Tu benne' zrente, benne' dxenné' waláz chee Dios, ba ble'e ládujla dxi'u.

Cá'aqueze dxelenné':

—Dios ba ble'e dxácalene' xezr chee'.

<sup>17</sup> Ca naca naga nababa Judea, ne xezre walíZR chee na belén bènneache ca naca xel-la waca chee Jesús.

*Juan, bènnea' bchue' bènneache nisa dxesel-le' gubáz chee' lau Jesús*

*(Mt. 11.2-19)*

<sup>18</sup> Naga xu'u Juan lizre xia, bènene' ca naca chee da nigá lawe' da benne' ca' zjácálene' Juan buluzenne' le' da dxaca na. Juan gunné' chupa benne' ca', <sup>19</sup> na' gusel-le' le' lau Jesús chee chea-jlechebe' Le' che da li naque' Cristo, bènnea' dxal-la' xide', u che dxal-la' xelebeze' benne' xula.

<sup>20</sup> Nadxa benne' ca' gusel-la Juan belezrine' lau Jesús, na' gulé'e Le':

—Juan, bènnea' bchue' bènneache nisa nasel-le' netu' zedajchébentu' Lue' che Lue' na' nacu' Cristo, bènnea' dxal-la' xide', u che dxal-la' cuézantu' benne' xula.

<sup>21</sup> Ca lu zra na' Jesús bexune' benne' zante benne' we', ne benne' dxé'ene' xízrawe' da dxedá du zren, ne benne' ca' zaj xu'e be' xriwe', na' bexune' benne' la chul-la ca'. <sup>22</sup> Nadxa Jesús guzre' benne' ca' nasel-la Juan:

—Le cheajxaca, ne le xe Juan ca naca da ba ble'ele, ne da bénele. Benne' la chul-la ca' dx-elexelé'ene', na' benne' zrinnaj ca' dxelexedé', na' benne' dxeledxé'ene' we' guzru' ba belexaque', na'

benne' xache' ca' dxellenē' dizra' chawe' cheē  
Dios. <sup>23</sup> Ba neza zren naca na cheē benne' quebe  
gusán lazre' neda'.

<sup>24</sup> Gate besí'aca benne' ca' gusel-la Juan, na' Jesús  
guzú lawē' dxuchálajlēnē' benne' zaj zrē'e na' ca  
naca cheē Juan na', dxenné':

—¿Bizra guxiajle le'e xeajna'le le'ē xixre' lawe'  
lataj? ¿Tu xia xtila da dxutá be'? <sup>25</sup> Che cabí,  
¿bizra xeajna'le? ¿Tu benne' nacu zra lanē' da  
zácalē'e? Ba nézquezle le'e benne' ca' dxelacu zra  
lanē' da zácalē'e, ne dxelé'aj dxelawē' da zácalē'e  
zaj zrē'e lizre benne' blau ca'. <sup>26</sup> Che cabí, ¿bizra  
xeajna'le? ¿Tu benne' dxuchálajē' waláz cheē  
Dios? Awe', ble'ele tu benne' nácadxē' szren ca tu  
benne' dxuchálajē' waláz cheē Dios. <sup>27</sup> Juan nigá  
naque' bēnea' naxúaj na cheē' lu xiche cheē Dios,  
dxenné':

Dxesel-la' gubáz chia' lau Lue',  
cheē gucá'ana chawē' neza naga teu'.

<sup>28</sup> Dxapa' le'e, ládujla xúgutē benne' quebe nu chilá'  
benne' dxuchálajē' waláz cheē Dios nácadxē' szren  
ca Juan nigá. Na'a benne' nácadxē' dxexruj lazre'  
naga dxenná bea Dios nácadxē' blau ca Juan nigá.

<sup>29</sup> Na' gunná Jesús:

—Gate na' benne' dxexruj lazre' ca', ne benne'  
wechizruj ca' belennē' da dxuchalaj Juan, guleque  
bé'enē' Dios naque' xrlátaje, na' beledxúē' nisa lu  
na' Juan. <sup>30</sup> Benne' xudau' fariseo ca', ne benne'  
ca' dxuluxuzájle'e da nadxixruj bea na buluzúē'  
chalá'ala ca naca da dxaca lazre' Dios gunē' cheē',  
na' quebe beledxúē' nisa lu na' Juan.

<sup>31</sup> Na' gunná Xránadxu:

—¿Ájazra gutil-la lébeda' benne' zaj zre'e na'a zra? ¿ájazra zaj naque'? <sup>32</sup> Zaj naque' ca bidu ca' dxelebe'be' dxelítajbe' lawe' xi'a, ne dxelebezre xa'abe', dxelebe' bidu ljwézrebe': "Bcuézrentu' bchiuj da bénele, san quebe bxá'ale. Bil-la xáchentu', san quebe gudxézrele." <sup>33</sup> Caní zaj naca benne' ca' lawe' da bla' Juan, bènea' bchue' bèneache nisa, ne quebe gudawe' xeta, ne quebe gu'e xrise uva wal-la, na' gulenné' xu'e be' xriwe'. <sup>34</sup> Nadxa bla'a neda', Benne' Gulje' Bénneache, dxe'aj dxawa', na' dxelenné' naca' wagu xrata, ne benne' dxé'ajle'e, ne dxelenné' naca' ljwezre benne' dul-la ca', ne benne' wechizruj ca'. <sup>35</sup> Xel-la sina chee Dios naca bea na ne chee da dxelún benne' ca' zaj nape' xel-la sina chee Dios.

*Da bchalaj Jesús lizre Simón, benne' xudau' fariseo*

<sup>36</sup> Tu benne' xudau' fariseo gunné' Jesús chea-jtawe' xeta lizre', na' Jesús guxíaje' lizre bènea', na' gudxé'e dxawe'. <sup>37</sup> Nadxa tu nu'ula dul-la chee xezre na', gate benne' bzrin Jesús dxawe' xeta lizre benne' fariseo na', na' bzrin nu'ula na' ga na', nu'e tu da' naca na xiaj zaca, da nazrátē na da dxelá zixre. <sup>38</sup> Gate bzrin nu'ula na' naga zua Jesús, na' gudxé'e zran ni'e dxebezre', ne guzú lawe' dxibe' ni'a Jesús nen nisa dxebezre', ne bsebizre' ni'e nen xicha xíchaje', ne bnupe' ni'a Jesús, na' gulu'e na da dxelá zixre na'. <sup>39</sup> Na' benne' xudau' fariseo, bènea' gunné' Jesús lizre', gate blé'ene' da nigá, gunné' lu lázrdawe': "Chela benne' nigá da li naque' benne' dxuchálaje' waláz chee Dios, guéquebe'equeze' aja naca chee nu'ula nigá dxuté'

ni'e, lawe' da naque' nu'ula dul-la." <sup>40</sup> Nadxa Jesús guzre' benne' fariseo na':

—Simón, de tu da guchálajlena' lue'.

Na' bechebe benne' fariseo na':

—Gunná, Benne' Wesede.

<sup>41</sup> Jesús gunné':

—Chupa benne' dxelal-le' dumí chee tu benne' tu dxusántezqueze' benne' dumí. Tue' dxal-le' chee' lazruj chee' chupiza, na' xetúe' dxebague' lazruj chee' chupa beu'. <sup>42</sup> Lawe' da quebe dx-elezéquene' xelexexízruje' chee' bénnea', na' le' bnite lawe' chee' dxúpatē benne' ca' ca naca da dx-elebague' chee'. Na'a gunná, ¿nula benne' caní zrí'idxene' bénnea'?

<sup>43</sup> Simón bechebe':

—Dxéqueda' bénnea' bnite lawe' chee' da zrendxa.

Na' Jesús guzre' le':

—Da li dxennáu'.

<sup>44</sup> Nadxa Jesús gunné'e nu'ula na', na' guzre' Simón:

—¿Dxelé'enu' nu'ula nigá? Neda' guxu'a lizru', ne quebe nu' gunná be'enu' quibe ni'a, san nu'ula nigá gudibe' ni'a nen nisa dxebezre', ne bsebizre' na nen xicha xíchaje'. <sup>45</sup> Quebe bnupu' neda', san nu'ula nigá, gate guxú'utea', quebe dxusane' dx-unúpequeze' ni'a. <sup>46</sup> Quebe gulú'u da za xíchaja', san nu'ula nigá gulu'e ni'a da dxelále'e zixre. <sup>47</sup> Chee le' na' dxapa' lue', lawe' da nazrí'ile'ene' neda', da nigá naca bea na ba bnite lawa' chee' ca naca dul-la zan chee', san bénnea' naca bábaze dul-la chee' da bnite lawa', láteze zrí'ine' neda'.

<sup>48</sup> Nadxa Jesús guzre' nu'ula':



—Dul-la chiu' ba bnite lawa'.

<sup>49</sup> Na' benne' ca' zaj zre'e nen Le', ne zaj dxe'e na' gulezú lawe' dxelenné' lu lázrdawé': “¿Nuzra benne' nigá, dxunite láuqueze' dul-la?”

<sup>50</sup> Jesús guzre' nu'ula na':

—Ba naláu' lawe' da guxéajle'u chia'. Bexíaj dute xel-la dxebeza zri lazre'.

## 8

### *Nu'ula ca' belún zrin chee Jesús*

<sup>1</sup> Ca gudé da nigá, gudá Jesús zane' xezre, ne xézredu ca', dxusédené', ne dxuchálaje' ca dxenná bea Dios. Benne' chazrinnu gubáz ca' zjácalene' Le'. <sup>2</sup> Cá'anqueze zjácale Le' bal-la nu'ula ca', benne' ca' bexune' le' ca naca xízrawe' chee', ne bebéaje' be' xriwe' ca' da zaj xu'e. Ládujla nu'ula ca' ziaj María Magdalena, nu'ula na' belexedxúaj gazre be' xriwe' lu xichaj lázrdawé'. <sup>3</sup> Ládujla le' zíajqueze Juana, zru'ula Chuza, benne' na' xu'u lu ne'e da napa Herodes. Cá'anqueze ládujla le' ziaj Susana, na' zjaca nu'ula zandxa na', nu'ula ca' dxelácalene' Jesús nen da zaj nape'.

*Da dxulé'e na ca naca chee benne' dxaze' zrua' xtila*

*(Mt. 13.1-9; Mr. 4.1-9)*

<sup>4</sup> Benne' zan beledxúaje' lu xezre ca' chee xeelé'ene' Jesús, na' gate belezraga benne' zan naga zue', na' bchálaje' tu da dxulé'e na, dxe'e le':

<sup>5</sup> —Tu benne' dxaze' guzé'e zjaze' zrua' xtila. Ca zéaje' dxaze' na, bal-la bínnedu ca' xeajlechaze na dxu'a neza, na' benne' ca' bululéaje' na, na' belezrín bxínnedau' guláguba' na. <sup>6</sup> Xebal-la bínnedu ca' xeajlechaze na lu xiaj ca', na' gate bínnedu caní

belezría na, chadite gulebizre na, lawe' da quebe gudxé' gupa'. <sup>7</sup> Xebal-la bínnedu ca' xeajlechaze na naga zaj dxe' lue xeche', na' bululule xeche' ca' le na. <sup>8</sup> Xebal-la bínnedu ca' xeajlechaze na lu xu bebe, na' gate belegula na, na' gulezríale'e na. Bal-la na gulezría na tu gaxúa weaj.

Gate bexuzre bchalaj Jesús da nigá, na' gunné' zizraj:

—¡Che le'e zua nágale, le xene!

*Jesús dxenné' bizr chee na' dxuchálaje' da dxululé'e na*

*(Mt. 13.10-17; Mr. 4.10-12)*

<sup>9</sup> Nadxa benne' ca' dxusede Jesús gulenábene' Le' bizra zéaje da dxululé'e nigá. <sup>10</sup> Jesús guzre' le':

—Dios dxuzéajni'ine' le'e ca naca da nagache chee xel-la dxenná bea chee', san benne' xula, dxuchálajlena' le' da dxululé'e na caní, chee gate dxelelé'ene' xelaque' ca benne' quebe dxelelé'ene', ne gate dxelenne' quebe dxeléajni'ine'.

*Jesús dxuxuzájle'e da dxululé'e na ca naca chee bénnea' dxaze'*

*(Mt. 13.18-23; Mr. 4.13-20)*

<sup>11</sup> Na' gunná Jesús:

—Da nigá naca ca zéaje da dxululé'e na': Bínnedu ca' zéaje na xrtizra' Dios. <sup>12</sup> Bínnedu ca' xeajlechaze na dxu'a neza zéaje na benne' ca' dxelenne' xrtizra' Dios, san za' da xriwe', na' dxegúa na dizra' na' lu xichaj lázrdau benne' ca', chee quebe xeléajle'e, ne quebe xelelé'. <sup>13</sup> Bínnedu ca' xeajlechaze na lu xiaj ca' zéaje na benne' ca' dxelenne' dizra' na', ne dxelezi'e na dute xel-la dxelebé, san quebe dxaze na lu xichaj lázrdawe'. Dxeléajle'e tu chí'idau'ze, na'

gate dxeledé' lu da zi' da xa', na' dxulusán lazre' na. <sup>14</sup> Bínnedu ca' xeajlechaze na naga zaj dxe' lue xeche' zéaję na benne' ca' dxelenne' dizra' na', na' dxeajxaque', na' lawe' da dxelezęne' gunne xue da zante, ne dxelezé lazre' xel-la gunní'a, ne da xele'aj xelawe' da zácale'e, na' xúgute da caní dxulusunite na dizra' na', na' quebe dxun na zrin lu xichaj lázrdawe'. <sup>15</sup> Na' bínnedu ca' xeajlechaze na lu xu bebe zéaję na benne' ca' zua chawe', ne du lazre' lázrdawe', na' gate dxelenne' dizra' na', dxuluzúa chache' na, na' dxun zrin dizra' na' lu xichaj lázrdawe'.

*Da dxulé'e na ca naca cheę tu da dxegú'u lení'  
(Mr. 4.21-25)*

<sup>16</sup> Gunná Jesús:

—Netú benne' che gugale' da dxegú'u lení', quebe gudúsię' na tu xi'ina, u zranle ga dxasię', san guzúę' na sibe, cheę cu'u lení' na cheę benne' zaj zre'ę lu xu'u na'. <sup>17</sup> Quebe bi de da nagache' da quebe gulé'e lau na, ne quebe bi xu'u lu xichaj lázrdau bėnneache da quebe gaca bea na, ne lá'tęqueze na.

<sup>18</sup> 'Cheę le na', le xene xanne'. Tu benne' nazi'ę xrtizra' Díos, wazidęe', san benne' quebe dxezi'ę na, wegá'a ca da du dxéquene' nape'.

*Dxeleznín lau Jesús xrne'ę, ne benne' biche' ca'  
(Mt. 12.46-50; Mr. 3.31-35)*

<sup>19</sup> Nadxa xrna Jesús, ne benne' biche' ca' belezrinę' naga zue', san quebe gulezéquene' xelezrinę' lau Le', lawe' da zrále'e benne' zan ga na'. <sup>20</sup> Tu benne' na' bzenne' Jesús, gunné':

—Xrna'u, ne bi bichu' ca' zaj zre'e chale'aj nigá, dxelaca lazre' xuluchálajlene' Lue'.

<sup>21</sup> Jesús guzre' le':

—Benne' ca' dxelenne' xrtizra' Dios, ne dxelunge' ca dxenná na, benne' caní zaj naque' ca xrna'a, ne benne' bícha'dau' ca'.

*Jesús dxuzúa zrie' be' bdunu', ne xeajxruza chee nísadau'*

*(Mt. 8.23-27; Mr. 4.35-41)*

<sup>22</sup> Tu zra guxú'u Jesús tu lu da dxedá lawe' nísadau' nen benne' ca' dxusédenē', na' guzre' le':

—Cheajdxu xecha la'a nísadau'.

Na' gusiá'que', <sup>23</sup> ne dxácatē zjaque' lu nísadau' na', guse Jesús. Na' guzú lau dxácale'e be' bdunu' lu nísadau', na' guzú lau dxu'u nisa lu da dxedá lawe' nísadau' na', ne ba dxácatē waxaze na lu nísadau'.

<sup>24</sup> Nadxa bulusebane' Jesús, dxelé'e Le':

—¡Benne' Wesede! ¡Benne' Wesede! ¡Ba dxázedxu lu nisa nigá!

Nadxa guxasa Jesús, na' gudil-le' be' bdunu' na', ne nisa na', na' ca naca da ca' belezúa zri na.

<sup>25</sup> Nadxa Jesús guzre' benne' ca' dxusédenē':

—¿Quebe ne chéajlele chee Dios?

Benne' ca' belezrebe', ne belexebánene', na' buluchebe ljwezre':

—¿Núzraqueze benne' nigá, dxenná bé'ene' be', ne nisa, na' dxuluzúa na dizra' chee'?

*Tu benne' Gadara xu'e be' xriwe'*

*(Mt. 8.28-34; Mr. 5.1-20)*

<sup>26</sup> Nadxa belezrine' xecha la'a nisa lu xezr la xu chee xezre Gadara, chalá'a ca'ala chee Galilea.

<sup>27</sup> Gate bedxúaj Jesús lu da dxedá lawe' nísadau' na', na' bzrin tu benne' xezre na' lau Le'. Zánete

iza ba guca xu'u be' xriwe' ca' benne' nigá. Quebe gúcue' zra lane', ne quebe guzúe' netú lu xu'u, san xeajchu'e tu lu ba ca'. <sup>28</sup> Gate blé'ene' Jesús, na' xeajzú zribe' lau Le', na' gudxezre xe'e, dxenné':

—¿Bizr chee na' za'u naga zua', Jesús, Zri'ine Dios szrente? Dxata' xueda' Lue' quebe gusaca zi'u neda'.

<sup>29</sup> Gunná na canílawe' da ba gunná be'e Jesús be' xriwe' ca' xelexedxúaj na lu xichaj lázrdau benne' nigá. Zane' lasa be' xriwe' ca' ba gulela na benne' nigá. Benne' xezre na' gulele' benne' nigá, ne buluchéaje' le' ni'a ne'e nen du xia, san le' bzúzxuje' du xia na', na' be' xriwe' ca' guleché na le' le'e xixre' lawe' lataj. <sup>30</sup> Jesús bchebe' be' xriwe' ca':

—¿Bi lele?

Na' bechebe le na:

—Neda' lea': Da Zan.

Ca' gunná na lawe' da xu'u be' xriwe' zante benne' na'. <sup>31</sup> Be' xriwe' ca' gulenaba na Jesús quebe sel-le' na lataj chul-la. <sup>32</sup> Lu xi'a naga zua Jesús, na' zrale'e cuche zan dxeláguba', na' be' xriwe' ca' gulata' xue na Jesús gu'e lataj da ca' cheaxezrá na lu cuche ca', na' bnezruj Jesús na lataj.

<sup>33</sup> Nadxa be' xriwe' ca' belexedxúaj na lu xichaj lázrdau benne' na', na' gulú'u na lu cuche ca', na' xúgute cuche ca' buluzrúnnujba', ne gulebixreba' dxu'a chjéa, na' xeajlecházeba' lu nísadau', naga gulépeba', guláteba'.

<sup>34</sup> Benne' ca' dxuluxúe' cuche ca', gate belelé'ene' ca da guca, na' buluzrúnnuje' lu xel-la dxelezrebe, na' gulé'e benne' zaj zre'e le'e xixre', ne benne' zaj zre'e lawe' xezre ca da guca. <sup>35</sup> Nadxa benne' ca' beledxúaje' xeajlenné'e ca da guca. Gate belezrine'

naga zua Jesús, na' belelé'ene' bënnea' belexedxúaj be' xriwe' ca' lu xichaj lázrdawe', dxe'e zran ni'a Jesús, ba nácue' ladxe', ne ba bezúa chawe' xichaj lázrdawe', na' benne' ca' belezrebe'. <sup>36</sup> Na' benne' belelé'e ca da guca buluchálajlene' benne' xula ca' ca guca gate bexaca bënnea' guxú'e be' xriwe' ca'. <sup>37</sup> Gate belenne' caní, ca naca benne' zaj zre'e lu xezr la xu chee xezre Gadara gulezú lawe' dxelata' xúene' Jesús xezé'e lazrie', lawe' da dxeleznébe'e. Ca'an guca, guxú'u Jesús lu da dxedá lawe' nísadau', chee xezé'e xéaje'. <sup>38</sup> Bënnea' belexedxúaj be' xriwe' ca' lu xichaj lázrdawe' gunabe' lau Jesús gunézruje' lataj chéajlene' Le', san Jesús busebague' le' xegá'ane' lázrie', na' guzre' le':

<sup>39</sup> —Bexiaj lizru', na' bchalaj chee xúgute ca da ba ben Dios chiu'.

Na' benne' na' bezé'e zexíaje', na' bchálajlene' benne' xezre ca' ca da ben Jesús chee le'.

*Jesús dxexune' bí nu'ula chee Jairo, ne tu nu'ula xeajté' zra lane'*

*(Mt. 9.18-26; Mr. 5.21-43)*

<sup>40</sup> Gate bezrín Jesús xecha la'a dxu'a nísadau', benne' ca' zaj zre'e na' gulezí' lu ne'e Le' nen dute xel-la dxelebé, lawe' da xúgute' dxelebeze' Le'.

<sup>41</sup> Nadxa bzrin tu benne' le' Jairo, benne' blau chee xu'u naga dxelezraga judío ca', na' bzu zribe' lau Jesús, ne guta' xúene' Le' chéaje' lizre', <sup>42</sup> lawe' da zua tuze bí nu'ula chee'. Xu'ube' chazrinnu iza, na' ba dxaca wátebe'. Gate guzá' Jesús zéaje', benne' zante zjácálene' Le', ne buluchídete ljwezre'.

<sup>43</sup> Ládujla benne' ca' zeaj tu nu'ula quebe chawe' zue', na' chazrinnu iza ba zeaj dx'é'ene' we' dxen

da dxaca chee nu'ula ca'. Ba gudízuje' benne' dxelexún bénneache ca' xúgute ca da gudape', na' quebe bi gulezéquene' xelune' chee xexaca nu'ula na'. <sup>44</sup> Nu'ula na' gubiguē' cúzrula Jesús, na' xeajté' zran ni'a zre', na' la ná'queze bexágate dxen da dxaca nu'ula na'.

<sup>45</sup> Nadxa Jesús bchebe':

—¿Nuzra bta neda'?

Xúgute' gulenné': “Quebe nu ne gutá Lue’”, na' Pedro, ne benne' ljwezre' ca' gulenné':

—Benne' Wesede, benne' caní dxuluchídeē' Lue', ne dxuluzrigue' Lue', na' dxuchébequezu', dxennáu': “¿Nuzra bta neda'?”

<sup>46</sup> Jesús gunné':

—Tu benne' bte' neda' lawe' da gúquebe'eda' ben zrin xel-la waca chia' da bexún na tu benne'.

<sup>47</sup> Gate gúquebe'e nu'ula na' ba neze Jesús da guca, nadxa gudéē' dxezrízete', na' bzu zribe' lau Jesús, ne guxrúalepe' lau xúgute benne' ca' bizr chee na' bte' Jesús, ne ca guca bexácate'. <sup>48</sup> Nadxa gunná Jesús, guzre' nu'ula na':

—Zrí'ina'dau', ba bexacu' lawe' da guxéajle'u chia'. Bexíaj na'a, dute xel-la dxebeza zri lazre'.

<sup>49</sup> Ne dxuchálajte Jesús, bzrin tu benne' naga ze Jesús, benne' guzé'e lizre Jairo, benne' blau chee xu'u ga na' dxelezraga judío ca', na' guzre' Jairo:

—Ba gute bi nu'ula chiu'. Québedxa guzúa xuzru' Benne' Wesede nigá.

<sup>50</sup> Gate ben Jesús ca gunné', na' guzre' Jairo:

—Quebe zrebu'. Con guxeajle. Bi nu'ula chiu' na' xexácabe'.

<sup>51</sup> Gate bzrin Jesús xu'u na', netú quebe be' lataj chú'ule Le', san tuze Pedro, ne Jacobó, ne Juan, ne

xra xrna bi nu'ula na'. <sup>52</sup> Xúgute benne' zaj zre'e na' dxelebezre', ne dxelebezre xache' chee' bi nu'ula na'. Jesús gunné':

—Quebe cuézrele. Bi nú'uladu nigá quebe nátebe'. Dxásezebe' na'.

<sup>53</sup> Na' benne' ca' buluzrizre' chee', lawe' da zaj nézquezne' ba gútebe'. <sup>54</sup> Nadxa Jesús guqué'e na' bi na', na' gunné' zizraj:

—¡Bi nu'ula, bexasa!

<sup>55</sup> Na' bebanbe', ne bexásatebe'. Na' Jesús busebague' le' xulunézruje' da gágube'. <sup>56</sup> Xra xrnabe' belexebánele'ene'. Jesús busebague' le' quebe nu xelé'e ca da guca.

## 9

*Jesús dxesel-le' benne' chazrinnu ca' xelune' xrchine'*

*(Mt. 10.5-15; Mr. 6.7-13)*

<sup>1</sup> Jesús bchague' benne' chazrinnu ca' dxusédene', na' bnézruje' le' xel-la waca, ne xel-la dxenná bea chee' xelexebéaje' xúgute' cue' be' xriwe' ca' da zaj xu'u bénneache, ne chee' xelexexune' benne' ca' zaj xu'e xízrawe'. <sup>2</sup> Na' gusel-le' le' chee' xuluzenne' bénneache ca dxenná bea Dios, ne chee' xelexexune' benne' zaj xu'e xízrawe' ca'. <sup>3</sup> Na' guzre' le':

—Quebe bi gúale chee' la neza. Quebe gúale xaga da guchíchele, na' xixruj cheele, ne da gágule, ne dumí. Le gua' tu cue'ze zra lánale. <sup>4</sup> Gáteteze xu'u naga chú'ule, le xegá'ana na' cadxa zrin zra xeza'ale lu xezre na'. <sup>5</sup> Naga quebe xelezí'e dizra' guchálajle le', le xedxúaj xezre na', ne le cuibe



bxrte xu da da' ní'ale, da gulé'e na zaj nabague' zria lau Dios.

<sup>6</sup> Nadxa beledxúaje', na' ca naca xézredu ca' xea-jlechálaje' dizra' chawe' chee Dios, ne belexexune' benne' zaj xu'e xízrawe' ca'.

*Ca guca gate gute Juan, benne' bchue' bénneache nisa*

*(Mt. 14.1-12; Mr. 6.14-29)*

<sup>7</sup> Herodes, benne' dxenná be'ene' xezr la xu na', benne' ca naca xúgute da dxun Jesús, na' guzúe' stebe lawe' da dxelenná bal-la benne' ba bebán Juan ládujla benne' gate. <sup>8</sup> Xebal-le' dxelenné' Elías, bénnea' bchálaje' waláz chee Dios ba bele'e, na' xebal-le' dxelenné' ba bebán tu benne' ca' buluchálaje' waláz chee Dios ca ni'te. <sup>9</sup> Herodes gunné':

—Néda'queza' gunná be'eda' nu gudxugu xichaj Juan. ¿Nuzra benne' nigá xca' da zante dxenda' dxune'?

Nadxa Herodes bene' ba xuzre lé'ene' Jesús.

*Jesús dxugawe' chi xun gaxúa benne'*

*(Mt. 14.13-21; Mr. 6.30-44; Jn. 6.1-14)*

<sup>10</sup> Gate belexezrín benne' gubáz ca' chee Jesús lau Le', na' gulé'e Le' ca da ba belune'. Na' Jesús beche'e benne' ca', na' besiá'que' zeajxaque' tu lataj da nagá'ana zitu' naga zaj dxe' xezre ca', naga zua lu xezr la xu chee xezre Betsaida.

<sup>11</sup> Gate benne' xezre na' belenne' zua Jesús na', na' gusiá'que' zjaque' naga zua Le'. Na' Jesús guzú' lu ne'e benne' ca', ne bchálajlene' le' ca dxenná bea Dios, ne bexune' benne' zaj xu'e xízrawe' ca'.

<sup>12</sup> Gate guzú lau zeaj dxezré', na' gulebiga benne' chazrinnu gubáz ca' chee Jesús lau Le', na' gulé'e Le':

—Bze benne' caní dizra' chee chjaque' naga xelasié', ne xelílaje' da xelawe' xézredu ca' zaj nnita gagu, lawe' da ga zúadxu nigá quebe bi de.

<sup>13</sup> Jesús guzre' le':

—Le gunezruj le'e da xelawe'.

Nadxa benne' ca' bele'e Jesús:

—Quebe dedxa cheentu' ca gáxzuga xeta xtíladau', ne chúpaga bela, u ¿wacheajxríquezentu' da xelagu catite benne' zan caní?

<sup>14</sup> Zaj zra ca chi xun gaxúa benne' biu ca' ga na'. Nadxa Jesús guzre' benne' ca' dxusédene':

—Le xe benne' ca' xelebé'e chi xun weaje' tu cue' tu cue'.

<sup>15</sup> Ca'an belune', na' gulebe'e xúgute'. <sup>16</sup> Nadxa Jesús guqué'e da gazxu' xeta xtila ca', ne chupa bela ca'. Na' guchisa lawe' xabaala, ne guzre' Dios "Xcalenu", na' ca bexuzre bzúzruje' na, na' bnézruje' na benne' ca' dxusédene' chee xelisié' na chee benne' zan ca'. <sup>17</sup> Xúgute' gulawe', ne belélaje'. Ca gudé na' bulusuzré'e chazrinnu ga' da bízrujdu ca' belexegá'ana na.

*Pedro dxenné' Jesús naque' Cristo*

*(Mt. 16.13-19; Mr. 8.27-29)*

<sup>18</sup> Tu zra gate zua Jesús dxuchálajlene' Dios naga quebe zaj zra benne' zan ca', na' zrale benne' ca' dxusédene' Le', na' Le' bchebe' benne' ca':

—¿Nuzra dxelenná benne' naca' neda'?

<sup>19</sup> Le' belexechebe':

—Bál-le' dxelenné' nacu' Juan, bénnea' bchue' bénneache nisa, na' xebal-le' dxelenné' nacu' Elías,

bénnea' bchálaje' waláz chee Dios, na' xebal-le' dxelenné' nacu' tu benne' ca' buluchálaje' waláz chee Dios ca ni'ite, na' bebane'.

<sup>20</sup> Nadxa Jesús bchebe':

—Na' le'e, ¿nuzra dxennale naca'?

Na' gunná Pedro:

—Nacu' Cristo chee Dios.

*Jesús dxuzenne' benne' ca' ca gaca gate gatie'*

*(Mt. 16.20-28; Mr. 8.30—9.1)*

<sup>21</sup> Jesús bsebage' benne' ca' quebe nu xelé'e ca'.

<sup>22</sup> Na' guzre' le':

—Neda', Benne' Gulje' Bénneache, dxal-la' téle'a xel-la zi', na' benne' gula sina ca', ne benne' xíchaje' ca' chee bxruze, ne benne' ca' dxuluxuzájle'e da nadxixruj bea na xuluzúe' neda' chalá'ala. Xelútie' neda', san gate gaca chunna zra, na' xebana'.

<sup>23</sup> Ca gudé na' guzre' ca naca benne' zaj zre'e na':

—Che nu benne' dxaca lazre' gaque' neda' tuze, dxal-la' guzúe' chalá'ala xúgute da naca chee', na' gune' neda' tuze xúgute zra, lácala gate benne' na'. <sup>24</sup> Benne' dxaca lazre' gapa chi'e xel-la nabán chee', gunítie' na, san benne' gunítie' xel-la nabán chee' lawe' da naque' chia', wazrué'ene' na. <sup>25</sup> ¿Bizra da ba neza gaca na chee tu benne' che gape' ca naca da de lu xezr la xu nigá, san cuía xi' léqueze'? <sup>26</sup> Che nu benne' xedué'ene' chia' neda', ne chee dizra' chia', cá'aqueze neda', Benne' Gulje' Bénneache, wedué'eda' chee bénnea' gate za'a neda' chee nna be'a nen xel-la szren chee Xra', ne chee gubáz lá'azxa chee xabáa ca'. <sup>27</sup> Da li dxapa' le'e, bál-lale zrale nigá quebe gátele nédxudxa ca lé'ele zra nna bea Dios.

*Gate bcha lu'a lesaca Jesús  
(Mt. 17.1-8; Mr. 9.2-8)*

<sup>28</sup> Ca guzre xi' gudé gunná Jesús da nigá, na' guluéne' tu lu xi'a chee guchálajlene' Dios, na' xjácale Pedro, ne Jacobo, ne Juan Le'. <sup>29</sup> Dxácatē dxuchálajlene' Dios, na' bcha lu'a lesaca Jesús, na' zra lanē' bexaca na da chiche, ne guca tite na. <sup>30</sup> Nadxa bululé'e lau chupa benne' dxuluchálajlene' Jesús. Zaj naque' Moisés ne Elías. <sup>31</sup> Naga zele Jesús benne' ca' gúcatite' legala, na' dxuluchálajlene' Jesús ca gaca gate gatie' Le' xezre Jerusalén. <sup>32</sup> Gulácale'e welase Pedro ne benne' ljwezre' ca', san bulusebán lazre', na' belelé'ene' ca naca xel-la szren chee Jesús, ne chupa benne' ca' zaj zélene' Jesús. <sup>33</sup> Gate benne' ca' belexesiá'que' naga ze Jesús, na' Pedro gunné':

—Benne' Wesede, néquega zúadxu nigá. Benna netu' lataj guntu' chunna xu'u lága'dau', tu chiu', ne tu chee Moisés, ne tu chee Elías.

Pedro quebe dxéquebe'ene' ca da dxenné'. <sup>34</sup> Dxácatē dxenná Pedro caní, na' bla' tu beuj da gucu na naga zaj zre'e, na' belezrebe Pedro, ne benne' ljwezre' ca' gate gulezré'e lu beuj na'. <sup>35</sup> Na' belenne' chi'i nu dxuchalaj lu beuj na', gunná:

—Bi nigá naque' Zri'ina', nazrí'ite lazra'. Le xen da dxuchálajbe'.

<sup>36</sup> Ca gudé belenne' chi'i na', na' belelé'ene' Jesús ba ze' tuze'. Na' benne' caní gulezúe' zrize, na' quebe nu gulé'e ca da belelé'ene'.

*Jesús dxexune' tu bi biu xu'ube' be' xriwe'  
(Mt. 17.14-21; Mr. 9.14-29)*

<sup>37</sup> Gute xu, gate belexexétaje' lu xi'a na', na' benne' zan zjaque' zeajlexrígale' Jesús. <sup>38</sup> Nadxa tu benne' ca' gunné' zizraj, guzre' Jesús:

—Benne' Wesede, dxata' xueda' Lue' dajxú' bi biu chia' lawe' da tu lícha'te bi chia' naca, <sup>39</sup> na' tu be' xriwe' dxaze na lebe', ne dxucuezre xa'a na lebe', ne dxudxixre dxutula na lebe', na' dxebía bźrina' dxú'abe'. Dsusaca zi na lebe', ne quebe dxaca lazre' na gusán na lebe'. <sup>40</sup> Ba guta' xueda' benne' ca' dxusédenu' chee xelexebéaje' na, san quebe gulezéquene'.

<sup>41</sup> Jesús bechebe':

—Le'e, benne' wen chupa lazre', ne wen da calela. ¿Ájate dxal-la' súalena' le'e? ¿Ájate dxal-la' guchaga lawa' nen le'e? Xeajxrí' zri'inu' na' nigá.

<sup>42</sup> Gate bi cuide' na' ba zéajbe' gagu, na' be' xriwe' na' gudín na lebe' xu, ne bdxixre btula na lebe'. Na' Jesús gudil-le' be' xriwe' na', ne bexune' bi cuide' na', na' bdee'-be' lu na' xrabe'. <sup>43</sup> Xúgutē benne' ca' belexebánene' ca naca xel-la szren chee Dios.

*Jesús dxuzenne' benne' ca' xecha lasa ca gaca gate gatie'*

*(Mt. 17.22-23; Mr. 9.30-32)*

Dxácatē na' xúgutē benne' ca' dxelexebánene' ca da dxun Jesús, Le' guzre' benne' ca' dxusédene':

<sup>44</sup> —Le xen xanne' da nigá, ne quebe gal-la lázrele na. Neda', Benne' Gulje' Bénneache, wuludéē neda' lu na' bénneache.

<sup>45</sup> Benne' ca' dxusédene' quebe guléajni'ine' ca da dxenná Jesús lawe' da quebe ne gunézruj Dios lataj xeléajni'ine', na' belezrebe' xelenabe' Jesús guzéajni'ine' le' ca da na' gunné'.

*¿Nuzra naca blau?*

*(Mt. 18.1-5; Mr. 9.33-37)*

<sup>46</sup> Nadxa benne' ca' dxusede Jesús gulezú lawe' dxuluchebe ljwezre' núzraqueze naca blau ládujla le'. <sup>47</sup> Jesús gúquebe'ene' ca' da dxelenné'. Nadxa guqué'e tu bi biúdau', ne bze'-be' cuite', <sup>48</sup> na' guzre' benne' ca':

—Benne' gape' ba lá'ana tu bidu caní lawe' da nazrí'ine' neda', néda'queza' dxape' ba lá'ana, na' benne' dxape' ba lá'ana neda', dxápaqueze' ba lá'ana Dios, Bénnea' nasele' neda'. Cá'anqueze bénnea' nácadxe' benne' dxexruj lazre' ládujla le'e, benne' nigá naque' benne' blau.

*Benne' quebe dxedábage' dxi'u zue' gácalene' dxi'u*

*(Mr. 9.38-40)*

<sup>49</sup> Nadxa Juan guzre' Jesús:

—Benne' Wesede, blé'entu' tu benne' dxuchíne' Lau', dxebéaje' be' xriwe' ca' lu xichaj lázrdau benne' ca', na' gúzrentu' le' quebe gune' ca' lawe' da quebe naque' dxi'u tuze.

<sup>50</sup> Jesús guzre' le':

—Quebe guzágale ca' da dxune' lawe' da benne' quebe dxedábage' dxi'u zue' gácalene' dxi'u.

*Jesús dxedil-le' Jacobo ne Juan*

<sup>51</sup> Gate ba za zrin zra dxal-la' xexíaj Jesús xabáa, ben zi' lazre' chéaje' Jerusalén. <sup>52</sup> Na' gusél-le' gubáz chee' ca' xelebía lawe', na' benne' ca' xjaque' tu xézredau' nababa Samaria chee' cheajlecuéze' naga sua Jesús. <sup>53</sup> Benne' Samaria ca' quebe gulaca lazre' xegá'ana Jesús na', lawe' da guleque bé'ene'

zéaje' Jerusalén. <sup>54</sup> Gate Jacobo ne Juan, benne' ca' dxusede Jesús, belelé'ene' da nigá, na' gulé'e Jesús:

—Xran, ¿dxaca lazru' nna béantu' xetaj xi' da za xabáa chee guzría xi na benne' caní, ca ben Elías, bēnea' bchálaje' waláz chee Dios?

<sup>55</sup> Nadxa Jesús guné'e le', ne gudil-le' le', dxenné':

—Le'e quebe nézele nu be' zúale le'e. <sup>56</sup> Caní naca lawe' da bla' neda', Benne' Gulje' Bēneache, quegá chee guzría xi'a xel-la nabán chee bēneache, san chee gucache chawa' le' na.

Nadxa xjaque' xetú xézredau'.

*Benne' dxelaca lazre' chjácalene' Jesús*

*(Mt. 8.19-22)*

<sup>57</sup> Ca zjaque' lu neza na', tu benne' biu guzre' Jesús:

—Xran, dxaca lazra' sálena' Lue' gáteteze chéaju'.

<sup>58</sup> Jesús bechebe':

—Beza ca' zaj zua bluaj cheeba', na' bxínnedu ca' zaj zria xrú'neba', san neda', Benne' Gulje' Bēneache, quebe bi de ga xrua xíchaja'.

<sup>59</sup> Na' Jesús guzre' xetú benne':

—Ben neda' tuze.

Benne' nigá gunné':

—Xran, benna neda' lataj cheajcáchea' xra'.

<sup>60</sup> Na' Jesús bechebe':

—Be lataj benne' ca' zaj naque' ca benne' gate xulucache' ljwezre', na' lue', guxíaj, xeajchalaj ca dxenná bea Dios.

<sup>61</sup> Nadxa tu benne' xula guzre' Jesús:

—Xran, dxaca lazra' guna' Lue' tuze, san steca, benna neda' lataj xexá'a cheajzéa' dizra' benne' zaj zra' lizra'.

<sup>62</sup> Jesús guzre' benne' na':

—Benne' dxugá'ane' beze, na' nne'e cúzrule', quebe gaca chee bēnea' gunē' zrin chee da dxenná bea Dios.

## 10

### *Jesús dxesel-le' benne' gaxún chi ca'*

<sup>1</sup> Ca gudé na', Xránadxu guquē'e xegaxún chi benne' ca', na' gusél-le' chupa weaje' xelebía lawe' lau Le' xúgute xezre, ne xézredu ca' naga dxal-la' chéaje' Le'. <sup>2</sup> Guzre' benne' ca':

—Da li dxennéa', lina da zren naca na, na' benne' wēn zrin bábaze zaj naque'. Chee le' na' le naba lau Xrane zrin na' sel-le' benne' wēn zrin ca' xelexequē'e lina na'. <sup>3</sup> ¡Le chjaca! Le nna'xque, neda' dxesel-la' le'e, gácale ca zríla'du ca' ládujla becu' xi'a ca'. <sup>4</sup> Quebe gúale xixruj, ne dumí, ne zréale, ne quebe gagale la neza nu guchálajlele. <sup>5</sup> Gate chu'ule tu lu xu'u, na' gugápale diuzre, nnale: “Xel-la dxebeza zri lazre' gaca chee benne' zaj zre'e lu xu'u nigá.” <sup>6</sup> Che zaj zra' na' benne' dxelebeza zri lazre', na' da gunábale gaca chee benne' ca', san che quebe nu chilá' naca caní, le naba quebe gaca da ba gunábale. <sup>7</sup> Le xegá'ana lu xu'u ná'queze, na' le xi'aj le gagu ca da xelunne' lawe' da benne' wēn zrin quebe te le tune'. Quebe cheajsúale tu xu'u xetú xu'u. <sup>8</sup> Gate zrinle tu xezre naga xelez'í lu ne'e le'e, le gagu ca da xelunne'. <sup>9</sup> Le xexún benne' zaj xu'e xízrawe' zaj zre'e na', na' le xe'e: “Xel-la dxenná bea chee Dios ba zua nen le'e.” <sup>10</sup> Che zrinle tu xezre naga quebe xelez'í lu ne'e le'e, le xedxúaj la neza chee xezre na', na' nnale: <sup>11</sup> “Ca naca bxrtedu' da' ní'antu' dxexebí bentu' na chee gaca tu da gulé'e na le'e nabágale zria lau Dios.



Dxal-la' nézele ba bla' ládujla le'e xel-la dxenná bea chee Dios." <sup>12</sup> Dxapa' le'e, ca lu zra guchi'a Dios, da xelezaca benne' zaj zre'e lu xezre nigá gácadxa na xel-la zi' ca da xelezaca benne' xezre Sodoma, xezre na' bzria xi' Dios.

*Da gaca chee xezre naga quebe belune' ca dxenná xrtizra' Dios*  
(Mt. 11.20-24)

<sup>13</sup> Na' gunná Jesús:

—¡Edxugúa le'e, benne' xezre Corazín! ¡Edxugúa le'e, benne' xezre Betsaida! Chela lu xezre Tiro, ne lu xezre Sidón belelé'ene' ca naca xel-la waca chee xabáa da ba gulaca ládujla le'e, gate na'te ba belexebí'i lazre', belácu'e' zra lan'e' tuzruj, ne buluzríe' de xíchaje'. <sup>14</sup> Lu zra guchi'a Dios da dxaca, na' sácadxale le'e xel-la zi' ca da xelezaca benne' Tiro, ne Sidón. <sup>15</sup> Na' le'e, benne' xezre Capernaum, ¿dxéquele waxásale zrín'te'le xabáa? ¡Lataj chúl-lala xétajle!

<sup>16</sup> Nadxa guzre' benne' ca' dxuséden'e':

—Benne' xenne' chee le'e, chia' neda' xenne', na' benne' guzúe' le'e chalá'ala, neda' na' gusaque' ca', na' benne' guzúe' neda' chalá'ala, Dios, Bénnea' gusel-le' neda', guzúe' chalá'ala.

*Dxelexezrín benne' gaxún chi ca'*

<sup>17</sup> Benne' gaxún chi ca' belexezrine' lu xel-la dxelebé, dxelenné':

—Xran, be' xriwe' ca' dxuluzúaqueze na dizra' cheentu' gate dxuchínentu' Lau'.

<sup>18</sup> Jesús guzre' benne' ca':

—Ca' naca, na' neda' ble'eda' da xriwe' bexruj na zran xabáa ca tu xesa da dxajsúa na lu

xu. <sup>19</sup> Neda' ba benna' le'e xel-la dxenná bea chee gulájle be snia ca', ne bexrjni, ne chee guchúchujle duté xel-la dxenná bea chee da xriwe', na' quebe bi seque gune na le'e. <sup>20</sup> Quebe bele lawe' da dxelún be' xriwe' ca dxennale le'e, san le be lawe' da ba naxúaj lalé xabáa na'la.

*Jesús dxebene'*  
(Mt. 11.25-27; 13.16-17)

<sup>21</sup> Lu zra ná'queze gubéle'e Jesús, zúale Be' Lá'azxa Le', na' gunné':

—Dxue lá'ana' Lue', Xrae, Xrane xabáa ne xezr la xu, lawe' da ba blé'enu' benne'du caní da bcácheu' chee benne' sina ca', ne benne' dxeléajni'ine'. ¡Ca' naca, Xrae, lawe' da ca'an guca lazru' Lue'!

<sup>22</sup> 'Xra' ba benne' neda' xúgute. Quegá nu neze nu na' naca Zrí'ine', san tuze Xrá'queza', ne quegá nu neze nu na' naca Xra', san tuze Zrí'inequeze', ne nu benne' ca' dxaca lazre' Zrí'ine' guzéajni'ine' le' Nu na' naca Xre'.

<sup>23</sup> Nadxa guné'e benne' ca' dxusédene', na' guzre' benne' cá'anze:

—Ba neza naca na chee benne' ca' dxelelé'ene' ca da dxelé'ele le'e, <sup>24</sup> lawe' da dxapa' le'e, zánete benne' ca', benne' buluchálaje' waláz chee Dios, ne benne' wenná bea ca' gulaca lazre' xelelé'ene' ca da dxelé'ele le'e, san quebe belelé'ene' na. Gulaca lazre' xelenne' ca da dxenle le'e, san quebe benne' na.

*Da dxulé'e na ca ben benne' Samaria, benne' naque' chawe'*

25 Nadxa tu benne' dxuxuzájle'e da nadxixruj bea Dios bdxúaje', ne guxíaje' xeajchálajlene' Jesús chee gaca guzúa zrie' Le', na' bchebe' Le':

—Benne' Wesede, ¿bizra dxal-la' guna' chee gata' chia' xel-la nabán da zeajlí canna?

26 Jesús bechebe':

—¿Bizra da naxúaj na lu da nadxixruj bea Dios? ¿Aja dxéquenu' da dxulabu'?

27 Bénnea' dxuxuzájle'e da nadxixruj bea Dios bechebe':

—Bzri'i Xranu' Dios dute lárda'u, ne nen dute bénne'du xu'u, ne nen dute xel-la dxun zi' lazre' chiu', ne nen dute xel-la dxulaba lazre' chiu', na' bzri'i le sa' ljwezru' ca nazrí'i cuinu'.

28 Nadxa gunná Jesús, guzre' le':

—Cháwe'le'e bechebu'. Che dxunu' caní, na' gapu' xel-la nabán na'.

29 Bénnea' dxuxuzájle'e da nadxixruj bea Dios guca lazre' gucá'ana chawe' cuine', na' guzre' Jesús:

—¿Nuzra na' le sa' lwezra'?

30 Bechebe Jesús:

—Tu benne' guzé'e Jerusalén, bétaje' zíaje' Jericó. Lu neza na' xu'e, na' gulela gubán le', ne gulebane' ca naca da nape', ne zra lane'. Na' buluzálaje' le', ne besiá'que' zaj nucá'ane' le' ca benne' gate.

31 Nadxa gudé tu bxruze neza na', na' gate blé'ene' le', gudée' chalá'ala. 32 Cá'anqueze gudé na' tu benne' xrtia Leví, benne' dxune' zrin chee xudau', na' gate blé'ene' bénnea', gudée' chalá'ala. 33 Nadxa tu benne' Samaria gudée' neza na', na' gate blé'ene' le' bexache lazre' le'. 34 Gubigue' cuita benne' na', ne btupe' tu da za lu we' chee', ne xrise uva wal-la, na' bchele' na ladxe'. Nadxa bcuene' le' cuzru bea

chee', na' beche'e le' tu lu xu'u naga xegá'ane', ne bxue' le' na'. <sup>35</sup> Zra xula, ca bezá' benne' Samaria na', na' guléaje' chupa dumí da bnézruje' xrane xu'u na', ne guzre' le': "Bxue benne' nigá, na' che ba gucá'adxa xelate' dumí chiu', neda' xexunna' na gate xelá'a."

<sup>36</sup> Nadxa Jesús guzre' benne' dxuxuzájle'e da nadxixruj bea Dios:

—¿Nula benne' chunna caní guque' le sa' ljwezre bénnea' gulela gubán ca'?

<sup>37</sup> Na' gunná bénnea' dxuxuzájle'e da nadxixruj bea Dios:

—Bénnea' bexache lazre' le'.

Nadxa Jesús guzre' le':

—Bexíaj lue', na' gúnquezu' ca'.

### *Jesús dxezrine' lizre Marta ne María*

<sup>38</sup> Jesús bexu'e neza, na' bezrine' tu xézredau', na' lu xezre na' zua tu nu'ula le' Marta, na' gulu'e Jesús lizre'. <sup>39</sup> Marta na', zua tu bi bile' le' María, na' María na' gudxé'e zran ni'a Jesús chee' xenne' da dxuchálaje'. <sup>40</sup> Marta déle'e da dxune', na' bzrine' lau Jesús, ne guzre' Le':

—Xran, ¿quebe dxexache lazru' neda' lawe' da dxucá'ana bi bila' neda' chee' guna' tuza' zrin cheentu'? Guzre-be' gácalebe' neda'.

<sup>41</sup> Jesús bechebe':

—Marta, Marta, dxezéle'enu' gunne xue, ne zu' stebe ca naca chee' da ca' dxunu', <sup>42</sup> san de tuze da dxun na ba xen nu gun. María ba bezrelne' da cháwedxa, na' netú benne' quebe seque' cue' na.

# 11

## *Ca dxal-la' gundxu guchálajlędxu Dios*

*(Mt. 6.9-15; 7.7-11)*

<sup>1</sup> Tu zra Jesús bchálajlęne' Dios tu lataj, na' gate bexuzre bchálajlęne' Dios, na' tu benne' ca' dxusędene' guzre' Le':

—Xran, bsęde netu' guchálajlęntu' Dios, ca ben Juan, bsędene' benne' ca' zaj de'e le'.

<sup>2</sup> Jesús gunné':

—Gate guchálajlele Dios, na' nnale:

Xrantu' Dios, zu' xabáa,  
gaca lá'azxa Lau' Lue'.

Gudá nna be'u.

Gaca ca dxaca lazru' lu xęzr la xu, ca da dxaca xabáa.

<sup>3</sup> Benna cheęntu' da gáguntu' na'a zra.

<sup>4</sup> Bnite lau dul-la cheęntu' ca dxunite launtu' cheę benne' ca' dxelunę' cheęntu' da calęla.

Quebe gu'u lataj da xriwe' cu'u na netu' neza cheę na, na' bselá netu' lu na' da calęla.

<sup>5</sup> Nadxa Jesús guzre' benne' ca':

—Che tu benne' ládujla le'e zua tu ljwezre', na' che zrine' lizre benne' ljwezre' na' dxęla, ne xę'e le': "Bi ljwezra', guleaj neda' chunna xeta xtila

<sup>6</sup> lawe' da zua tu bi ljwezra' za belá'tębe' lizra', na' quebe bi de' chia' gugawa'-be'."

<sup>7</sup> ¿Wechebe benne' ljwezre' na', benne' xu'u lu xu'u: "Quebe gunu' neda' zęde. Naxęzxuj dxa xu'u chia', na' bi chia' zaj debe' nigá. Quebe gaca chasa' bi gunna' chiu'?"

<sup>8</sup> Neda' dxapa' le'e, lácala quebe chase' bi gunęzruje' le' lawe' da naque' ljwezre', san chase' cheę quębedxa gunę' le' zęde, na' gunęzruje' le' ca

naca da nachinnene'. <sup>9</sup> Caní dxapa' le'e:

Le naba, na' Dios gunne' cheeḷe.

Le xexilaj, na' xezrélele.

Le nne dxu'a dxa xu'u, na' xalaj cheeḷe.

<sup>10</sup> Ca' naca na, lawe' da benne' dxenabe', na' si'e, ne benne' dxexílaje', na' xezrélene', ne benne' dxenné' dxu'a dxa xu'u, na' xalaj chee'.

<sup>11</sup> 'Che tu benne' ládujla le'e naque' xra xrna', ¿waca gunézruje' zrí'ine' tu xiaj che nábabe' tu xeta xtila? ¿Waca gunézruje'-be' tu bela' che nábabe' tu bela? <sup>12</sup> ¿Waca gunézruje'-be' tu bérxujni che nábabe' tu zrita? <sup>13</sup> Che le'e nácale benne' wen da caleḷa, na' nézele gunézruje da chawe' chee zrí'inele, ¿quebe nácadxa Xrale zua xabáa li lazre' chee gunne' chee nu benne' nabe' Be' Lá'azxa?

*Dxelenné' napa Jesús xel-la dxenná bea chee da xriwe'*

*(Mt. 12.22-30; Mr. 3.19-27)*

<sup>14</sup> Tu zra Jesús bebéaje' be' xriwe' lu xichaj lázrdau tu benne', da nucá'ana na le' quebe dxaca nnie', na' gate bedxúaj be' xriwe' na', na' benné' bénnea'. Na' benne' ca' belexebánene' chee da nigá.

<sup>15</sup> Na' bal-le' gulenné':

—Benne' nigá dxebéaje' be' xriwe' ca', dxuchíne' xel-la dxenná bea chee Beelzebú, xrane be' xriwe' ca'.

<sup>16</sup> Xebal-la benne' gulaca lazre' gulé'e Jesús xel-la waca chee', na' gulenabe' Le' guné' tu xel-la waca da za xabáa. <sup>17</sup> Le' nézene' ca da dxelaca lazre', na' guzre' benne' ca':

—Che benne' zaj zre'e tu xezre xelaque' chupa la'a, ne xeledil-le', wabía xi' xezre na', na' che benne' tu lu xu'u xelaque' chupa la'a, cá'aqueze welebía xi' benne' ca'. <sup>18</sup> Cá'aqueze, che da xriwe'

ca' xelaca na chupa la'a, ¿ájazra xegá'ana xel-la dxenná bea chee na? Da nigá dxapa' le'e lawe' da dxennéle dxebéaja' be' xriwe' ca', dxuchíneda' xel-la dxenná bea chee Beelzebú da xriwe'. <sup>19</sup> Che caní naca na, ¿nuzra dxunezruj xel-la dxenná bea benne' ca' dxusédele le'e chee xelexebéaje' be' xriwe' ca'? Chee le na', benne' caníqueze dxululé'ene' dxequé zréajele. <sup>20</sup> Na'a che neda' dxebéaja' be' xriwe' ca', dxuchíneda' xel-la dxenná bea chee Dios, da li xel-la dxenná bea chee Dios ba bla' na ládujla le'e.

<sup>21</sup> 'Che tu benne' wal-la nape' da guchínene' lu wedil-la, ne dxuxúequeze' lizre', na' da zra lizre' napa chi'e na. <sup>22</sup> Che za' xetú benne' nácadxé wal-la ca le', ne dxucul-le' le', nadxa que'e ca naca da dxuchínene' lu wedil-la, da na' dxuxrén lazre', na' quisie' da gudapa bénnea'.

<sup>23</sup> 'Benne' quebe zue' gácalene' neda', dxedábage' neda', na' benne' quebe dxexeque'e nen neda' dxúsela bénnea'.

*Be' xriwe' da dxexezrín na lizre na  
(Mt. 12.43-45)*

<sup>24</sup> Gunná Jesús:

—Gate tu be' xriwe' dxedxuaj na lu xichaj lázrdau tu benne', dxedá na lataj naga nabizre dxexilaj na naga sua na xezí' lazre' na, na' gate quebe dxezrele na, na' dxenná na: “Wexá'a lizra' naga bezá'a.” <sup>25</sup> Gate xezrín na, na' le'e na bénnea' naque' ca tu xu'u da nalúa lu'ule na, ne nabá'ate na. <sup>26</sup> Nadxa zexíaj na, zeajxezrí na xegazre be' xriwe' da zaj nácadxá na xriwe' ca le' na, na' ca naca da ca' xelú'u na xelezúa na lu xichaj lázrdau bénnea', na'

naga cheajsete chee benne' na' nácadxa da calela chee' ca da guca chee' nédxula.

*Da ba neza chee bénneache da naca na li lazre'*

<sup>27</sup> Dxácatē Jesús dxenné' da caní, tu nu'ula ládujla benne' ca' gunné' zizraj:

—Ba neza zrentē naca na chee nu'ula na' guzanē' Lue', ne bsegulé' Lue'.

<sup>28</sup> Na' gunná Jesús:

—Ba neza zrendxa naca na chee benne' ca' dx-elenne' ca da dxenná Dios, ne dxunē' ca dxenná dizra' na'.

*Dxelenabe' Jesús gunē' tu xel-la waca da za xabáa*

*(Mt. 12.38-42; Mr. 8.12)*

<sup>29</sup> Benne' ca' ne zaj zre'e cuita Jesús, na' Le' guzú lawē' dxuchálajlene' le', gunné':

—Benne' zaj zre'e lu zra caní zaj naque' benne' wēn da calela, na' dxelenabe' neda' guna' tu xel-la waca da za xabáa, na' québedxa bi xeledé'ene' ca da ble'e Jonás, bēneea' bchálaje' waláz chee Dios.

<sup>30</sup> Ca guca chee Jonás, guque' tu da ble'e na benne' gulezre'e lu xezre Nínive, cá'aqueze neda', Benne' Gulje' Bénneache, gaca' tu da gulé'e na benne' zaj zre'e lu zra na'a zra. <sup>31</sup> Lu zra guchi'a Dios, gate Dios guchi'e chee benne' zaj zre'e lu zra na'a zra, na' chasa nu'ula na' gunná bé'ene' xezr la xu da zua chalá'a naga dxedé gubizra beu' zaga ca', na' gulé'ene' zaj nabaga zria benne' caní, lawē' da nu'ula na' guzē'e zítu'tē chee xenne' ca naca xel-la sina chee Salomón, na' nigá zua tu Benne' nácadxe' blau ca Salomón na'. <sup>32</sup> Lu zra guchi'a Dios, gate Dios guchi'e chee benne' zaj zre'e lu zra na'a zra,



na' xelase' benne' ca' gulezré'e xezre Nínive, na' xululé'ene' zaj nabaga zria benne' caní, lawe' da benne' ca' gulezré'e xezre Nínive belexebí'i lazre' gate Jonás bchálajlene' benne' ca' xrtizra' Dios, na' nigá zua tu Benne' nácadxe' blau ca Jonás na'.

*Da dxusení' lu xichaj lázrdaudxu*

*(Mt. 5.15; 6.22-23)*

<sup>33</sup> Gunná Jesús:

—Netú benne' che dxugale' xi' chee', quebe guzúe' na tu naga nagache, ne quebe gudusie' na tu xi'ina, san guzúe' na sibe chee' xelexe' e benne' ca' xelu'e lu xu'u na'. <sup>34</sup> Xij laudxu zaj naca na ca tu xi' da dxusení na lu xichaj lázrdaudxu. Che xij lau' zaj naca na chawe', ca naca xichaj lázrda'u xu'u na lení', na' che xij lau' quebe zaj naca na chawe', na' xu'u da chul-la lu xichaj lázrda'u. <sup>35</sup> Bxue xanne' ca naca xi' da napu' chee' quebe xexaca na da chul-la. <sup>36</sup> Che ca naca xichaj lázrda'u xu'u na lení', na' quebe bi xu'u da chul-la, na' le'enu' chawe' xúgute ca dxaca gate tu xi' dxusení na lizru'.

*Jesús dxedil-le' benne' xudau' ca'*

*(Mt. 23.1-36; Mr. 12.38-40; Lc. 20.45-47)*

<sup>37</sup> Gate bexuzre bchalaj Jesús, na' tu benne' xudau' fariseo gunné' Le' cheajtawe' xeta lizre'. Na' guxú'u Jesús, gudxé'e dxawe'. <sup>38</sup> Na' benne' fariseo na' bebánene' gate blé'ene' Jesús quebe gudibe ne'e ca da zjácale' benne' judío gate dxelawe' xeta. <sup>39</sup> Xránadxu guzre' le':

—Le'e, benne' fariseo, dxíbele cúzrela zriga', ne xé'ena, san lu'ule na, nazrátete ca naca da ba gulanle, ne da calela da dxunle. <sup>40</sup> Le'e, benne' lázrdau zide', ¿quebe nézele Bénnea' bene' da zua

cúzrela bénqueze' da zua lu'ula? <sup>41</sup> Le gunezruj benne' xache' ca' chee da nápa, na' ca nácale xegá'anale chawe'.

<sup>42</sup> 'iEdxugúa le'e, benne' fariseo ca'! Le'e dx-unézrujle Dios tu cue' chee da chi cue' chee xixru weaj, ne chee binne chee ruda, ne chee xúgute xixre' cuan, san dxuzúale chalá'ala ca naca xel-la wen xrlátaje, ne xel-la zri'i lazre' chee Dios. Da caní dxal-la' gunle, ne quebe gusanle ca da ba dxunle.

<sup>43</sup> 'iEdxugúa le'e, benne' fariseo ca'! Dxaca lázrele gápale lataj blau naga cue'le lu xu'u naga dx-ezrágale, ne dxaca lázrele xelapa benne' le'e ba lá'ana lawe' xi'a ca'.

<sup>44</sup> 'iEdxugúa le'e, benne' dxuluxuzájla'a da nadx-ixruj bea na, ne le'e, benne' fariseo ca', benne' dxelúne' láweze da xrlátaje! Nácale ca xedxu ba ca' da quebe zaj nalá', na' benne' ca' dxeledé' lávela na, ne quebe zaj nézene' da dxululéaje'.

<sup>45</sup> Nadxa gunná tu benne' dxuxuzájle'e da nadx-ixruj bea na, guzre' Jesús:

—Benne' Wesede, gate dxennáu' da nigá, dxennéteu' ca' cheentu'.

<sup>46</sup> Na' Jesús gunné':

—iEdxugúa le'e, benne' dxuluxuzájle'e da nadx-ixruj bea na! Dxugúale bénneache xua da quebe xezele'ne', na' le'e netú zrube názele quebe dxaca lázrele gutale na.

<sup>47</sup> 'iEdxugúa le'e! Dxunle lu'a chee ba ca' chee benne' ca' buluchálaje' waláz chee Dios, benne' ca' belute xra xrtáule. <sup>48</sup> Ca da dxunle dxulé'e na nácale tuze nen da belún xra xrtáule ca'. Benne' ca' belutie' le', na' le'e dxunle lu'a chee ba chee' ca'.

49 'Chee le na' gunná Dios lu xel-la sina chee', gunné': "Wasel-la' naga zaj zra' benne' ca' benne' xelenné' waláz chia', ne gubáz chia' ca', na' bal-le' xelútié', na' xebal-le' xeláu zi' xúzrequeze' le'."

50 Dios gusebague' benne' zaj zre'e lu zra na'a zra ca naca xel-la gute chee xúgute benne' ca' gulenné' waláz chee', benne' gultatíe' lu na' benne' ca' zaj zre'e gate bente' xezr la xu, 51 gate na' tu benne' betíe' Abel, zri'ine Adán, ca bzrinte zra belutié' Zacarías gachaj lávela naga zua lucugu, ne naga zua lataj lá'azxa. Ca'an dxapa' le'e, Dios gusebague' benne' zaj zre'e lu zra na'a zra xel-la gute chee benne' ca'.

52 'jEdxugúa le'e, benne' dxuluxuzájla'a da nadxixruj bea na! Xu'u lu na'le ca naca zren xia chee dxa xu'u naga za xel-la sina, san le'e quebe dxu'ule, ne quebe dxuele lataj xelú'u benne' dx-elaca lazre' xelu'e na'.

53 Gate Jesús guzre' benne' ca' da caní, na' benne' ca' dxuluxuzájle'e da nadxixruj bea na, ne benne' fariseo ca' belezrá'ale'e Le', na' gulezú lawe' dx-elune' Le' zede, na' da zante da buluchebe' Le', 54 na' buluzuzre' che bi nna Jesús chee xelezéquene' xelagu zrie' Le'.

## 12

### *Jesús dxenné' ca naca chee da naca xrlátaje láweze*

1 Ca lu zra na' belezraga zane gaxúa benne' ca', na' dxululéajte ljwezre'. Na' guzú lau Jesús dxé'e benne' ca' dxusédene':

—Le guxúe xanne' cuínale ca naca cua zichaj chee xeta xtila chee benne' xudau' fariseo ca', da naca na da dxulé'e na láweze da xrlátaje chee

benne' ca'. <sup>2</sup> Quebe bi de da dxundxu bagácheze da quebe gulé'e lawe', ne quebe bi de da naga che da quebe nu neze. <sup>3</sup> Chee le na', xúgute da gunle lu da chul-la, xululé'e lawe' te zra, na' da gunle bagácheze lu xu'u naga naxézxujte dxa xu'u, wénqueze na lau xúgute bénneache.

*Nu dxal-la' zrébedxu  
(Mt. 10.28-31)*

<sup>4</sup> Na' gunná Jesús:

—Dxapa' le'e, bi ljuéwé'ra'du ca', quebe dxal-la' zrébele benne' dxelute be'la' dxen chee bénneache, san gate te na', québedxa xelezéquene' bi xelune'. <sup>5</sup> Na'a dxapa' le'e nu dxal-la' zrébele. Le zrebe Bénnea' gate te xequé'e xel-la nabán chee bénneache, nape' xel-la dxenná bea gudé' bénneache ca' lataj ba xa'. Awe', Le' le zrebe.

<sup>6</sup> '¿Quebe ta'u gazxu' bxínnedau' lawe' chupa dumí lásedau'? Dios quebe dxal-la lazre' netú bxínnedu ca'. <sup>7</sup> Cá'anqueze xicha xíchajle le'e xúgute na zaj nababa na lau Dios. Chee le na' quebe zrébele. Zácadxale le'e ca be zante bxínnedu ca'.

*Benne' dxelexechebe' zaj naque' chee Jesús  
(Mt. 10.32-33; 12.32; 10.19-20)*

<sup>8</sup> Na' gunná Jesús:

—Dxapa' le'e, xúgute benne' xelexechebe' zaj naque' chia' neda' lau bénneache, cá'anqueze neda', Benne' Gulje' Bénneache, xechébequeza' chee benne' ca' lau gubáz chee xabáa ca' chee Dios, <sup>9</sup> san benne' ca' quebe xelexechebe' chia' lau bénneache, néda'queza' quebe xechéba' chee lau gubáz chee xabáa ca' chee Dios.

10 'Che nu benne' bi nnie' chia' neda', Benne' Gulje' Bénneache, gunite lau Dios chee', na' benne' nnie' chee Be' Lá'azxa, quebe gunite lau Dios chee bénnea'.

11 'Gate xeleché'e le'e lau benne' xíchaje chee xu-dau', u lau benne' dxuchi'e da dxaca, u lau benne' xu'u lawe', quebe cue'le gunne xue bi xechébele u bi nnale, 12 lawe' da gate zrin zra dxal-la' nnele, Be' Lá'azxa gulé'ene' le'e da dxal-la' nnele.

*Da stebe chee xel-la gunní'a*

13 Tu benne' ládujla benne' ca' guzre' Jesús:

—Benne' Wesede, guzre bi bicha' gúnnabe' chia' da xexal-la' chee da guca chee xrantu'.

14 Jesús guzre'-be':

—Benne', ¿zua nu bzua neda' ca benne' dxuchi'e da dxaca u ca benne' le'e xezr la xu?

15 Nadxa guzre' benne' ca':

—¡Le na' xque! ¡Le guxúe xanne' cuínale chee quebe gucúdele! Xel-la nabán chee nu benne' quebe zua na lu da nápalé'e.

16 Nadxa bchalaj Jesús da dxulé'e nigá, gunné':

—Guzúa tu benne' gunní'a, na' xezr la xu chee' bnézrujle'e na. 17 Na' benne' gunní'a na' guzú lawe' dxenné': ¿Bizra guna'? Québedxa de naga guzrá'a lina chia' nigá. 18 Nadxa dxenné': “¡Ba nezda' ca da guna'! Guchínnaja' naga dxezrá' lina chia', chee guna' da zrí'adxa, na' guzrá'a na' ca naca lina chia' nigá, ne ca naca da ba napa'. 19 Nadxa nníqueza' néda'queza': Ba déle'e chiu' da zante chee zane' iza. Bezí' lazre'. Güe'e gudagu, ne gubé.” 20 Na' Dios guzre' bénnea': “Lue', benne' zide', lu zre' na'a zre' gatiu', na' da nuzrá' chawu', quebe nézenu' nu chee

gaca na.” <sup>21</sup> Ca'an dxaca chee benne' dxutupe' xel-la gunní'a da gaca cheéqueze'. Naque' ca tu benne' xache' lau Dios.

*Dios dxuxúe' bi chee' ca'*  
(Mt. 6.25-34)

<sup>22</sup> Ca gudé na', Jesús guzre' benne' ca' dxusédenē':

—Dxapa' le'e, quebe cue'le gunne xue ca naca da gágule chee gaca banle, ne ca naca zra lánale da gácule. <sup>23</sup> Xel-la nabán cheele zácadxa na ca da gágule, na' bel-la' dxen cheele zácadxa na ca zra lánale. <sup>24</sup> Le nna'xque ca dxaca chee bxínnedu ca'. Quebe dxelázaba', ne quebe dxelelápaba', ne quebe zaj zua naga dxuluxuzraba', na' Diósqueze' dxuxi'aj dxugawe'-ba'. Zácadxale le'e ca bxínnedu ca'. <sup>25</sup> ¿Núlale le'e séquele gusetunna cuínale xetú ben lawe' da dxebé'le'ele gunne xue? <sup>26</sup> Che quebe gaca gunle tu da naca da dauze, ¿bizr chee na' dxebe'le gunne xue chee da ca' xezícala?

<sup>27</sup> 'Le nna'xque ca dxelegula xiaj xrtandu ca'. Quebe dxelún na zrin, ne quebe dxelún na du ladxe', na' dxapa' le'e, wenná bea Salomón quebe gucue' da xrtandxa ca tu xiajdu caní. <sup>28</sup> Che Dios dxugacue' caní xixre'du ca', da zaj zua na'a le'e xixre', na' wxre xelezxe na, ¿quegá gundxe' cheele le'e, benne' dxeléajle'e láteze chia'? <sup>29</sup> Chee le na', quebe cue'le gunne xue ca naca da gágule, u ca naca da xí'ajle, ne quebe súale stebe. <sup>30</sup> Ca' naca na, lawe' da ca naca benne' ca' zaj zre'e xezr la xu dxelexíajē' ca naca da caní, san le'e, zua Xrale xabáa ba nézene' nachínnele ca naca da caní. <sup>31</sup> Le

cue' gunne xue nna bea Dios lu xichaj lázrdaule, na' sile ca naca da caní.

*Da gunní'a da dxegú'u cháwedxu xabáa*  
(Mt. 6.19-21)

<sup>32</sup> Na' gunná Jesús:

—Quebe zrébele, zríla'du chia', bábaze nácale le'e. Xrale Dios dxezaca ba lazre' gunne' cheele lataj naga dxenná be'ę. <sup>33</sup> Le gute da nácale, na' le gunezruj benne' xache' ca'. Ca'an gaca, guzrale na naga quebe te cheę na, na' gápale da gunní'a xabáa da quebe xedú, naga quebe gaca chu'u gubán, ne quebe gaca xelú'u béadu ca' xuluteba' na. <sup>34</sup> Naga nuzúale xel-la gunní'a cheele, na' súaqueze lázrdaule.

*Dxal-la' gupá'a cuínadxu*

<sup>35</sup> Na' gunná Jesús:

—Le gupá'a cuínale, ne le gugala xi' cheele. <sup>36</sup> Le gaca ca benne' wen zrin ca' dxelebeze' xrane' xezrine' lu laní cheę wechaga na', na' nne' dxu'a dxa xu'u na'. <sup>37</sup> Ba neza zrente naca na cheę benne' wen zrin ca', benne' ca' xedajxraca xrane' le' dxelenaze' gate xezrine'. Da li dxapa' le'e, xrane' na' cueche' benne' ca' xelawe', na' guzúa cuine' cheę que'ę da xelagu benne' wen zrin ca'. <sup>38</sup> Lácala xezrine' dxela u dxanı'sise', che xedajxraque' le' dxelennaze', ba neza naca na cheę benne' wen zrin ca'. <sup>39</sup> Dxal-la' nézele da nigá, che xrane xu'u gunézene' bi zra zrin gubán, na' quebe gasie' cheę quebe gu'ę lataj quíduje' lizre' cheę cuane' da nape'. <sup>40</sup> Cá'anqueze le'e, le sua ban lazre', lawe' da gate québela nézele, xelá'a neda', Benne' Gulje' Bénneache.

*Benne' wen zrin li lazre', ne benne' wen zrin  
quebe naque' li lazre'*

*(Mt. 24.45-51)*

<sup>41</sup> Nadxa Pedro bchebe' Jesús:

—Xran, ¿bchálaju' da dxulé'e nigá chee netu'ze,  
che chee xúgute benne'?

<sup>42</sup> Xránadxu gunné':

—¿Nuzra naca wen zrin li lazre', bénnea' dx-  
ucá'ana xrane' lu ne'e benne' zaj zra' lizre' chee  
gunézruje' da xelagu benne' ca' gate zrin zra chee  
na? <sup>43</sup> Ba neza naca na chee benne' wen zrin  
na', gate xezrín xrane', xedajxraque' le' dxune' ca  
da nabague'. <sup>44</sup> Da li dxapa' le'e, xrane' gucá'ane'  
lu ne'e xúgute da nape'. <sup>45</sup> Che benne' wen zrin  
na' dxéquene' wazré xrane' xelé'e, ne su lawe'  
gusaca zi'e benne' wen zrin xezica ca', ne nu'ula  
wen zrin ca', ne su lawe' xi'aj gawe', ne súzrene',  
<sup>46</sup> nadxa xrane' xelé'e lu zra quebe dxebeze' le',  
ne lu zra quebe nézene', na' gusaca zí'le'e le', ne  
chugue' chee' saque' ca xelezaca benne' ca' quebe  
zaj naque' chee Dios.

<sup>47</sup> Benne' wen zrin na' nézene' ca da dxaca lazre'  
xrane' san quebe nucueze', ne quebe dxuzúe'  
dizra', benne' nigá gudé'e le' ba xa'. <sup>48</sup> Benne'  
wen zrin na' quebe nézene' da na', ne dxune' da  
dxusebaga na le' zria, benne' nigá té'e láteze xel-la  
zi'. Che tu benne' dxezí'le'e da dxunezruj Dios le',  
Dios wanábale'e le', na' bénnea' Dios nuxrén lazre'  
le' da zrente, Dios wanné xúle'e'ne' le'.

*Dxelaca benne' chupa la'a ne chee Jesús*

*(Mt. 10.34-36)*

<sup>49</sup> Na' gunná Jesús:



—Neda' bla'a guzrena' xi' lu xezr la xu nigá, na' la guzreda' ba dxala xi' na'. <sup>50</sup> Dخال-la' chu'a lu xel-la gute ca dxu'u tu benne' lu nisa gate dxedxúe' nisa, na' téle'a xel-la zi' cadxa gácatequeze na. <sup>51</sup> ¿Dxéquele le'e za' neda' cu'a xel-la dxebeza zri lazre' lu xezr la xu nigá? Dxapa' le'e: Cabí. Za'a chee' guna' benne' chupa la'a. <sup>52</sup> Na'a su lau, gazxu' benne' zaj zre'e tu xu'u xelaque' chupa la'a. Chunne' xeledábage' chupe', na' chupe' xeledábage' chunne'. <sup>53</sup> Xra tu bi biu tábage' bi biu chee', na' bi biu na' tábagabe' xrabe'. Xrna tu bi nu'ula tábage' bi nu'ula chee', na' bi nu'ula na' tábagabe' xrnabe'. Tau zri'ine tu nu'ula tábage' zru'a lizre', na' zru'a lizre' na' tábage' tau zri'ine'.

*Da dxululé'e na ca da gaca lu zra na'a zra*  
(Mt. 16.1-4; Mr. 8.11-13)

<sup>54</sup> Na' Jesús guzre' benne' ca':

—Gate le'e dxelé'ele da' beuj naga dxebía gu-bizra, na' dxennale, waca xiuj, ne ca' dxaca. <sup>55</sup> Gate dxaca be' za na chala'a naga dxedé gubizra beu' zaga ca', na' dxennale waca da la, ne dxaca ca'. <sup>56</sup> Le'e, benne' dxunle láweze da xrlátaje. Le'e nézele nnale ca da gaca zran xabáa, ne lu xezr la xu nigá, san quebe dxezéquele xuzájla'ale da dxululé'e na ca gaca chee'le lu zra na'a zra.

*Dخال-la' xezúadxu lu xel-la dxebeza zri lazre' nen benne' dxedábage' dxi'u*  
(Mt. 5.25-26)

<sup>57</sup> Na' gunná Jesús:

—¿Bizr chee' na' quebe dxeque be'ele da naca xrlátaje? <sup>58</sup> Che nu benne' dxaca lazre' guzúe' lue' lau benne' dxuchi'e, na' gate chéajlenu' le'

chee zrinle lau bēnnea', bēn ba xen xezú' lu xel-la dxebeza zri lazre' nen bēnnea' dxácatē xu'ule neza, chee quebe che'e lue' lau bēnnea', na' bēnnea' gudé'e' lue' lu na' benne' gusézxuje' lue' lizre xia. <sup>59</sup> Dxapa' lue' quebe xedxúaju' na' cadxa quízruju' ca da dxebagu'.

## 13

### *Dxal-la' xelexebí'i lazre' bēnneache*

<sup>1</sup> Ca lu zra na' belezrín bal-la benne' lau Jesús, na' buluzenne' Le' ca bēn Pilato, betie' bal-la benne' Galilea, na' bchaguē' dxen chee benne' ca' nen dxen chee bē xixre', bea ca' ba belutie' chee xu-luzrīē' dxen chee na lau Dios. <sup>2</sup> Na' Jesús guzre' le':

—¿Dxéquele le'e caní gulezaca benne' ca' lawe' da zaj nácadxē' benne' dul-la ca benne' ca' xezícala zaj zre'e xezre ca' zaj nababa Galilea? <sup>3</sup> Dxapa' le'e: Cabí, na' che quebe xebí'i lázrele le'e, xúgutele le'e cuía xile. <sup>4</sup> ¿Dxéquele le'e benne' chinu chunna ca' gulate' gate guzría cha xu'u sibe le' da nazí le na Siloé zaj nabáadxē' dul-la ca xezícala benne' ca' zaj zre'e xezre Jerusalén? <sup>5</sup> Dxapa' le'e: Cabí, na' che le'e quebe xebí'i lázrele, cá'anqueze le'e wabía xile.

### *Xaga higo da quebe dxebía na da zixre*

<sup>6</sup> Nadxa Jesús bchálajlēnē' benne' ca' da dxulé'e nigá, dxenné':

—Tu benne' zua tu xaga higo chee' zua na lu xezr la xu chee', na' xeajné'e na che zría na, na' quebe bi bezrélenē'. <sup>7</sup> Nadxa guzre' benne' dxun zrin lu xezr la xu chee': “Gunná'xque, chun ízate ba bida' dxenná'a che zria xaga nigá, ne quebe bi bezréleda'. ¡Guchugu na! ¿Bizr chee' na' nulán na

xezr la xu nigá?” <sup>8</sup> Bénnea' dxun zrin chee xezr la xu na' bechebe': “Xran, bca'ana na xetú iza na'a. Guzúlujdxa' zran na, ne cua'a na bebe. <sup>9</sup> Nen da na', gúnnalja na, san che cabí, na' chugu' na.”

*Jesús dxexune' tu nu'ula nalegu cuzre'*

<sup>10</sup> Gate naca zra dxulupá'ana judío ca', na' zua Jesús tu lu xu'u naga dxelezraga judío ca' dxusédene' benne' ca', <sup>11</sup> na' zua na' tu nu'ula xu'e we' ba guca chinu chunna iza. Tu be' xriwe' nun na le' cuzru legu, na' quebe dxácaqueze' xelíe'.

<sup>12</sup> Gate ble'e Jesús le', na' gunné' le', ne guzre' le':

—Nu'ula, ba bexacu' chee xízrawe' chiu'.

<sup>13</sup> Nadxa guxrúa ne'e nu'ula na', na' la ná'queze nu'ula na' belite', na' guzú lawe' dxue lá'ane' Dios.

<sup>14</sup> Na' benne' xíchaje chee xu'u na' bzre'e lawe' da bexún Jesús nu'ula na' lu zra dxulupá'ane', na' guzre' benne' zaj zre'e na':

—Xrupa zra dxal-la' gundxu zrin. Lu zra ca' waca xídale xexácale, quegá lu zra dxupá'anadxu.

<sup>15</sup> Nadxa Xránadxu bechebe':

—Le'e, benne' dxelún láweze da xrlátaje, ¿quebe dxesézrele le'e bezre chee u burro chee lu zra dxupá'anadxu chjua'le-ba' xelé'ajba' nisa? <sup>16</sup> Nú'ula nigá naque' xrtia Abraham, na' da xriwe' nuchéaj na le' lu xízrawe' nigá ba zeaj chinu chunna iza, na' ¿quebe dxal-la' xebéaja' xízrawe' da nuchéaj na le' lu zra dxupá'anadxu?

<sup>17</sup> Gate gunná Jesús da nigá, xúgute benne' dxeledábague' Le' belexedué'ene', na' xúgute benne' xezícadxa gulebene' gate belelé'ene' ca naca da zrente da dxun Jesús.

*Da dxulé'e na ca naca chee binnedau' chee mostaza*

*(Mt. 13.31-32; Mr. 4.30-32)*

<sup>18</sup> Nadxa gunná Jesús:

—¿Aja naca xel-la dxenná bea chee Dios, ne bi gutil-le lébeda' na? <sup>19</sup> Naca na ca tu binnedau' chee mostaza, tu benne' dxaze' na lu xezr la xu chee', na' dxegula na, ne dxácatę na ca tu xaga zren, na' bxínnedu ca' dxuluzríaba' xrú'uneba' lu zruze na ca'.

*Da dxulé'e na ca naca chee cua zichaj chee xeta xtila*

*(Mt. 13.33)*

<sup>20</sup> Cá'unqueze gunná Jesús:

—¿Bizra gutil-le lébeda' xel-la dxenná bea chee Dios? <sup>21</sup> Naca na ca cua zichaj chee xeta xtila tu nu'ula dxuchague' na chunna xaga de xezaj, na' dxuchazra na ca naca cua na'.

*Dxa xu'u lechide'*

*(Mt. 7.13-14, 21-23)*

<sup>22</sup> Dxácatę xu'u Jesús neza zexíaje' xezre Jerusalén, dxusédene' bėnneache lu xezre ca', ne xėzredu ca' naga dxedėe'. <sup>23</sup> Na' bchebe tu benne' Lę':

—Xran, ¿bábaze benne' xeelá?

Bechebe Jesús:

<sup>24</sup> —Le gun ba xuzre chu'ule dxa xu'u lechide', lawe' da dxapa' le'e, benne' zan xelaca lazre' xelu'e na', na' quebe xelezėquenę'. <sup>25</sup> Ca te na' chasa xrane xu'u, ne gusėzxuję' dxa xu'u, na' le'e zrale chalė'ajla nnele dxu'a dxa xu'u na', nnale: “Xran, gusalaj chų'untu'.” Na' lę' xechębe': “Quebe nezda' ga benne' le'e.” <sup>26</sup> Nadxa su láuquezle le'e nnale: “Gü'e gudágulęntu' lue', na' lue' bsėdenu'

lu neza cheentu' ca'." <sup>27</sup> Le' xechebe': "Dxapa' le'e, quebe nezda' ga benne' le'e. Le cuasa cuita' neda', xúgutele le'e dxunle da calela." <sup>28</sup> Na' cuézrele, ne xagu xá'ate lázxale gate lé'ele Abraham, ne Isaac, ne Jacob, ne xúgute benne' ca' gulenné' waláz chee Dios, zaj zué' naga dxenná bea Dios, na' le'e zrale chalé'ajla. <sup>29</sup> Welelá' benne' zaj zre'e dapa saca chee xezr la xu nigá, na' xelebé'e xelawe' naga dxenná bea Dios. <sup>30</sup> Nadxa bal-la benne' zaj naque' bzébedxa na'a xelaque' benne' blau, na' benne' zaj naque' blau na'a xelaque' bzébedxa.

*Dxebezre Jesús chee xezre Jerusalén  
(Mt. 23.37-39)*

<sup>31</sup> Lu zra ná'queze, belezrín lau Jesús bal-la benne' fariseo ca', na' gulé'e Le':

—Bezá' nigá, lawe' da dxaca lazre' Herodes gutie' Lue'.

<sup>32</sup> Jesús bechebe':

—Le chjaca cheajguézrele benne' wilaj lazre' calela na': "Na'a, ne wxre xebéaja' be' xriwe' ca' lu xichaj lázrdau benne' ca', ne xexuna' benne' we' ca', na' wizraj sueda'." <sup>33</sup> Dxun na ba xen chéajlena' neza chia' na'a, ne wxre, ne wizraj, lawe' da quebe gaca gate tu benne' dxenné' waláz chee Dios che quebe xelute benne' Jerusalén le'.

<sup>34</sup> "Jerusalén, Jerusalén, le'e na' dxútele benne' dxelenné' waláz chee Dios, ne dxuzríale xiaj benne' gubáz ca' dxesel-la Dios. Zane' lasa guca lazra' gutupa' bi chee ca' ca dxun bedxuj, dx-utúpaba' bédxujdu ca' zran xrílabá, san quebe guca lázrele. <sup>35</sup> ¡Le nna'xque, na'a! Lízrele le'e xegá'ana na cá'aze. Dxapa' le'e québedxa xelé'ele neda' ca

zrindxa zra nnale: ¡Lá'azxa naca Bénnea' ze'e lu La Xránadxu!"

## 14

*Jesús dxexunę' tu benne' de xi' ca naca bęł-la' dxen cheę'*

<sup>1</sup> Tu zra dxulupá'ana benne' judío ca' guxíaj Jesús zeajtawę' lizre tu benne' blau cheę benne' fariseo ca', na' benne' fariseo ca' dxuluzuzrę' Jesús bi gunę'. <sup>2</sup> Zúaqueze lau Jesús tu benne' de xi' ca naca bęł-la' dxen cheę'. <sup>3</sup> Nadxa Jesús bchebę' benne' ca' dxuluxuzájle'e da nadxixruj bea na, ne benne' fariseo ca', gunnę':

—¿Waca nu benne' xexunę' benne' wę' lu zra dxupá'anadxu, che cabí?

<sup>4</sup> Benne' ca' gulezúę' zrize. Nadxa Jesús guquę'e benne' wę' na', ne bexunę' le', na' guzrę' le' xexíaję'.

<sup>5</sup> Nadxa guzrę' benne' fariseo ca':

—¿Núlale le'e, che bęzre cheęle u bia cheęle bíxreba' tu lu xędxu, quebe xebéajle-ba' zra ná'queze lácala naca zra dxupá'anadxu?

<sup>6</sup> Quebe bi guca xelexechebę'.

*Benne' zaj zrę'e laní cheę wechaga na'*

<sup>7</sup> Gate ble'e Jesús ca dxelún benne' ca', dxelebéę lataj blaudxa ga dxelawę', na' bchálaję' da dxulé'e na, dxennę':

<sup>8</sup> —Gate tu benne' dxennę' lue' laní cheę wechaga na', quebe cue'u lataj blau, lawe' da che wazá tu benne' nácadxę' blau ca lue', <sup>9</sup> na' bénnea' gunnę' dxúpatęle xidę' xę'e lue': “Bnezruj lataj nigá benne' nigá.” Nadxa gun na ba xen xexíaju' lataj bzébedxa lu xel-la stu'. <sup>10</sup> Na'a, gate nu

benne' nne' lue', gudxé'e lataj bzébedxa, chee gate za bēnea' gunné' lue', wanné': "Bi ljwezra, gude nigala naga nácadxa blau." Ca'an gaca, xegá'anu' szren lau benne' ca' zaj zre'e dxelágulene' lue'.  
 11 Benne' dxucá'ana szren cuine', wexéxrujla bēnea', na' benne' dxucá'ana baxache' cuine' wegá'ana szrénqueze'.

12 Nadxa Jesús guzre' benne' na' gunné' Le':

—Gate gunézruju' tu zrue u tu xrche' quebe nneu' bi ljwezru' ca', ne bi bichu' ca', ne xrtia ljwezru', ne benne' walíZR chiu' ca' zaj nape' da gunní'a, lawe' da benne' caní welennéqueze' lue', na' zrué'eequeznu' da xelexexunne' chiu'. 13 Gate dxunu' tu laní, gunné benne' xache' ca', ne benne' zaj nadxugu ní'a ne'e, ne benne' zrinnaj ca', ne benne' la chul-la ca'. 14 Caní gaca tu da ba neza chiu', lawe' da benne' caní quebe gaca xelexexunne' ca' chiu', na' wazrué'enu' lazruju' gate xelexebán benne' xrlátaje ca'.

*Da dxulé'e na ca naca chee tu xrche' zren*

15 Gate ben tu benne' dxágule Le' da na', na' guzre' Jesús:

—Ba neza zrente naca na chee benne' gawe' xeta naga dxenná bea Dios.

16 Jesús guzre' le':

—Tu benne' gulu'e tu xrche' zren, na' gunné benne' zan. 17 Ca bzin zra xelawe' xrche' na', gusél-le' wen zrin chee' chee' cheajezre' benne' ca' gunné': "Le da, lawe' da ba nuseni'a da gágudxu."  
 18 Xúgute' gulezú lawe' dxelenabe' gu'e le' lataj quebe xelide'. Benne' nedxu gunné': "Za bezítea' tu cue' xezr la xu chia', na' dxal-la' cheajnná'a na.

Dxata' xueda' lue' si zrenu' chia'." <sup>19</sup> Xetúe' gunné': "Za bezítea' gazxu' cue' bezr chia', na' guxúa' aja xelunba'. Dxata' xueda' lue' si zrenu' chia'." <sup>20</sup> Na' xetúe' gunné': "Za bchágate' na'a, na' quebe gaca xida'." <sup>21</sup> Gate bezrín benne' wēn zrin na', guzre' xrane' ca naca da nigá. Nadxa bzra'a xrane' na', na' guzre' wēn zrin na': "Guxíaj na'a la neza ca', ne neza chee xezre nigá, na' xeajxrí' xúgute' benne' xache' ca', ne benne' zaj nadxugu ni'a ne'e, ne benne' zrinnaj ca', ne benne' la chul-la ca'." <sup>22</sup> Ca gudé na' gunná benne' wēn zrin na': "Xran, ba bēna' ca gunnáu', na' ne dēdxa lataj." <sup>23</sup> Nadxa gunná xrane' na': "Guxíaj na'a la neza ca', ne neza lásedu ca', na' xeajén ba xen xeelé'e, chee cha' lizra' nigá. <sup>24</sup> Dxapa' le'e, netú benne' ca' gunnéa' nédxula quebe xelawe' xrche' chia'."

*Xel-la zi' da te benne' chéajlene' Jesús*

<sup>25</sup> Benne' zan zjácalene' Jesús, na' Le' bexéchaje', na' guzre' benne' ca':

<sup>26</sup> —Che nu benne' ze'e naga zua', ne quebe guzúe' chalá'ala xre', ne xrne'e, ne zru'ule', ne zrí'ine' ca', ne bi biche' ca', ne bi zane' ca', ne xel-la nabán chee', quebe gaca gaque' neda' tuze. <sup>27</sup> Benne' quebe sá'lene' neda' lácala dxal-la' te'e xaga béguaj, quebe gaca gaque' neda' tuze. <sup>28</sup> Che tu benne' ládujla le'e dxaca lazre' gunē' tu xu'u sibe, ¿quebe cue'e nedxu gunē' xrbaba chee' che wazúene' xuzrte' na? <sup>29</sup> Che quebe gunē' caní, ne che cueche' lane na, na' ca te na' quebe suene' xuzre' na, na' xúgute' benne' xeelé'ene' na xelezú lawe' xelún le' chee' bēnea', <sup>30</sup> na' xelenné': "Benne' nigá guzú lawe' dxune' tu xu'u. Quebe



guque' gunē' ca naca.” <sup>31</sup> Che tu benne' wenná bea dxal-la' cheajtíl-lalēne' xetú benne' wenná bea, ¿quebe cue'e gunē' xrbaba chee' che wazúene' nen tu gaxúa gaxúa benne' dxjaque' wedil-la cheajtíl-lalēne' bēneea' za' nen chupa gaxúa gaxúa benne' dxjaque' wedil-la? <sup>32</sup> Che quebe séquene', gate benne' wenná bea na' xetú ne ze'e zitu', na' sel-le' gubáz chee' ca' xelenabē' gata' xel-la dxebeza zri lazre'. <sup>33</sup> Ca' naca na, núteteze benne' ládujla le'e, che quebe gusanē' ca naca da nape', quebe gaca gaque' neda' tuze.

*Zede' da québedxa naca na sna'a*

*(Mt. 5.13; Mr. 9.50)*

<sup>34</sup> Na' gunná Jesús:

—Zede' naca na da chawe', san che québedxa naca na sna'a, ¿ájazra guchínedxu na? <sup>35</sup> Quebe gaca guchínedxu na, quegá chee' gucá'ana cháwedxu xezr la xu, ne quegá chee' guchíxredxu bebe, san dxal-la' chú'unadxu na. Benne' ca' zaj zua nague', dxal-la' xelenne'.

## 15

*Ca guca chee' tu zrila' guníteba'*

*(Mt. 18.10-14)*

<sup>1</sup> Benne' zante' benne' wechizruj waláz chee' Roma, ne benne' dul-la ca' gulebigue' naga zua Jesús chee' xelenne' da dxuchálaje'. <sup>2</sup> Chee' le' na' benne' fariseo ca', ne benne' dxuluxuzájle'e da nadxixruj bea na gulezí tizre' Jesús, gulenné':

—Benne' nigá dxunē' tu zren benne' dul-la ca', ne dxágulēne' le'.

<sup>3</sup> Nadxa bchalaj Jesús da dxulé'e na, gunné':

4 —Nu benne' ládujla le'e, che nape' tu gaxúa zrila', na' nite tuba', ¿quebe gucá'ane' xetápalalaj chennu zrila' ca', bea ca' zaj zraba' le'e xixre', na' se'e cheajdílaje' bea na' guníteba' cadxa xezrelne'-ba'? 5 Na' gate xezrelne'-ba', bene', na' xequé'e-ba' xexrúe'-ba' xe'a xene'. 6 Na' ca xezrine' lízre', gutupe' ljwezre' ca', ne benne' walizre chee' ca'. Na' xe'e le': “Le be nen neda', lawe' da bezrelda' zrila' chia' guníteba'.”

7 Na' gunná Jesús, dxē'e benne' ca':

—Cá'anqueze zúale'edxa xel-la dxebé xabáa gate tu benne' dul-la dxexebí'i lazre', quézcala chee' tápalalaj chennu benne' xrlátaje ca' dxeléquene' quebe dxun na ba xen xelexebí'i lazre'.

### *Ca guca chee tu dumí da gunite*

8 Nadxa Jesús bchálaje' xetú da dxulé'e na, dxē'e benne' ca':

—Tu nu'ula nape' chi dumí zaca, na' che nite tu na, nadxa guzúe' xi' chee' chee' gusaní na lu xu'u chee'. Nadxa su lawe' gulúe' lu xu'u chee', xexílaje' bínalu ca xezrelne' dumí chee' da gunite na. 9 Na' ca xezrelne' dumí na', gutupe' nu'ula ljwezre' ca', ne nu'ula walíZR chee' ca', na' xe'e le': “Le be nen neda', lawe' da bache bezrelda' dumí chia' da gunite na.”

10 Na' gunná Jesús, dxē'e benne' ca':

—Cá'anqueze dxebé gubáz chee' xabáa ca' chee' Dios gate tu benne' dul-la dxexebí'i lazre'.

### *Ca guca chee zri'ine tu benne' gunítebe'*

11 Nadxa Jesús bchálaje' xetú da dxulé'e na, dxē'e le':

—Tu benne' zaj zra' chupa bi chee'. <sup>12</sup> Na' bi cuide' chee' gúzrebe' xrabe': "Xrae, be<sub>n</sub>na chia' da dxal-la' si'a chee' da naca chiu'." Nadxa xrabe' be<sub>n</sub>e' gachaj da bné<sub>n</sub>zruje' cha chee<sub>n</sub>be' tube', ne xetube'. <sup>13</sup> Ca gudé tu chupa zra, bi cuide' chee' bé<sub>n</sub>nea' btú<sub>n</sub>pabe' xú<sub>n</sub>gute da naca chee<sub>n</sub>be', na' guzabe' zitu', na' bzrinbe' xetú xezr la xu. Na' ben dí<sub>n</sub>tajbe' dumí chee<sub>n</sub>be' lu da cale<sub>n</sub>la da be<sub>n</sub>be'. <sup>14</sup> Na' ca gudache xú<sub>n</sub>gute dumí chee<sub>n</sub>be', bzrin tu gubina' lu xezr la xu na', na' le<sub>n</sub>be' gudunbe'. <sup>15</sup> Nadxa guzabe' xeaj<sub>n</sub>tílajbe' zrin gunbe' chee' tu benne' lu xezr la xu na'. Benne' na' gusél-le'-be' le'e xixre' chee' chee' cheajxú<sub>n</sub>ebe' cu<sub>n</sub>che chee' ca'. <sup>16</sup> Guca lázrebe' gágube' da cale<sub>n</sub>la da dxelagu cu<sub>n</sub>che ca'. Netú benne' quebe bi bné<sub>n</sub>zruje' da gágube'. <sup>17</sup> Nadxa xeajsá lázrebe', dxennabe': "Benne' zante, benne' wen zrin zaj zre'e lizre xra', na' dé<sub>n</sub>le'e da dxelawe'. Neda' dxátequeza' xel-la dxedún. <sup>18</sup> Webí'iza' xexá' a naga zua xra', na' xapa' le': Xrae, be<sub>n</sub>a' dul-la lau Dios, ne lau lue'. <sup>19</sup> Québedxa naca chia' gaca' zri'inu'. Bzua neda' ca tu benne' wen zrin chiu'." <sup>20</sup> Nadxa begú'ube' neza, bezrinbe' lizre xrabe'.

'Tu chi na', ble'e xrabe' lebe' ba zezabe', na' bexache lazre'-be'. Na' guzá chégü<sub>n</sub>e' xeajchague'-be', na' bnide'-be', ne bnú<sub>n</sub>pete'-be'. <sup>21</sup> Nadxa gunabe': "Xrae, be<sub>n</sub>a' dul-la lau Dios, ne lau lue'. Québedxa naca chia' gaca' zri'inu'." <sup>22</sup> Na' gunná xrabe', dxé'e benne' wen zrin chee' ca': "Le cueaj zra lana' da zaca, ne le gugacu-be'. Le cu'u tu da naca oro zrube nabe', ne le cu'u xel-la ní'abe'. <sup>23</sup> Le cheajzrí' tu bezre be dxanne, na' gútele-ba'. Gágudxu, ne gundxu laní, <sup>24</sup> lawe' da bi chia' nigá guca chee<sub>n</sub>be' ca tu benne' ba gute, na' bebanbe'. Gunítebe', na'

ba bezrágadxu-be'." Na' gulezú lawe' dxelune' laní.  
<sup>25</sup> 'Dxácatę na', zrí'ine' bi waca zúabe' le'e xixre' dxunbe' zrin. Na' chizrela' ca bezrinbe' gagu cuita xu'u lizre xrabe', na' benbe' dxaca wil-la, ne dxaca wexá'a. <sup>26</sup> Nadxa gunnébe' tu bi wen zrin na', dxę'ebe' lebe': "¿Bi dxaca nigá?" <sup>27</sup> Bi wen zrin nigá cúnnabe': "Ba belá' bi bichu', na' xrau' gunná bé'ene' nu gute tu bezre be dxanne, lawe' da belabe' zúabe' zri'a chawe'." <sup>28</sup> Bzra'a bi waca na', na' quebe guca lázrebe' xexú'ube'. Nadxa bdx-uaj xrabe', ne guta' xuene' lebe' xexú'ube'. <sup>29</sup> Na' cúnnabe', dxę'ebe' xrabe': "Nézqueznu' zane' iza ba bęna' zrin chiu', ne cabata' bcha'a lue', na' ne tu lasa quebe ne gunnu' chia' tu chíbudau' cheę guna' tu laní nen ljwezra' ca'. <sup>30</sup> Na'a belá' bi chiu' nigá, bi ba ben dítajbe' dumí chiu', guzúalebe' nu'ula dxeledá zraga ca', na' bęte lizu' bezre be dxanne ne cheę lebe'." <sup>31</sup> Nadxa gunná xrabe', dxę'e-be': "Zri'ina', lue' tu zúalezquezu' nen neda', na' xúgute da de chia' naca na chiu'. <sup>32</sup> Na'a dxun na ba xen gundxu laní, ne bedxu, lawe' da bi bichu' gúcabę ca tu benne' ba gute, ne naca banbe'. Gunítebe', na' ba bezrágadxu-be'."

## 16

### *Benne' wen zrin blau quebe naque' xrlátaje*

<sup>1</sup> Nadxa Jesús guzre' benne' ca' dxusédenę':

—Guzúa tu benne' gunní'a, na' zua tu benne' wen zrin blau cheę'. Na' bal-la benne' xea-jleguezre' le' benne' wen zrin blau na' dxun dítaje' da de cheę xranę'. <sup>2</sup> Nadxa xranę' gunné' le', ne guzre' le': "¿Bizra da nigá dxelenné' chiu'? Blué'e neda' ca naca cheę zrin dxunu', lawe' da québedxa

gaca gacu' wən zrin blau chia'." <sup>3</sup> Nadxa benne' wən zrin blau na' guzú lawe' dxenné' lu xichaj lázrdawe': ¿ájazra guna' na'a, lawe' da xebéaj xrana' neda' lu zrin chia'? Quebe sueda' guna' zrin le'e xixre', ne wedué'eda' naba' guna'. <sup>4</sup> Na'a ba nezda' tu da guna' chee xelezúa benne' xelezí' lu ne'e neda' gate québedxa de zrin chia'. <sup>5</sup> Nadxa gunné' tu tu benne' dxelal-le' chee xrane' na'. Na' bchebe' benne' nedxu: "¿ájate dxal-lu' chee xrana'?" <sup>6</sup> Benne' na' bechebe': "Dxal-la' chee' tu gaxúa zruaga da za." Nadxa benne' wən zrin blau na' guzre' le': "Nigá de xiche chiu'. Gudxé'e bexún xetú na, na' bzuaj na dxebagu' chi xun zruaga ca'." <sup>7</sup> Gudé na' bchebe' xetú benne' ca': "¿Gazra lue', ájate dxebagu'?" Na' benne' nigá guzre' le': "Dxebaga' tu gaxúa bzude' zrua' xtila." Nadxa benne' wən zrin blau guzre' le': "Nigá de xiche chiu'. Ben xetú na, na' bzuaj na dxebagu' tápalalaje." <sup>8</sup> Xrane' gúquebe'ene' nácale'e sina benne' wən zrin blau na' ca bene' da ca'.

Nadxa gunná Jesús:

—Ca' naca na, benne' zaj zre'e na'a zra zaj nácadxe' sina lu da dxelune' nen le sa' ljwezre' ca', ca zaj naca benne' zaj naque' chee Dios.

<sup>9</sup> 'Neda' dxapa' le'e, le guchine xel-la gunní'a chee xezr la xu nigá chee cha benne' ljwézrele, chee gate te chee xel-la gunní'a na', na' sua nu si' lu na' le'e naga gaca banle chadía chacanna.

<sup>10</sup> 'Benne' dxuchínene' láteze lu duté xel-la li lazre' chee', cá'anqueze guchínene' tu da zrendxa duté xel-la li lazre' chee', na' benne' quebe naque' li lazre' ca dxuchínene' láteze, cá'anqueze quebe gaque' li lazre' ca guchínene' tu da zrendxa. <sup>11</sup> Ca'

naca na, che quebe nácale li lazre' ca dxuchínele xel-la gunní'a chee xezr la xu nigá, ¿nuzra guxrén lazre' le'e chee guchínele xel-la gunní'a li? <sup>12</sup> Che quebe nácale li lazre' ca dxuchínele da naca chee benne' xula, ¿nuzra gunna le'e da gaca cheéquezle?

<sup>13</sup> 'Quebe gaca tu benne' wen zrin gune' zrin chee chupa xrane', lawe' da cuídenē' tuē', na' xetúē' zri'ine', u gaque' li lazre' nen tuē', na' xetúē' guzúē' chalá'ala. Quebe gaca nu gun zrin chee Dios, ne chee da gunní'a da nape'.

<sup>14</sup> Benne' fariseo ca', benne' dxulucúdeē' dumí, ne dxuluzé nague' da dxenná Jesús, belún le' chee'.

<sup>15</sup> Nadxa gunná Jesús:

—Le'e dxulé'e cuínale xrlátaje lau bēneache ca', san Dios núnbe'e lázrdaule. Da dxeleque bēneache naca na xrlátaje, naca na da dxuzúa Dios chalá'ala.

*Da nadxixruj bea na, ne xel-la dxenná bea chee Dios*

<sup>16</sup> Na' gunná Jesús:

—Ca bzin zra zua Juan gulenná bea da nadxixruj bea na, ne da bululé'e benne' ca' buluchálaje' waláz chee Dios. Na'a, ca na'te dxendxu dizra' chawe' ca gaca chú'udxu naga dxenná bea Dios, na' xúgute benne' dxelune' ba xuzre xelu'e na'.

<sup>17</sup> 'Waca te chee xabáa, ne chee xezr la xu nigá, san quebe te chee tu da naxúaj na lu da nadxixruj bea na.

*Benne' biu dxulusáne' nu'ula chee'*  
(Mt. 19.1-12; Mr. 10.1-12)

<sup>18</sup> Na' gunná Jesús:

—Che tu benne' biu gusanē' zru'ule', ne súalēne' nu'ula xula, benne' biu nigá dxunē' dul-la dxáchajne' xrba chee xel-la wechaga na', na' benne' biu zúalēne' tu nu'ula ba bsan benne' chee' le', benne' nigá cá'anqueze dxunē' dul-la dxáchajne' xrba chee xel-la wechaga na'.

*Tu benne' gunní'a, ne tu benne' xache'*

<sup>19</sup> Na' gunná Jesús:

—Guzúa tu benne' gunní'a, gúcuē' zra lanē' da zaca, ne da zri'a xrtan, na' xúgute zra bene' laní zren. <sup>20</sup> Cá'anqueze guzúa tu benne' xache' le' Lázaro, nazrate we' lu bel-la' dxen chee', na' dxeajché'e lu xu dxu'a lizre benne' gunní'a na'. <sup>21</sup> Benne' xache' nigá guzá lazre' gawe' ca da dxelexruj zranla ga dxelagu benne' gunní'a na', na' bécudu ca' dxelelé'eba' lu we' ca' chee Lázaro. <sup>22</sup> Bzrin zra gute benne' xache' na', na' belexeché' gubáz chee xabáa ca' le' zeajxezúalēne' Abraham lu lataj chawe' chee Dios. Cá'anqueze gute benne' gunní'a na', na' bulucache' le'. <sup>23</sup> Gate benne' gunní'a na' dxezaca zi'e lataj chul-la chee benne' gate, na' guchisa lawe', na' blé'ene' Abraham zue' zitu', ne Lázaro zúalēne' le'. <sup>24</sup> Nadxa gudxezre xe'e, gunné': “¡Xrae, Abraham, bexache lazre' neda', ne gusel-la Lázaro, cheajsebise' tu zrube ne'e, na' xide' xucule' luzra' nigá! Dxezaca zi'a lu xi' nigá.” <sup>25</sup> Na' Abraham gunné': “Bi chia', bsa lazre' gúcale'e chawe' chiu' lu xezr la xu, san Lázaro gúcale'e da zi' da xa' chee'. Na'a le' dxezi'e da ba neza nigá, na' lue' dxezaca zi'u na'. <sup>26</sup> Xetú da zua, zua tu chejéa zrente laduj netu' ne le'e. Ca' naca na, che nu benne' zua nigá dxaca lazre'

chéajē' naga zu', quebe gaca, ne quebe gaca benne' zua naga zu' xide' naga zúantu' netu'." <sup>27</sup> Nadxa gunná benne' gunní'a na': "Dxata' xueda' lue', xrae Abraham, sel-lu' Lázaro lizre xra', <sup>28</sup> naga zaj zra' gazxu' bi bícha'dau', chee cheajchálajlēne'-be', chee quebe xeelá' lēbe' nigá xelezaca zi'be' ca dxaca chia'." <sup>29</sup> Abraham gunné': "Zaj nape' da buluzúaj Moisés, ne benne' ca' buluchálajē' waláz chee Dios. Dخال-la' xelená' xánnie' da na' naxúaj na'." <sup>30</sup> Benne' gunní'a na' bechebe': "Awe', xrae Abraham, san che nu benne' ládujla benne' gate chéajē' cheajchálajlēne' lē', welexebí'i lazre'." <sup>31</sup> Abraham gunné': "Che quebe xelenne' ca da gulenná Moisés, ne benne' ca' buluchálajē' waláz chee Dios, québequeze xeléajlē'ē che tu benne' xebane' ládujla benne' gate."

## 17

### *Ca naca da dxun na ga nabáqadxu dul-la* (Mt. 18.6-7, 21-22; Mr. 9.42)

<sup>1</sup> Jesús guzre' benne' ca' dxusédene':

—Welezúaqueze da xelún na xelebaga bēneache dul-la, na' edxugúa bēneae' gunē' da gun na xebaga benne' xula dul-la. <sup>2</sup> Gácadxa chawe' chee bēneae' che nu guchéaj xiaj xiche lbē', na' chu'e lū nísadau' naga gátete' quézcala gunē' da gun na xebaga bidu caní dul-la. <sup>3</sup> Le guxúe xanne' cuínale.

'Che le sa' ljwezru' gunē' chiu' da calela, bzéajni'ine', na' che xebí'i lazre', bnite lau chee'. <sup>4</sup> Lácala gunē' chiu' da calela gazre lasa tu zra, na' gazre lasa xide' xē'e lue': "Dxexebí'i lazra'", dxal-la' gunite lau' chee'.



*Xel-la waca chee xel-la dxeajlí lazre'*

<sup>5</sup> Benne' gubáz ca' chee Xránadxu gulé'e Le':

—Ben ga cheajlí lázredxantu' Dios.

<sup>6</sup> Nadxa gunná Xránadxu:

—Che le'e zrué'ele xel-la dxeajlí lazre', lácala naca na láteze ca tu binnedu chee mostaza, waca xe le xaga zrente nigá: “Gucuasa nigá, ne xeajsúa lu nísadau',” na' xaga na' guzúa na dizra' chee le.

*Da dxal-la' gun benne' wen zrin*

<sup>7</sup> Che tu benne' ládujla le'e zua tu benne' wen zrin chee', na' xelé'e le'e xixre' gate te gudée' bezre u guxúe' béadu ca', ¿we'e benne' wen zrin na': “Gudé nigala, gudxé'e gagu'?” <sup>8</sup> Cabí, san nne': “Bcueza da gawa', ne gusí chawe' le'u chee gaca ca'u chia' da xi'aj gawa'. Te na' waca xi'aj gagu' lue'.” <sup>9</sup> ¿We'e benne' wen zrin na': “Xcalenu’”, lawe' da bene' da gunná be'e xrane' le'? Cabí. <sup>10</sup> Cá'anqueze le'e, gate xuzre gunle xúgute da gunná be'e Dios le'e, dxal-la' nnale: “Nácantu' benne' wen zrin quebe bi zaj zaca, lawe' da quebe bi ne guntu' da zréndxala ca naca da nabágantu'.”

*Jesús dxexune' chi benne' zaj de'e we' guzru'*

<sup>11</sup> Ca zexíaj Jesús zéajé' Jerusalén, gudée' lu xezr la xu chee xezre ca' zaj nababa Samaria, ne xezre ca' zaj nababa Galilea. <sup>12</sup> Gate bzrine' tu xézredau', bedajlechaga Le' chi benne' zaj de'e we' guzru', na' belezé' zítu'la, <sup>13</sup> ne gulebezre xe'e, dxelenné':

—Jesús, Benne' Wesede, bexache lazre' netu'.

<sup>14</sup> Gate ble'e Jesús le', na' gunné':

—Le chjaca le cheajlué'e cuínale lau bxruze ca'.

Dxácatē zjaque' na', na' belexexaque' chee xízrawe' chee'. <sup>15</sup> Nadxa tu benne' ca', gate guque

bé'ene' ba bexaque', na' bebi'e, dxue lá'ane' Dios du lazre'. <sup>16</sup> Bzu zribe' lau Jesús, ne gudíxrujte' lawe' lu xu, dxe'e Le': "Xcalenu'." Benne' nigá naque' tu benne' Samaria. <sup>17</sup> Nadxa gunná Jesús:

—¿Quegá chie' na' belexexaque' lu xízrawe' na'? ¿Gazra na' xegué'? <sup>18</sup> ¿Tuze benne' zitu' nigá belá' güe lá'ane' Dios?

<sup>19</sup> Nadxa Jesús guzre' benne' na' bexaque':

—Bexasa, bexíaj. Ba bexacu' lawe' da guxéajle'u chia'.

*Ca la' xel-la dxenná bea chee Dios*

*(Mt. 24.23-28, 36-41)*

<sup>20</sup> Benne' fariseo ca' buluchebe' Jesús bátala la' xel-la dxenná bea chee Dios, na' bechebe Le':

—Ca la' xel-la dxenná bea chee Dios quebe naca na da lé'ele. <sup>21</sup> Quegá nu nna: "Nigá zua na", u "Na' zua na", lawe' da ba zua lu'ule le'e xel-la dxenná bea chee Dios.

<sup>22</sup> Nadxa guzre' benne' ca' dxusédenē':

—Wazrín zra gate le'e gaca lázrele lé'ele tu zra zua' neda', Benne' Gulje' Bénneache, na' quebe lé'ele na. <sup>23</sup> Che xelenná bénneache, xelé'e le'e: "Nigá zue'", u: "Na' zue'", quebe chéajle, ne quebe gaule benne' ca'. <sup>24</sup> Ca dxeajsúa xesa chalá'a zran xabáa, na' nalá'tequeze na xechalá'a zran xabáa, ca'an gaca gate xelá' neda', Benne' Gulje' Bénneache, lu zra xelá'a neda'. <sup>25</sup> Nédxula dxal-la' téle'a xel-la zi', na' benne' zaj zre'e lu zra na'a zra xuluzúe' neda' chalá'ala. <sup>26</sup> Ca guca lu zra gate zua Noé, cá'aqueze gaca lu zra gate xelá'a neda', Benne' Gulje' Bénneache. <sup>27</sup> Lu zra na' zua Noé gulé'aj gulawe', ne buluchaga ne'e, ne bulunézruje' bi nu'ula chee' ca' lu xel-la wechaga na', cadxa

bzrin zra guxú'u Noé lu da zren na' da dxedá lawe' nísadau', na' gúcale'e xiuj, na' gulate xúgute benne' ca'. <sup>28</sup> Cá'anqueze guca lu zra zua Lot, gulé'aj gulawe', ne gulá'awe', ne belúti'e, na' gulaze', ne belune' lizre', <sup>29</sup> na' gate Lot bedxúaje' lu xezre Sodoma, na' ca dxaca gate dxaca xiuj, ca'an guca bexruj xi', ne da gache da dxuzézxele'e zran xabáa, ne bzria xi na ca naca benne' ca'. <sup>30</sup> Ca'an gaca lu zra xelá'a neda', Benne' Gulje' Bénneache.

<sup>31</sup> 'Lu zra na', che nu benne' ze' chju'u chee', na' da de chee' zra na lu xu'u chee' na', quebe dxal-la' chu'e cuéaje' na, na' che nu benne' zue' le'e xixre', quebe dxal-la' xezrine' lizre'. <sup>32</sup> Le cheajsá lazre' ca guca chee' zru'ula Lot. <sup>33</sup> Benne' dxaca lazre' gapa chi'e xel-la nabán chee' gunitie' na, na' bènnea' wdee' na, wazrué'e bènnea' xel-la nabán.

<sup>34</sup> 'Dxapa' le'e, lu zre na', chupa benne' xelate' tu zren ga dxelase'. Tue' xeché'e, na' xetúe' xegá'ane'. <sup>35</sup> Chupa nu'ula xelezré'e dxelútue'. Tue' xeché'e, na' xetúe' xegá'ane'. <sup>36</sup> Chupa benne' xelezré'e le'e xixre'. Tue' xeché'e, na' xetúe' xegá'ane'.

<sup>37</sup> Gate belén benne' ca' da nigá, na' buluchebe' Jesús:

—¿Gazra gaca ca', Xran?

Le' bechebe':

—Naga de tu da nate, na' xeledúpaqueze laba ca'.

## 18

*Da dxulé'e na ca naca chee' tu nu'ula ba gute benne' chee', ne benne' dxuchi'a da dxaca*

<sup>1</sup> Jesús bchálaje' da dxulé'e na ca naca chee' gusédene' benne' ca' dxal-la' xuluwízrajtecaze'

Dios, ne quebe xelexebigue'. <sup>2</sup> Na' guzre' benne' ca':

—Tu xezre guzúa tu benne' dxuchi'e da dxaca, na' quebe gudape' ba lá'ana Dios, ne cá'aqueze bénneache. <sup>3</sup> Lu xezre ná'queze guzúa tu nu'ula ba gute benne' chee'. Guxíaje' xeajnabe' lau benne' dxuchi'e da dxaca chee' guchi'e da dxaca chee' nen tu benne' dxune' chee' da calela. <sup>4</sup> Zane' lásate' benne' dxuchi'e da dxaca quebe guca lazre' guchi'e chee' nu'ula na', san ca gudé na' gunné' lu xichaj lázrdawe': Lácala quebe dxapa' ba lá'ana Dios, ne cá'aqueze bénneache, <sup>5</sup> san lawe' da nu'ula nigá dxune' neda' zede, guchí'a chaza' da dxaca chee' chee' québedxa xide' gúnle'e neda' zede.

<sup>6</sup> Na' gunná Xránadxu:

—Caní na' gunná benne' wen da calela na', benne' dxuchi'e da dxaca. <sup>7</sup> ¿Quebe guchi'a Dios da dxaca chee' benne' ca' ba guqué'e, benne' ca' dxe-lenné' Le' te zra, ne chizrela? ¿Wazrene' xechebe' chee' benne' ca'? <sup>8</sup> Dxapa' le'e, Le' guchi'e da dxaca chee', ne quebe chene'. Gate xelá'a neda', Benne' Gulje' Bénneache, ¿wazréldxeda' tu benne' lu xezr la xu nigá, benne' dxéajle'e chia'?

*Da dxulé'e na ca naca chee' tu benne' fariseo, ne tu benne' wechizruj*

<sup>9</sup> Jesús bchálaje' xetú da dxulé'e na, chee' xelene benne' ca' dxeléquené' zaj naque' xrlátaje, san dxuluzúe' chalá'ala le sa' ljwezre'. <sup>10</sup> Gunné':

—Chupa benne' xjaque' xudau' chee' xuluchálajlene' Dios. Tue' naque' benne' xudau' fariseo, na' xetúe' naque' wechizruj waláz chee' xezre zitu'. <sup>11</sup> Benne' xudau' na' guzé'

dxuchálajlene' Dios, gunné': "Dios, xcalenu' quebe naca' ca benne' xula ca', zaj naque' gubán, ne benne' ca' dxelune' da calela, ne benne' dxelún dul-la dxeláchajne' xrba chee wechaga na', ne quegá ca benne' wechizruj nigá. <sup>12</sup> Neda' dxuna' gubasa chupa lasa da gazre zra, ne dxunna' chiu' tu cue' chee da chi cue' da dxezi'a." <sup>13</sup> Benne' wechizruj na' guzúe' dxu'a dxa xú'uze, ne quebe bexazrjne' chisa lawe' xabáa. Béle'e la chu'e, dxenné': "Dios, bexache lazre' neda', naca' benne' dul-la." <sup>14</sup> Dxapa' le'e, benne' wechizruj na' bezé'e xexíaje' lizre', ne bexaque' xrlátaje lau Dios, san quegá caní guca chee benne' xudau' na'. Ca' guca lawe' da benne' dxucá'ana szren cuine' wexéxrujla bénnea', san benne' dxucá'ana baxache' cuine' wegá'ana szrénqueze bénnea'.

*Jesús dxenabe' gaca chawe' chee bidu ca'*  
(Mt. 19.13-15; Mr. 10.13-16)

<sup>15</sup> Belezrín benne' ca' zaj naché'e bidu ca' lau Jesús chee guzé ne'e lebe'. Gate belelé'e benne' ca' dxusede Jesús da nigá, na' gulezú lawe' dxeledil-le' benne' ca'. <sup>16</sup> Jesús gunné' benne' ca' dxusedene', na' dxe'e le':

—Le güe lataj xeledá' bidu ca' naga zua', ne quebe guzágale-be', lawe' da benne' zaj naque' ca bidu caní welexu'e naga dxenná bea Dios. <sup>17</sup> Da li dxapa' le'e, benne' quebe si' lu ne'e nna bea Dios le' ca dxelún bidu caní, québequeze chu'e naga dxenná bea Dios.

*Tu benne' cuide' naque' benne' gunní'a*  
(Mt. 19.16-30; Mr. 10.17-31)

<sup>18</sup> Tu benne' xíchaje bchebe' Jesús:

—Benne' Wesede xrlátaje, ¿bi da dxal-la' guna' chee zrué'eda' xel-la nabán zeajlí canna?

<sup>19</sup> Jesús guzre' le':

—¿Bizr chee na' dxennáu' naca' xrlátaje? Netú benne' quebe naque' xrlátaje. Tuze Dios naque' xrlátaje. <sup>20</sup> Lue' núnbe'u ca zaj naca xrba chee Dios: Quebe gunu' dul-la da dxachaj na xrba chee wechaga na'.

Quebe gutiu' benne'.

Quebe cuanu'.

Quebe nneu' chee le sa' ljwezru' da quebe naca na. Gudapa ba lá'ana xra xrna'u.

<sup>21</sup> Benne' na' guzre' Jesús:

—Xúgute da caní dxuna' ne nácatea' bídau'te.

<sup>22</sup> Gate ben Jesús da nigá, na' guzre'-be':

—Ne dxexájrjenu' xetú da dxal-la' gunu'. Bete ca naca da de chiu', na' bnezruj na chee benne' xache' ca'. Nadxa gapu' xel-la gunní'a lu xabáa chee Dios. Na' gudá sálenu' neda'.

<sup>23</sup> Gate benne' cuide' na' benne' da nigá, bewí'inele'ene' lawe' da nápal'e da gunní'a. <sup>24</sup> Gate ble'e Jesús ca bewi'ine benne' na', gunné':

—Stébetę naca chee benne' gunní'a ca' xelexú'e naga dxenná bea Dios. <sup>25</sup> Chadídxala te tu bea zren lu negue' tu xeché' zriche quegala chu'u tu benne' gunní'a naga dxenná bea Dios.

<sup>26</sup> Na' benne' ca' dxelenne' gulenné':

—Che ca' naca na, ¿núzraqueze la?

<sup>27</sup> Jesús guzre' benne' ca':

—Da quebe gaca xelún bénneache, waca Dios gúnqueze' na.

<sup>28</sup> Na' gunná Pedro, guzre' Jesús:

—Xran, ba bsantu' ca da gudápantu' chee zálentu' Lue'.

<sup>29</sup> Nadxa Jesús bechebe':

—Da li dxapa' le'e, núteteze benne' gusane' lizre', u xra xrne'e, u bi biche', bi zane' ca', u zru'ule', u zrí'ine' ca', chee gunē' zrin chee xel-la dxenná bea chee Dios, <sup>30</sup> benne' nigá wazi'e da zrendxa lu xezr la xu nigá, na' lu xezr la xu da za za' wazi'e xel-la nabán da zeajlí canna.

*Jesús dxuchálaje' xecha lasa ca gaca gate gate'*  
(Mt. 20.17-19; Mr. 10.32-34)

<sup>31</sup> Na' Jesús gunné' chalá'ala benne' chazrinnu ca' dxusédene', na' guzre' le':

—Na'a zexíajdxu Jerusalén, naga gaca li ca naca da buluzúaj benne' ca' buluchálaje' waláz chee Dios ca gaca chia' neda', Benne' Gulje' Bénneache. <sup>32</sup> Benne' zaj zre'e Jerusalén xuludée' neda' lu na' benne' zitu' ca', na' xelún le' chia', ne xelennéqueze' schanni' chia', ne wuluzráqueze' neda' zrene'. <sup>33</sup> Welúequeze' neda', na' te na' xelútiē' neda', na' zra guxunne' zra xebana' ládujla benne' gate.

<sup>34</sup> Benne' ca' quebe guléajni'ine' da nigá, ne quebe zaj nézene' bi chee na' dxuchálajlene' le', lawe' da zaj naca da quebe guca xeléajni'iquezne'.

*Tu benne' la chul-la, benne' zuē' xezre Jericó*  
(Mt. 20.29-34; Mr. 10.46-52)

<sup>35</sup> Gate Jesús bzrine' gagu naga zua xezre Jericó, na' dxe' tu benne' la chul-la dxu'a neza dxenabe' guna'. <sup>36</sup> Gate benne' dxeledé benne' zante, na' benne' la chul-la na' bchebe' benne' ca' bizra na' dxaca na. <sup>37</sup> Na' gulé'e le':

—Jesús, benne' Nazaret dxedéé' nigá.

<sup>38</sup> Nadxa gudxezre xa'a la chul-la na', gunné':

—¡Jesús, Zri'ine David, bexache lazre' neda'!

<sup>39</sup> Benne' ca' zaj zria lawe' lau Jesús guledil-le' benne' la chul-la na' chee sue' zrize, san gudxezre xá'adxa le', dxenné':

—¡Zri'ine David, bexache lazre' neda'!

<sup>40</sup> Nadxa gugá Jesús, na' gunná bé'ene' xeajlexrí'e le'. Gate ble'e lau Jesús, na' Jesús bchebe' le':

<sup>41</sup> —¿Bi dxaca lazru' guna' chiu'?

Bechebe la chul-la na':

—Xran, dxaca lazra' xelé'eda'.

<sup>42</sup> Jesús guzre' le':

—Gaca ca dxennáu'. Ba bexacu' lawe' da guxéajle'u chia'.

<sup>43</sup> Zra ná'queze belé'e benne' la chul-la na', na' guxíajlene' Jesús, dxue lá'ane' Dios. Xúgute benne' ca' belelé'ene' da nigá cá'anqueze belúe lá'ane' Dios.

## 19

### *Jesús dxuchálajlene' Zaqueo*

<sup>1</sup> Nadxa Jesús guxú'e xezre Jericó, ne dxedéé' xezre na'. <sup>2</sup> Lu xezre na' zua tu benne' gunní'a le' Zaqueo. Naque' xíchaje chee benne' wechizruj ca'. <sup>3</sup> Benne' nigá dxaca lazre' gúnbe'e Jesús, san quebe guca lé'ene' Le' lawe' da zaj zra' benne' zante na', na' Zaqueo na' quebe naque' benne' tunna. <sup>4</sup> Nadxa guxíaj chégüe' guzría lawe', ne chee gaca lé'ene' guluéne' tu lu xaga zren da zua gagu naga dxal-la' te Jesús. <sup>5</sup> Gate gudé Jesús na', gunné'e lu xaga na', ne guzre' le':

—Zaqueo, bexétajche, lawe' da na'a dxun na ba xen xegá'ana' lizru'.



<sup>6</sup> Nadxa Zaqueo na' bexétaje' chadí, na' nen dute xel-la dxebé guzı' lu ne'e Jesús. <sup>7</sup> Gate belelé'e benne' ca' da nigá, xúgute' gulezú lawe' dxelezi tizre' Jesús, dxelenné':

—Jesús bzrine' begá'ane' lizre tu benne' dul-la.

<sup>8</sup> Nadxa Zaqueo na' guzé', na' guzre' Xránadxu:

—Gunná'xque, Xran, gunézruja' benne' xache' ca' gáchajte ca da de chia', na' che nu benne' bsaca zia' le', xunézruja' tapa cue'la chee'.

<sup>9</sup> Na' Jesús guzre' le':

—Na'a bla' xel-la weselá lu xu'u nigá, lawe' da nácaqueze benne' nigá xrtia Abraham. <sup>10</sup> Ca' naca na lawe' da bla' neda', Benne' Gulje' Bénneache, chee xexılaja', ne guselá' benne' ca' zaj nanıtıe'.

*Da dxulé'e na ca naca chee chi dumı zaca*

<sup>11</sup> Dxácaté na' dxuluzé naga benne' ca' dxenná Jesús da canı, na' bchálaje' tu da dxulé'e na lawe' da ba zue' gáguze xezre Jerusalén, na' benne' ca' dxeléquene' zra ná'queze nna bea Dios lu xezr la xu nigá. <sup>12</sup> Nadxa guzre' benne' ca':

—Guzúa tu benne' gunnı'a xrlátaje, na' dxal-la' chéaje' zıtu' chee xuluzúe' le' gaque' wenná bea, na' te na' xezrine' lazrıe'. <sup>13</sup> Gate za se'e, gunné' chi benne' wen zrin chee', na' bnézruje' tu tu benne' ca' tuwéaj dumı zácale'e, ne guzre' benne' ca': “Le gu-chine dumı nigá cadxa xelá'a.” <sup>14</sup> Benne' zaj zre'e lázrıe' dxelecuıdene' le', na' gulesel-le' bal-la benne' gubáz chee' naga zéaje' chee cheajleguezre' benne' zaj zre'e na': “Quebe dxaca lázrentu' gaca benne' nigá wenná bea cheentu'.” <sup>15</sup> Buluzúe' le' gaque' wenná bea, na' bezrine' lázrıe'. Gate bezrine' gunné' benne' wen zrin ca' bnézruje' dumı, chee

nézene' ájate bezí' tu tu benne' ca'. <sup>16</sup> Benne' nedxu bzrine' lawe', na' gunné': "Xran, dumí chiu' ba bezí na chi cue'la." <sup>17</sup> Wenná bea na' bechebe': "Chawe' benu'. Nacu' wen zrin xrlátaje. Lawe' da gucu' li lazre' lu late' da benna' lue', na'a guna' lue' benne' nna be'ene' chi xezre ca'." <sup>18</sup> Na' bzrin xetúe' lawe', na' gunné': "Xran, dumí chiu' ba bezí na gazxu' cue'la." <sup>19</sup> Cá'anqueze guzre' benne' nigá: "Lue' gacu' benne' nna be'ene' gazxu' xezre ca'." <sup>20</sup> Nadxa xetúe' bzrine', na' gunné': "Xran, nigá de dumí chiu'. Bcache chawa'a na tu lu bazxu, <sup>21</sup> lawe' da bzreba' lue'. Nacu' tu benne' dxuzúa xuzre. Dxexeca'u da quebe guxru', ne dxexelapu' naga quebe guzu'." <sup>22</sup> Nadxa wenná bea na' guzre' le': "Wen zrin calela. Ca dizra' da gunnéu' chuga' ca gaca chiu'. Che nézquezenu' naca' benne' dxuzúa xuzre, ne xecá'a da quebe guxrúa', ne dxelapa' naga quebe guza', <sup>23</sup> ¿bizr chee na' quebe xju'u dumí chia' lu na' benne' xuluchíne' na, chee xezí' lu na'a neda' dumí chia' nen da gun xíchaje na, gate xezrina' neda' lizra'?" <sup>24</sup> Nadxa guzre' benne' ca' zaj zre'e na': "Le xecá'a dumí na' lu ne'e, na' le gunezruj na benne' nape' chi dumí ca'." <sup>25</sup> Benne' ca' gulé'e le': "Xran, ba nape' chi dumí." <sup>26</sup> Na' bechebe' wenná bea na': "Dxapa' le'e, benne' nape' wazidxe' da zrendxa, na benne' quebe nape', wecá'a ca da du nape'. <sup>27</sup> Na'a, ca naca chee benne' ca' quebe gulaca lazre' gaca' neda' wenná bea chee', le cheajxri'e nigá, ne le gutie' lawa' neda'."

*Jesús dxexu'e Jerusalén*

*(Mt. 21.1-11; Mr. 11.1-11; Jn. 12.12-19)*

<sup>28</sup> Ca gudé gunné' da nigá, na' bexú'u Jesús neza zexíaje' Jerusalén. <sup>29</sup> Gate ba zua xezrine' xezre Betfagé, ne xezre Betania, ne zue' gáguze naga zua Xi'a Xaga Olivo, na' gusel-le' chupa benne' ca' dxusédene'. <sup>30</sup> Guzre' le':

—Le chjaca xézredu na' zua gáguze, na' ca zrinle na' lé'ele tu burru da'ba' xaga, be netú quebe nu ne cuía leba'. Le sezre-ba', na' le che'-ba' nigá. <sup>31</sup> Che nu naba le'e bizr chee na' dxesézrele-ba', le xe'e Xránadxu nachínene'-ba'.

<sup>32</sup> Na' gusiá'ca benne' ca', na' belelé'ene' xúgute naca na ca ba guzre Jesús le'. <sup>33</sup> Na' gate dxesezre' búrrua', na' xránaba' buluchebe' le':

—¿Bizr chee na' dxesézrele búrrua'?

<sup>34</sup> Benne' chupa ca' belexechebe':

—Lawe' da nachine Xránadxu leba'.

<sup>35</sup> Na' beleché'e-ba' lau Jesús, na' belexrúe' xicha chee' cúzruba', na' buluzríe' Jesús cúzruba'. <sup>36</sup> Ca zeaj Jesús, xu'e neza zrie' búrrudu na', na' dx-elechiluj benne' ca' xicha chee' la neza naga té'e.

<sup>37</sup> Gate bzrine' gagu naga naca létajla chee Xi'a Xaga Olivo, xúgute benne' ca' zaj de'e Le' gulezú lawe' dxelebezre xe'e lu xel-la dxelebé, ne dxelúe lá'ane' Dios ca naca xúgute xel-la waca chee xabáa da belelé'ene'. <sup>38</sup> Gulenné':

—La'azxa naca wenná bea, benne' za' waláz chee Xránadxu Dios. Gaca xel-la dxebeza zri lazre' da za xabáa, ne gaca ba Dios.

<sup>39</sup> Nadxa bal-la benne' fariseo ca' zaj zra' ládujla benne' ca' gulé'e Jesús:

—Benne' Wesede, gudil-la benne' caní zaj de'e Lue'.

<sup>40</sup> Jesús bechebe':

—Dxapa' le'e, che benne' caní xelezúa zrię', xiaj caní xebeze xa'a na.

<sup>41</sup> Gate bzriņę' gagu xęzre Jerusalén, ne ca blé'ene' na, na' gudxęzre Jesús ca naca cheę na.

<sup>42</sup> Na' gunné':

—La chéajni'ile lu zra cheęle nigá da gaca gunna cheęle xel-la dxebeza zri lazre'. Na'a da na' n-gache na, na' quebe gaca lé'ele na. <sup>43</sup> Weleżrín zra gaca cheęle da zrinnaj, gate benne' dxele-cuídene' le'e xeléchaje' ze'e dxu'a xęzre cheęle, ne xuluzague' le'e gáteteze na', <sup>44</sup> na' xuluchínnaje' xęzre cheęle. Na' xelútię' ca naca benne' zaj zre'e nigá, na' quebe xuluxucá'ane' tu xiaj cuzru ljwezre na. Caní gaca cheęle lawe' da quebe gúquebe'ele zra bla' Dios cheę gácalęne' le'e.

*Jesús dxucá'ana chawe' chale'aj xudau'*  
(Mt. 21.12-17; Mr. 11.15-19; Jn. 2.13-22)

<sup>45</sup> Nadxa guxú'u Jesús chale'aj xudau', na' guzú lawe' dxebéaje' na' benne' ca' dxelutię', ne dx-elá'awe' na'. <sup>46</sup> Na' guzre' benne' ca':

—Lu xiche cheę Dios dxenné': “Lizra' naca na xu'u naga guchálajlele neda',” na' le'e nunle na ca tu lizre gubán ca'.

<sup>47</sup> Tu zra tu zra Jesús dxusédene' benne' ca' zaj zra' chale'aj xudau'. Benne' xíchaje' ca' cheę bxruze, ne benne' dxuluxuzájle'e da nadxixruj bea na, ne benne' xu'u lawe' cheę xęzre na' dxelílaje' ájala xelune' xelútię' Le'. <sup>48</sup> Quebe belezrélene' ájala xelune', lawe' da dxuluzé naga xanne' xúgutę benne' ca' Jesús, cheę xellenę' ca da dxenné'.

## 20

### *Ca naca xel-la dxenná bea napa Jesús*

*(Mt. 21.23-27; Mr. 11.27-33)*

<sup>1</sup> Tu zra gate zua Jesús chale'aj xudau' dxusédene' benne' ca', ne dxuchálajlene' le' ca naca dizra' chawe' chee Dios, na' belezrín na' benne' xíchajē ca' chee bxruze ca', ne benne' ca' dxuluxuzájle'e da nadxixruj bea na, ne benne' gula sina ca', <sup>2</sup> na' gulé'e Le':

—Gunná bi xel-la dxenná bea napu' dxunu' da caní. ¿Nuzra benna lue' xel-la dxenná bea nigá?

<sup>3</sup> Na' gunná Jesús:

—Cá'anqueze neda' gucheba' le'e tu. Le xechebe chia'. <sup>4</sup> ¿Nuzra gusel-la Juan guchúe' bēneache nisa? ¿Dios che bēneache?

<sup>5</sup> Na' gulezú lawe' dxelé ljwezre':

—¿Bizra nnadxu? Che nnadxu gusel-la Dios le', na' guchebe' dxi'u: “¿Bizr chee na' quebe guxéajle chee'?” <sup>6</sup> Che xedxu Le', bēneache gulesel-le' le', benne' zaj zre'e nigá wuluzríe' dxi'u xiaj, lawe' da zaj neze xánnie' bchalaj Juan waláz chee Dios.

<sup>7</sup> Nadxa belexechebe' quebe zaj nézene' nu gusel-la Juan bchue' bēneache nisa. <sup>8</sup> Na' Jesús guzre' benne' ca':

—Cá'anqueze neda' quebe xapa' le'e bi xel-la dxenná bea napa' dxuna' da caní.

*Da dxulé'e na ca naca chee benne' wen zrin calela ca'*

*(Mt. 21.33-44; Mr. 12.1-11)*

<sup>9</sup> Na' guzú lau Jesús dxuchálajlene' benne' ca' zaj zre'e na', dxuchálaje' da dxulé'e na, dxenné':

—Guzúa tu benne' bde'e lba uva lu xezr la xu chee', na' ca gudé na' bca'ane' na lu na' benne' wen zrin ca', na' guzé'e na' zane' iza. <sup>10</sup> Gate bzrin zra xuluchibe' uva ca', na' gusel-le' tu bi wen zrin chee' zeajxenábabe' tu cue' chee' lina na' da dxal-la' xezi'e, san benne' wen zrin ca' buluzálaje'-be', na' belexesel-le'-be' cá'aze. <sup>11</sup> Nadxa xrane lina na' gusel-le' xetú bi wen zrin chee', na' cá'anqueze bi nigá bulucháchalene-be', ne buluzálaje'-be', na' belexesel-le'-be' cá'aze. <sup>12</sup> Xrane na' gusel-le' xetú bi wen zrin chee', na' benne' wen zrin ca', cá'anqueze belune'-be' zi', na' belexebéaje'-be' lu lina na'.

<sup>13</sup> Naga xeajche'te na, xrane na' gunné': “¿ájazra guna? Sel-la' zri'ina' nazrí'ite lazra'. Gate xeelé'ene'-be' nalja xelape'-be' ba lá'ana.” <sup>14</sup> Na' gate benne' wen zrin ca' belelé'ene'-be', na' gulé ljwezre': “Bi nigá xezí' lu na'be' da de chee' xránadxu. Gútedxu-be', chee' gácadxu xrane na dxí'uqueze.” <sup>15</sup> Nadxa belexebéaje'-be' lu xezr la xu na', na' belutie'-be'.

Nadxa Jesús bchebe' benne' ca':

—¿Bizra gun xrane na' chee' benne' wen zrin ca'? <sup>16</sup> Xelé'e, na' gutie' benne' wen zrin ca', na' gudée' xezr la xu na' lu na' benne' xula ca'.

Gate belén benne' ca' ca' gunná Jesús, na' gu-lenné':

—Dios quebe gu'e lataj gaca ca'.

<sup>17</sup> Na' Jesús gunné'e benne' ca', na' gunné':

—¿Bizra zéaje da naxúaj na lu xiche chee' Dios? Dxenné' caní:  
Xiaj na' da buluzúa benne' wen xu'u ca' chalá'ala, le' na' naca na xiaj blau.

18 Núteteze benne' cheajchazie' lawe' xiaj na', na' chúzrujqueze bēnea', na' che xiaj na' xexruj na lawe' nu benne', gútute na le'.

*Ca naca chee da dxuchizruj xezre zi'tu'*

*(Mt. 21.45-46; 22.15-22; Mr. 12.13-17)*

19 Benne' xíchaje ca' chee bxruze ca', ne benne' ca' dxuluxuzájle'e da nadxixruj bea na gulaca lazre' xejele' Jesús zra ná'queze, lawe' da guleque bé'ene' bchalaj Jesús da dxulé'e na ca zaj naca le', san belezrebe' da xelún bēneache ca'. 20 Nadxa gulesel-le' benne' ca' xuluzuzre' Jesús, benne' xululé'e cuine' ca benne' xrlátaje ca'. Benne' caní dxelaca lazre' xebeáje' Jesús dizra' chee xezequene' xuludé' Le' lu na' bēnea' dxenná be'e. 21 Chee xelune' da nigá, buluchebe' Le':

—Benne' Wesede, nézentu' dxennáu', ne dxusédenu' da naca li lazre', ne quebe dxuchi'u chee bēneache cáteze dxululé'e cuine', san lu da li dxusédenu' da naca chee Dios. 22 Guzre netu', ¿naca na chawe' quízrujdxu da dxuchizruj César, bēnea' dxenná bé'ene' duté xezr la xu, che cabí?

23 Dxeque be'e Jesús ca naca da dxelaca lazre' xelune' chee', na' guzre' benne' ca':

—¿Bizr chee na' dxaca lázrele gun xálele neda'?

24 Le gulé'e neda' tu dumí. ¿Nuzra lu'a na' da na nigá, ne nu la naxúaj nigá?

Benne' ca' belexechebe':

—Chee benne' dxenná bea na'.

25 Nadxa gunná Jesús:

—Le gunezruj bēnea' da naca chee', na' le gunezruj Dios da naca chee Dios.

<sup>26</sup> Quebe gulezéquene' xelún xálene' Jesús ca naca da bechebe' lau benne' ca'. Belexebánene' ca naca da bechebe', na' gulezúa zrie'.

*Ca gaca gate xelexebán benne' gate*  
(Mt. 22.23-33; Mr. 12.18-27)

<sup>27</sup> Ca gudé na' bal-la benne' xudau' saduceo ca' belezrine' lau Jesús. Benne' saduceo ca' dx-eléquene' quebe xelexebán benne' gate, na' gulé'e Jesús:

<sup>28</sup> —Benne' Wesede, Moisés bzúaje' cheentu' che tu benne' gati'e, ne gucá'ane' zru'ule', ne che quebe nu chilá' zrí'ine', na' bi biche bénnea' dxal-la' guchaga na'abe' nen nu'ula na' gute benne' chee' chee' galaj tu bidau' gácabe' ca zri'ine bénnea' ba gútee'. <sup>29</sup> Gulezrá' gazre benne' gulaque' zri'ine tuze xre'. Bi nedxu bchaga na'abe' nen tu nu'ula, na' gútebe', quebe nu chilá' bi cheebe'. <sup>30</sup> Bi gudxupe' bchaga na'abe' nen nu'ula na', ne cá'aqueze gútebe' quebe nu chilá' bi cheebe'. <sup>31</sup> Nadxa bi guxunne' bchaga na'abe' nen nu'ula na', na' cá'aqueze belún bi ca' xezica, na' bi gazre ca' gulátebe' quebe nu chilá' bi cheebe'. <sup>32</sup> Naga xeajche'te na, na' gute nu'ula na'. <sup>33</sup> Gate xelexebán benne' gate, ¿nula bi ca' gaca zrú'ulabe' nu'ula na', lawe' da ca naca bi gazre ca' buluchaga na'abe' nen nu'ula na'?

<sup>34</sup> Nadxa bechebe Jesús:

—Lu xezr la xu nigá dxuluchaga na' benne' biu ca' nen nu'ula ca'. <sup>35</sup> Na' benne' ca' naca chee' xelexexú'e xezr la xu da za za', ne chee' xelexebane' ládujla benne' gate, québedxa xuluchaga ne'e, ne québedxa xulunézruje' zrí'ine' lu xel-la wechaga na'. <sup>36</sup> Ca'an gaca lawe' da quebe nu gátedxa



na'. Xelaque' ca zaj naca gubáz chee xabáa ca', ne xelaque' bi chee Dios lawe' da belexebane'.  
 37 Moisésqueze, gate bzuaje' ca guca chee bisigá da guzúa na' xi', dxulé'ene' dxi'u dxal-la' xelexebán benne' gate. Naga naxúaj da nigá dxenná na ca naca chee Dios, naque' Dios chee Abraham, ne Dios chee Isaac, ne Dios chee Jacob. 38 Dios quebe naque' Dios chee benne' gate ca'. Naque' Dios chee benne' ban ca', lawe' da lau Le' zaj naca ban xúgute béneache.

39 Nadxa bal-la benne' ca', benne' dxuluxuzájle'e da nadxiruj bea na gulé'e Jesús:

—Cháwedau' dxennáu', Benne' Wesede.

40 Québedxa belexázejne' bi xuluchebe' Jesús.

*¿Nu benne' naca Cristo zri'ine'?*  
 (Mt. 22.41-46; Mr. 12.35-37)

41 Jesús guzre' le':

—¿Bizr chee na' dxennale le'e naca Cristo zri'ine David? 42 Davidqueze gunné' lu xiche naga zaj naxúaj salmo ca':

Xránadxu Dios guzre' Xrana':

“Gudxé'e cuita' xabela chia',

43 Cadxa guzúa' benne' dxelecuídenē' lue' ca' zran ni'u.”

44 ¿ájazra chee na' naca Cristo zri'ine David, na' Davidqueze dxē'e Le': “Xran”?

*Jesús dxenné' chee benne' ca' dxuluxuzájle'e da nadxiruj bea na*

(Mt. 23.1-36; Mr. 12.38-40; Lc. 11.37-54)

45 Ca naca benne' ca' zaj zra' na' dxuluzé nague' chee Jesús gate guzre' benne' ca' dxusédenē':

46 —Le guxúe xanne' cuínale chee benne' ca' dxuluxuzájle'e da nadxixruj bea na, lawe' da dxeledánene' dxeledé' zaj nacue' zre' tunna, ne dxelaca lazre' xelapa bènneache le' ba lá'ana lawe' xi'a ca', ne dxelebé'e lu lataj blau ca' lu xu'u naga dxezrágale, ne lataj blau ca' naga dxelawe' zrué.  
 47 Benne' caní dxelequé'e ca naca lizre nu'ula ca' ba gulate benne' chee', na' chee' xulucá'ana cuine' xrlátaje lau bènneache ca' dxululawízraje' Dios da tunna lu xu'u ca' naga dxezrágale. Benne' caní xelezaca zídxaqueze'.

## 21

*Dumí da bnezruj tu nu'ula xache' ba gute benne' chee'*

*(Mr. 12.41-44)*

<sup>1</sup> Gate zua Jesús chale'aj xudau', blé'ene' benne' gunní'a ca' dxelegú'e dumí lu xí'ina chee' xudau'.

<sup>2</sup> Na' blé'ene' tu nu'ula naque' benne' xache', ne ba gute benne' chee', gulu'e chupa dumí'au'. <sup>3</sup> Na' gunná Jesús:

—Da li dxapa' le'e, nu'ula xache' nigá gulú'udxe' da zrendxa ca benne' gunní'a caní, <sup>4</sup> lawe' da dxelegú'u benne' ca' chee' da dxutínneze na, san nu'ula nigá, lu xel-la baxache' chee' bnézruje' ca naca da nape' da nunte' gawe'.

*Jesús dxuchálaje' ca gaca gate cuía xi' xudau'*

*(Mt. 24.1-2; Mr. 13.1-2)*

<sup>5</sup> Bal-la benne' dxuluchálaje' ca naca chee' xudau' na', ne chee' xiaj xrtante' da zaj zrále'e na ze'e xudau' na', ne chee' da xrtan da bulunezruj benne' chee' xudau' na'. Nadxa gunná Jesús, dxe'e le':

<sup>6</sup> —Wazrín zra gate xelebía xi' xúgute da caní dx-elé'ele, ne quebe xegá'ana netú xiaj cuzru ljwezre na.

*Da xululé'e na gate cheajsé chee xezr la xu nigá (Mt. 24.3-28; Mr. 13.3-23)*

<sup>7</sup> Nadxa benne' ca' buluchebe Jesús:

—Benne' Wesede, ¿bata gaca da na'? ¿Bi gulé'e na gate ba za xelaca da caní?

<sup>8</sup> Jesús gunné':

—Le guxúe xanne' cuínale, ne quebe güele lataj nu si xē le'e, lawe' da xeelé' benne' zante benne' xulusí' cuine' La' neda', xelenné' zaj naque' Cristo, ne xelenné' ba bzrin zra. Quebe chéajlele benne' ca'. <sup>9</sup> Gate xénele dxaca wedil-la, ne xeledábage' bēnneache xu'u lawe', quebe zrēbele, lawe' da dxal-la' gaca da caní nedxu, san quebe ne zrin zra cheajsé chee xezr la xu nigá.

<sup>10</sup> Nadxa guzre' benne' ca':

—Bēnneache tu xezr la xu xeledíl-lale bēnneache xetú xezr la xu, na' benne' tu xezre xeledíl-lale benne' xetú xezre. <sup>11</sup> Wazrú'le'equeze, ne gácale'e gubina', ne gáta'le'e xízrawe' du ca nácaqueze, na' zran xabáa lé'ele da guchébequeze na le'e, ne xel-la waca zri'a ca'.

<sup>12</sup> 'Nédxudxa gate quebe ne gaca da caní xelélaqueze' le'e, ne xeláu zi' xúzrequeze' le'e. Xeleché'e le'e lu xu'u ca' ga dxelezrague' chee xelechugue' ca xeluné' chee, na' xelegú'e le'e lizre xia, ne xeleché'e le'e lau benne' wenná bea ca', ne lau benne' xu'u lawe' ca' lawe' da nácale neda' tuze. <sup>13</sup> Gate gaca da caní gata' lataj guchálajlele benne' ca' ca naca chia' neda'.

<sup>14</sup> Le guzúa chacha lárdaule, quebe gucuézale

nédxula da dxal-la' nnele, <sup>15</sup> lawe' da gunna' neda' le'e dizra', ne xel-la sina da quebe xezezeque benne' dxeledábague' le'e bi xelenné' chee na. <sup>16</sup> Wuludéqueze bénneache le'e lu na' benne' dxeledábague' le'e. Caní xelúnqueze xra xrnale, ne bi bíchele, ne xrtia ljuwézrele, ne bi ljuwézrele ca'. Welútequeze' bál-lale le'e, <sup>17</sup> na' xúgute' bénneache welecuídené' le'e lawe' da nácale neda' tuze, <sup>18</sup> san quebe nite tu xicha xíchajle lau Dios. <sup>19</sup> Che sua cháchale, na' gápale xel-la nabán.

<sup>20</sup> 'Gate lé'ele zaj naxechaj benne' dxjaque' wedil-la xezre Jerusalén, na' nézele ba za cuía xi' xezre nigá. <sup>21</sup> Lu zra na', benne' zaj zre'e xezre ca' zaj nababa Judea dxal-la' xuluzrúnnuje' chjaque' lu xi'a ca', na' benne' zaj zre'e xezre Jerusalén dxal-la' xeledxúaje' na', na' benne' zaj zre'e le'e xixre' quebe dxal-la' xelexezrine' xezre na'. <sup>22</sup> Lu zra ca' Dios gudé' benne' ca' lu da zi' da xa', na' gaca li ca naca da naxúaj na lu xiche chee Dios ca dxal-la' gaca chee benne' ca'. <sup>23</sup> Edxugúa nu'ula zaj zue' zi'i lu zra ca', ne nu'ula ca' zaj nuxre' bidu dxelázrebe', lawe' da gáta'le'e da xelezaca bénneache ca', na' gaca tu da ba xa' zrente' chee benne' ca'. <sup>24</sup> Bal-le' xelatie' lu wedil-la na', na' xebal-le' xeleché'e le' zaj nadxéaje' tu tu xezr la xu ca', na' benne' zitu' ca' xululéaje' xezre Jerusalén cadxa cheajsé chee zra xelenná bea benne' zitu' ca'.

*Ca gaca gate xelá' Benne' Gulje' Bénneache  
(Mt. 24.29-35, 42-44; Mr. 13.24-37)*

<sup>25</sup> Na' gunná Jesús:

—Lu zra na' xelata' da xululé'e na lau gubizra, ne lau beu', ne lau belaj ca', na' lu xezr la xu

xelezúa stebe benne' ca', ne xelezrebe' ca naca schaga' da gun nísadau', ne xeajxruza chee na. <sup>26</sup> Benne' ca' xelate ni'a ne'e ne chee xel-la dx-elezrebe gate xulusá lazre' ca da dxal-la' gaca lu xezr la xu, ne ca naca da zaj zra' zran xabáa, da zaj napa xel-la waca xelezrízequeze na. <sup>27</sup> Lu zra na' xelelé'equezne' neda', Benne' Gulje' Bénneache, xelá'a tu lu beuj, nen duté xel-la waca zren, ne da xabáa chia'. <sup>28</sup> Gate su lau gaca da caní, le gun dipa lázrele, ne le chisa xíchajle, lawe' da ba za zrin zra lale lu da dxaca chee.

<sup>29</sup> Nadxa bchalaj Jesús tu da dxulé'e na, gunné':

—Le nna'xque xaga higo, u bíteteze xaga. <sup>30</sup> Gate lé'ele ba dxezría na laga' dxe'ene, nézquezle le'e ba za xaca beu' la. <sup>31</sup> Cá'anqueze, gate lé'ele gaca da caní, dxal-la' nézele ba zua gagu zra nna bea Dios.

<sup>32</sup> 'Da li dxapa' le'e, xúgute da caní xelaca na nédxudxa gate quebe ne xelate bénneache zaj zra' lu zra na'a zra. <sup>33</sup> Xabáa, ne xezr la xu weledé chee na, san dizra' chia' quebe te chee na.

<sup>34</sup> Le guxúe xanne' cuínale, quebe güele lataj xelú'u lu xichaj lázrdaule da calela ca' ca naca xel-la dxagu xrata, ne xel-la dxezuzre, ne xel-la dxezá lazre' da naca chee xezr la xu nigá, chee quebe gácale ca tu benne' nachúl-lene' lu xichaj lázrdawe' gate zrin zra na', <sup>35</sup> ne chee quebe gaca na ca tu da quele na le'e, lawe' da caní gaca chee xúgute benne' zaj zre'e lu xezr la xu nigá. <sup>36</sup> Le sua le'e ban lazre', ne le naba lau Dios chee gaca lale lu da dxal-la' gaca lu xezr la xu nigá, ne chee gaca gulé'e cuínale du lázrele lawa' neda', Benne' Gulje' Bénneache.

<sup>37</sup> Jesús bsédene' benne' ca' lu xudau' te zra, na' chizrela dxexíaje' lu Xi'a Xaga Olivo. <sup>38</sup> Xúgute' benne' ca' belezrine' lu xudau' na' xugu' zila chee xelenne' chee Jesús.

## 22

*Dxelune' tuze dizra' xelege' Jesús*

*(Mt. 26.1-5, 14-16; Mr. 14.1-2, 10-11; Jn. 11.45-53)*

<sup>1</sup> Ba zua gagu laní gate dxelawe' xeta xtila da quebe nachixre cua zichaj chee xeta xtila, da naca na Laní Pascua gate dxulusá lazre' ca da ben Dios gate bebéaje' benneache chee' lu xezr la xu Egipto.

<sup>2</sup> Lu zra ca' benne' xíchaje' ca' chee bxruze ca', ne benne' ca' dxuluxuzájle' da nadxixruj bea na belílaje' ájala xelune' xelútie' Jesús bagácheze, lawe' da dxelezrebe' da xelún benne' zan ca'.

<sup>3</sup> Nadxa guxú'u Satanás da xriwe' lu lázrdau Judas, bennea' cá'anqueze le' Iscariote. Naque' tu benne' chazrinnu gubáz ca' chee Jesús. <sup>4</sup> Judas nigá guxíaje' xeajchálajlene' benne' xíchaje' ca' chee bxruze ca', ne benne' blau ca' chee xudau', na' bchálajlene' benne' ca' ájala gune' gudée' Jesús lu na' benne' ca'. <sup>5</sup> Benne' caní gulebene', na' gulechebe lazre' xulunézruje' le' dumí. <sup>6</sup> Judas na' guzú' lu ne'e dumí na', na' guzú' lawe' dxílaje' ájala gune' gudée' Jesús lu na' benne' ca' gate quebe nu chilá' benne'.

*Da dxágudxu chee cheajsá lazrdxu ca gute Xránadxu*

*(Mt. 26.17-29; Mr. 14.12-25; Jn. 13.21-30; 1 Co. 11.23-26)*

<sup>7</sup> Bzrin zra laní gate dxelawe' xeta xtila da quebe nachixre cua zichaj chee xeta xtila, gate dxal-la' xelútiē' zríla'dau' ca' chee Laní Pascua. <sup>8</sup> Na' Jesús gusel-le' Pedro ne Juan, na' guzre'-be':

—Le chjaca, ne le gucuéza da gágudxu chee Laní Pascua.

<sup>9</sup> Benne' caní buluchebe' Le':

—¿Ga dxaca lazru' gucuézentu' na?

<sup>10</sup> Na' bechebe Jesusen':

—Gate chu'ule lu xezre, na' xezrágale tu benne' biu zenu'e tu dx'e nisa. Le chjácálenē' xu'u naga xezrine', <sup>11</sup> na' le xē xrane xu'u na': “Benne' Wesedē dxē'e lue': ¿Ga zua xu'u naga gágulēna' benne' ca' dxusédea' zríla'dau' chee Laní Pascua?” <sup>12</sup> Nadxa gul'éne' le'e tu xu'u zren da zua chupa cuia sibe, da bache nucá'ana chawe'. Le gucuéza da gágudxu na'.

<sup>13</sup> Benne' ca' xjaque', na' belezrélenē' xúgutē ca da ba guzre Jesús le', na' bulucueze' da xelawe' chee Laní Pascua.

<sup>14</sup> Gate bzrin zra, Jesús ne benne' ca' dxusédene' gulezré'e ga xelawe' na. <sup>15</sup> Nadxa gunná Jesús, dxē'e benne' ca':

—Guzá lázrele'a gágulēna' le'e chee Laní Pascua nigá nédxudxa ca quebe ne gatia'. <sup>16</sup> Dxapa' le'e québedxa gawa' da nigá cadxa gaca li na naga dxenná bea Dios.

<sup>17</sup> Nadxa guqué'e tu zruágadau', na' guzre' Dios: “Xcalenu”, na' gunné':

—Le xi'aj late' weaj tu tule le'e. <sup>18</sup> Dxapa' le'e québedxa xí'aja' chee nisa uva caní cadxa xida xel-la dxenná bea chee Dios.

19 Nadxa guqu<sub>e</sub>'e xeta xtila, ne guzre' Dios: "Xcalenu", na' bzúzruje' na, ne bnézruje' na benne' ca', dxenné':

—Da nigá naca na bel-la' dxen chia', da guzúa' waláz chee<sub>e</sub>. Le gun da nigá chee cheajsá lázrele chia' neda'.

20 Cá'anqueze bene' nen zruágadau' na' ca gude' gulawe' xrche', na' gunné':

—Zruágadau' nigá zéaje na xel-la wezría cube, da guzúa chúchua' nen dxen chia', da guláaja' waláz chee<sub>e</sub>.

21 Na'a, zrua na' benne' biu na' tu zren nen na'a ga zua da dxágadxu, bénnea' gude' neda' lu na' benne' dxeledábague' neda'. 22 Neda', Benne' Gulje' Bénneache, waxá'a lu neza da ble'e Dios neda' naga gatia', san edxugúa bénnea' gude' neda' chee gatia'.

23 Nadxa benne' ca' dxusede Jesús gulezú lawe' dxuluchebe ljwezre' nu na' gude' Jesús.

*Dxuluchebe ljwezre' nule' gácadxe' blau*

24 Cá'anqueze buluchebe ljwezre' nule' gácadxe' benne' blau. 25 Na' Jesús guzre' le':

—Benne' wenná bea chee xezr la xu ca' dxelenná bé'ene' bénneache ca xrané bénneache ca', na' benne' xíchaje chee benne' ca' dxelenné' zaj naque' benne' dxelune' da chawe' chee benneáche ca'.

26 Le'e quebe dxal-la' gunle ca'. Benne' nácadxe' blau ládujla le'e dxal-la' gaque' ca benne' nácadxe' cuide', na' benne' dxenná be'e dxal-la' gaque' ca benne' nada'u chee ljwezre' ca'. 27 ¿Nu nácadxa blau, benne' dxe'e dxawe', che benne' dxudé' xel-la wagu? ¿Quebe naca bénnea' dxe'e dxawe'? Neda' zúalena' le'e ca tu benne' dxune' zrin chee<sub>e</sub>.



28 'Le'e guzúalequezele neda' gate neda' guzí guzaca'. 29 Chee le na' dxunna' le'e lataj nna beale, ca ben Xra', benne' na neda', 30 chee xi'aj gágule ga naca chia' naga nna be'a neda', na' cue'le lataj blau ca' chee guchí'ale chee chazrinnu cue' xrtia Israel.

*Jesús dxenné' Pedro nne' quebe núnbe'e Le'*  
(Mt. 26.31-35; Mr. 14.27-31; Jn. 13.36-38)

31 Na' gunnáqueze Xránadxu:

—Simón, Simón, Satanás, da xriwe' ba gunaba na le'e chee seque gudé na le'e lu dul-la ca dxun tu benne' dxudxixre dxutul-le' xizre za. 32 Neda' guta' xueda' Xra' gácalene' lue' chee quebe guníteu' xel-la dxeajlí lazre chiu'. Na' lue', gate bache bexacu' dipa lazre', gúcale le sa' ljwezru' ca' chee xelezé chache'.

33 Na' gunná Simón, guzre' Jesús:

—Xran, ba zúaqueza' sá'lena' Lue' lizre xia, ne chee gátequeza' nen Lue'.

34 Jesús guzre' le':

—Pedro, dxapa' lue', ná'atela ne dédxela cuezre xjeaj, lue' wannáu' chunna lasa quebe núnbe'u neda'.

*Ba zua gagu zra si saca Jesús*

35 Nadxa Jesús bchebe' benne' ca':

—Gate gusel-la' le'e quebe bíale xixruj, ne naga cu'ule dumí, ne zréla, ¿bxáxrjele bi da guchínne?

Benne' ca' belexechebe':

—Gutu bi de.

36 Nadxa guzre' benne' ca':

—Na'a, benne' nape' xixruj dxal-la' gu'e na, ne naga dxugu'e dumí. Bénnea' quebe nape' xia da dxuluchínene' lu wedil-la, dxal-la' xexuti'e xicha

chee', na' si'e xia chee'. <sup>37</sup> Dxapa' le'e dxal-la' gaca chia' néda'queza' ca da naxúaj na lu xiche chee Dios, dxenné': "Gubabe' ca tu benne' wen da zrinnaj." Xúgute da naxúaj na chia' dxal-la' gaca li na.

<sup>38</sup> Nadxa benne' ca' gulenné':

—Xran, nigá de chupa xia.

Le' bechebe':

—Da naze.

*Jesús dxuchálajlene' Dios naga nazi le na Getsemani*

(Mt. 26.36-46; Mr. 14.32-42)

<sup>39</sup> Nadxa bedxúaj Jesús xu'u na', na' ca dxúnqueze', guxíaje' lu Xi'a Xaga Olivo, na' benne' ca' dxusédené' xjácalene' Le'. <sup>40</sup> Gate belezrine' na', Jesús guzre' le':

—Le naba lau Dios chee quebe seque da xriwe' cu'u na le'e lu dul-la.

<sup>41</sup> Nadxa Jesús guzé'e ca tu legu'una xiaj naga zaj zra' benne' ca', na' bzu zribe' bchálajlene' Dios.

<sup>42</sup> Gunne':

—Xrae, che dxaca lazru', bcuasa neda' ca naca da dxal-la' saca', da naca na ca tu da sla' da dxal-la' xí'aja', quegá gaca na ca dxaca lazra' neda', san ca dxaca lazru' Lue'.

<sup>43</sup> Nadxa ble'e lau naga zua Jesús tu gubáz chee xabáa, na' btipe' lazre' Jesús. <sup>44</sup> Gate ne dxezácale'e, du lazre' bchálajlene' Dios, na' xesa chee' guca na ca dxen dxeleZRún na lu xu.

<sup>45</sup> Ca bexuzre bchálajlene' Dios, na' bexase', na' bezrine' naga zaj zra' benne' ca' dxusédené', na' blé'ene' dxelase benne' ca', lu xel-la dxelexewi'ine lazre' chee'. <sup>46</sup> Nadxa guzre' benne' ca':

—¿Dxáselale le'e na'a? Le chasa, ne le naba lau Dios chee quebe seque da xriwe' cu'u na le'e lu dulla.

*Dxelele' Jesús*

(Mt. 26.47-56; Mr. 14.43-50; Jn. 18.2-11)

<sup>47</sup> Ne dxuchálajte Jesús gate beelé' benne' zanca'. Bénnea' le' Judas, tu benne' chazrinu ca', ze'e zria lawe' lau benne' ca', na' gubigue' cuita Jesús chee gunupe' Le'. <sup>48</sup> Nadxa Jesús guzre' le':

—Judas, ¿dxunupu' neda', Benne' Gulje' Bénneache, chee gudéu' neda' lu na' benne' dxeledábage' neda'?

<sup>49</sup> Benne' ca' zrálene' Jesús, ca beelé'ene' ca da dxaca, na' buluchebe' Jesús:

—Xran, ¿guchímentu' xia?

<sup>50</sup> Tu benne' ca' dxedále Jesús bene' zi' tu bi wən zrin chee bxruze blau, guchugue' nágabe' zua xabela. <sup>51</sup> Jesús gunné':

—Québedxa gunle ca'. Cá'anze.

Nadxa Jesús bte' naga bi wən zrin na', na' bexune' na.

<sup>52</sup> Na' guzre' benne' xíchaje ca' chee bxruze, ne benne' blau ca' chee xudau', ne benne' gula sina ca', benne' zá'aque' xeleché'e Jesús, gunné':

—¿Blale le'e nen xia, ne xaga chee quélale neda' ca dxélale tu gubán? <sup>53</sup> Gate guzúa' neda' lu xudau' nen le'e tu zra tu zra, quebe bi benle le'e chia', san zra nigá naca na zra chee, gate dxenná bea da zua na lataj chul-la.

*Pedro dxenné' quebe núnbe'e Jesús*

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

<sup>54</sup> Nadxa gulēle' Jesús, na' guleché'e Le' lizre bxruze blau, na' Pedro zíajē' nawē' Le' zítu'la. <sup>55</sup> Na' gulebé'e guléchajē' xi' na', na' Pedro gudxé'e ládujla benne' ca'. <sup>56</sup> Nadxa tu nu'ula wēn zrin, gate blé'enē' Pedro dxē'e dxu'a xi' na', guzúē' dxenné'e le', na' gunné':

—Cá'anqueze benne' nigá guque' tuze len Jesús.

<sup>57</sup> Pedro gunné':

—Nu'ula, quebe núnbe'a bénnea'.

<sup>58</sup> Xetú chí'idau' guca, na' ble'e xetú benne' xula Pedro na', na' gunné':

—Cá'anqueze lue' nacu' tu zren benne' ca'.

Pedro gunné':

—Cabí. Quebe naca ca'.

<sup>59</sup> Xelate gudé na', xetú benne' ben chúchue' xrtizre', gunné':

—Da li, benne' nigá guque' tuze len Jesús, lawe' da naque' benne' Galilea.

<sup>60</sup> Nadxa gunná Pedro:

—Benne', quebe nezda' nu chee na' dxuchálaju'.

Dxácatē na' ne dxuchálajtē Pedro ca', na' gudxezre xjeaj. <sup>61</sup> Nadxa Xránadxu bzechaj xíchajē', gunné'e Pedro, na' Pedro xeajsá lazre' ca da guzre Xránadxu le', gunné': “Ná'atēla ne dédxela cuezre xjeaj, lue' wannáu' chunna lasa quebe núnbe'u neda'.” <sup>62</sup> Nadxa bedxúaj Pedro, na' gudxezre xáche'le'e.

*Dxelún le' chee Jesús*

*(Mt. 26.67-68; Mr. 14.65)*

<sup>63</sup> Na' benne' ca' zaj nuxre' Jesús belún le' chee', na' buluzaljē' Le'. <sup>64</sup> Bulucache' lawē', na' belegape' xrague', dxelé'e Le':

—Gunné xa'a nu be Lue'.

<sup>65</sup> Da zan da gulenné', dxeleonné' schanni' chee Jesús.

*Jesús dxezrine' lau benne' ca' chee xu'u lawe' blau chee judío ca'*

*(Mt. 26.59-66; Mr. 14.55-64; Jn. 18.19-24)*

<sup>66</sup> Gate naca te zra, na' belezraga benne' gula sina ca' chee judío ca', ne benne' xíchaję ca' chee bxruze ca', ne benne' ca' dxuluxuzájle'ę da nadxixruj bea na, na' guleché'ę Jesús lau benne' ca' chee xu'u lawe' blau chee judío ca'. Na' buluchębe' Le':

<sup>67</sup> —Gunná, ¿nacu' lue' Cristo?

Na' bechębe Jesús:

—Che xapa' le'e: Awe', quebe chéajle, <sup>68</sup> na' che bi guchęba' le'e, quebe xechębele chia', ne quebe gusanle neda'. <sup>69</sup> Ná'atela neda', Benne' Gulję' Bénneache, cue'a chalá'a xabęla chee Dios nape' dute xel-la waca.

<sup>70</sup> Nadxa xúgute' buluchębe' Le':

—¿Nacu' Lue' Zri'ine Dios?

Jesús bechębe':

—Naca', ca dxennáquezle le'e.

<sup>71</sup> Nadxa gulenná benne' ca':

—¿Núzradxa chínnedxu bi nne' chee benne' nigá? Dxi'úqueze ba bédexu ca da gunnáqueze'.

## 23

*Jesús dxezrine' lau Pilato*

*(Mt. 27.1-2, 11-14; Mr. 15.1-5; Jn. 18.28-38)*

<sup>1</sup> Nadxa gulasa xúgute' benne' dxuluchi'e, na' guleché'ę Jesús lau Pilato, benne' dxenná be'e

waláz chee Roma. <sup>2</sup> Na' gulezú lawe' dxelagu zrie' Jesús, dxelenné':

—Ble'entu' benne' nigá dxegú'u xel-le' bèneache chee xeledábague' xu'u lawe'. Dxenné' quebe dxalla' quízrujntu' da dxuchizruj César, benne' Roma, na' cá'anqueze dxenné' naque' Cristo, Benne' Wenná Bea.

<sup>3</sup> Nadxa Pilato bchebe' Jesús:

—¿Nacu' Lue' Wenná Bea chee judío ca'?

Na' bechebe Jesús:

—Ca' naca na, ca ba gunnáu' lue'.

<sup>4</sup> Nadxa gunná Pilato, guzre' benne' xíchaje ca' chee bxruze ca', ne bèneache ca':

—Quebe bi da zrinnaj dxezrelda' nun benne' nigá.

<sup>5</sup> Benne' ca' belún chúchue' dizra' chee', gulenné':

—Dxegu'u xel-le' xúgute benne' zaj zre'e xezre ca' zaj nababa Judea chee xeledábague' xu'u lawe'. Guzú lawe' dxune' na naga nababa Galilea, na' na'a dxune' na nigá.

### *Jesús dxezrine' lau Herodes*

<sup>6</sup> Gate ben Pilato da nigá, na' bchebe' che naca Jesús benne' Galilea. <sup>7</sup> Gate gulé'e le' naca Jesús benne' Galilea, na' Pilato gusél-le' Le' lau Herodes, benne' dxenná be'e xezre ca' zaj nababa Galilea, na' lu zra na' zue' Jerusalén. <sup>8</sup> Gate ble'e Herodes Jesús, gubéle'ene', lawe' da bátate dxaca lazre' lé'ene' Le', lawe' da ba benne' dxuluchalaj bèneache chee Jesús, na' guca lazre' lé'ene' gun Jesús tu xel-la waca da za xabáa. <sup>9</sup> Da zanté da bchebe' Jesús, na' Le' quebe bi bechebe'. <sup>10</sup> Zráqueze benne' xíchaje ca' chee bxruze ca' na',

nen benne' ca' dxuluxuzájle'e da nadxixruj bea na, na' belún chúchue' dizra' chee' da dxelagu zria Jesús. <sup>11</sup> Nadxa Herodes, ne benne' chee' ca' dxjaque' wedil-la buluzúe' Le' chalá'ala, na' chee' xelún le' chee', bulugácue' Le' ladxe' bzawe ca naca zra tu benne' wenná bea. Nadxa Herodes besel-le' Le' lau Pilato. <sup>12</sup> Lu zra na' Pilato, ne Herodes belexaque' tuze, lawe' da belezrá'a ljwezre' nédxute.

*Dxelechugue' chee Jesús gatie'*

*(Mt. 27.15-26; Mr. 15.6-15; Jn. 18.39—19.16)*

<sup>13</sup> Nadxa Pilato bchague' benne' xíchaje ca' chee' bxruze ca', ne benne' xu'u lawe' ca', <sup>14</sup> na' guzre' benne' ca':

—Le'e guchele benne' nigá za'le naga zua', dxennale dxegú'u xel-le' bèneache chee' xeledábage' xu'u lawe'. Neda' ba bcheba' Le' laule le'e, na' quebe bi da zrinnaj dxezréleda' nune' ca naca da dxennale chee'. <sup>15</sup> Cá'anqueze Herodes quebe bi da zrinnaj bzrélene' da nun Jesús, na' budée' Le' launtu'. Quebe bi ne gune' chee' chuga' chee' gatie'.

<sup>16</sup> Gudéa' Le' xel-la zi', na' gusánqueza' Le'.

<sup>17</sup> Dxácatę dxaca laní na', Pilato dxal-la' gune' tu da dxelezaca ba lazre' bèneache, gusane' tu benne' xu'e lizre xia. <sup>18</sup> Xúgute' benne' ca' gulezú lawe' dxelebezre xe'e, dxelenné':

—¡Gate benne' nigá! ¡Bsan Barrabás na'!

<sup>19</sup> Barrabás nigá gulegú'e le' lizre xia lawe' da gudábage' xu'u lawe', na' betie' tu benne'. <sup>20</sup> Pilato guca lazre' gusane' Jesús, na' bchálajlene' benne' ca' xetú. <sup>21</sup> Na' benne' ca' gulebezre xe'e zízrajdxá, dxelenné':

—¡Bde'e xaga béguaj! ¡Bde'e xaga béguaj!

22 Da guxunne' lasa gunná Pilato:

—¿Bizra da zrinnaj nune'? Quebe bi dxezréleda' da gudé na Le' gatié'. Gudéa' Le' xel-la zi', na' te na' gusana' Le'.

23 Na' benne' ca' belún chúchue' dizra' chee' chee' te'e xaga béguaj, ne gulebezre xá'atié', nen benne' xíchajé ca' chee' bxruze ca', cadxa guca ca da gulaca lazre'. 24 Nadxa Pilato guchugue' chee' Jesús gaca chee' ca da dxelaca lazre' benne' ca'. 25 Na' bsane' bēneea' belenabe', xu'e lizre xia lawe' da gudábague' xu'u lawe', ne betié' tu benne', na' bdee' Jesús chee' gaca chee' ca dxelaca lazre' benne' ca'.

*Dxuludé'e Jesús xaga béguaj*

*(Mt. 27.32-44; Mr. 15.21-32; Jn. 19.17-27)*

26 Gate zjaque' zaj naché'e Jesús chee' xuludé'e Le' xaga béguaj, na' gulele' tu benne' Cirene, le' Simón, zezé'e le'e xixre', na' bulugu'e le' xaga béguaj chee' Jesús, na' zéajé' cuzru Jesús na'.

27 Na' xjácale Le' benne' zante, ne nu'ula zan dxelebezre', na' dxelebezre xache' ne chee' da dxaca chee' Jesús. 28 Nadxa Jesús gunné'e nu'ula ca', na' guzre' le':

—Le'e, nu'ula Jerusalén, quebe cuézrele chia' neda'. Le cuezre cheéquezle, ne chee' zrí'inele, 29 lawe' da zrin zra gate xelenné': “Ba neza zren naca na chee' nu'ula wizre, ne nu'ula ca' cabata' gulezúe' zi'i, ne nu'ula ca' cabata' bulugazre' bidau'.” 30 Lu zra na' xelezú lau bēneache xelé'e xi'a ca': “Le gugacu netu' xu.” Na' xelé'e xí'adu ca': “Le gugache netu'.” 31 Che dxelune' da caní chia' neda', naca' ca tu xaga ban, ¿gágradxa xelune' chee'le le'e, nácale ca xaga bizre ca'?



<sup>32</sup> Cá'anqueze guleché'e chupa benne' wen da zrinnaj chee xelúti'e le' tu zren nen Jesús. <sup>33</sup> Gate belezrine' lataj na' nazíle na, Calavera, da zéaje na, Xi'a Zrita Xíchajdxu, na' buludé'e Jesús xaga béguaj, ne cá'anqueze beluné' chee benne' wen da zrinnaj ca', tué' cuite' xabelá, ne xetúe' cuite' xéglala. <sup>34</sup> Ca dxuludé'e Le' xaga béguaj, na' gunná Jesús:

—Xrae, bnite lau chee benne' caní lawe' da quebe zaj nézene' bi na' dxelune'.

Na' benne' dxjaque' wedil-la gulebeje' da dx-unna bea' chee xelezí'e late' weaj zra lana Jesús. <sup>35</sup> Benne' ca' zaj zre'e na' dxelenné'e, ne benne' xu'u lawe' ca' belún le' chee', dxelenné':

—Bselé' benne' xula ca'. Na'a dxal-la' guselá cuine' che da li naque' Cristo, Bénnea' Gucá'a Dios.

<sup>36</sup> Cá'anqueze benne' dxjaque' wedil-la belún le' chee', na' gulebigue' cuita Jesús, ne buluxí'aje' Le' nupe zichaj. <sup>37</sup> Gulé'e Le':

—Che lue' nacu' Wenná Bea chee judío ca', bselá cuinu'.

<sup>38</sup> Zua xichaj Jesús tu da naxúaj nen dizra' griego, ne dizra' latín, ne dizra' hebreo, da dxenná na:

—Wenná Bea chee judío ca'.

<sup>39</sup> Tu benne' wen da zrinnaj, bénnea' de'e xaga béguaj ben le' chee Jesús, dxenné':

—Che Lue' nacu' Cristo, bselá cuinu', ne bselate netu'.

<sup>40</sup> Na' xetú benne' wen da zrinnaj na' gudil-le' ljwezre'. Guzre' le':

—¿Quebe dxezrebu' Dios? Lue' dxezácaquezu' ca da gulechugue' chee' Le'. <sup>41</sup> Dxi'u dxezácadxu ca da dxál-la'queze sácadxu, lawe' da dxaca cheedxu da

dxal-la' sidxu ca naca da zrinnaj da nundxu, san benne' nigá quebe bi da zrinnaj nune'.

<sup>42</sup> Nadxa gunné':

—Jesús, xeajsá lazre' neda' gate su lau' nna be'u.

<sup>43</sup> Na' bechebe Jesús:

—Da li dxapa' lue', ná'atēla súalequezu' neda' lu lataj chawe' chee Dios.

*Ca guca gate gute Jesús*

(Mt. 27.45-56; Mr. 15.33-41; Jn. 19.28-30)

<sup>44</sup> Guca ca wagubizra. Nadxa ca naca lu xezr la xu guchul-la na cadxa bzrinte na dxedá' chunna.

<sup>45</sup> Gubizra guchul-la na, na' ladxe' ze lu xudau' bdxuaj na chúpala. <sup>46</sup> Nadxa gudxezre xa'a Jesús, dxenné':

—Xrae, lu na'u dxegu'a be' xu'a.

Ca gunné' ca', na' gutie'.

<sup>47</sup> Gate benne' dxenná bé'ene' benne' dxjaque' wedil-la blé'ene' ca da guca, na' be lá'ane' Dios, gunné':

—Da li, benne' nigá quebe bi da zrinnaj bene'.

<sup>48</sup> Xúgute benne' ca' zaj zre'e na', gate belelé'ene' ca da guca, na' besiá'que' na', dxelu'e lachu'e.

<sup>49</sup> Xúgute benne' ca' zaj núnbe'e Jesús, ne nu'ula ca' xjácane' Jesús gate bezé'e Galilea, belexegá'ane' zítu'la dxelenné'e da caní.

*Dxulucache' Jesús*

(Mt. 27.57-61; Mr. 15.42-47; Jn. 19.38-42)

<sup>50</sup> Zua tu benne' chawe' ne xrlátaje le' José, benne' xezre Arimatea chee xezre ca' zaj nababa Judea. Nababe' xu'u lawe' blau chee judío ca'.

<sup>51</sup> José nigá dxebeze' zra nna bea Dios, na' quebe bene' tuze ca da belún benne' xu'u lawe' blau ca'.

<sup>52</sup> Benne' nigá guxíaję' xeajchálajlęne' Pilato, na' gunabe' latja gucache' Jesús. <sup>53</sup> Ca bexuzre buluxulétaję' Le' xaga béguaj, na' buluxuchele' Le' tu ladxe', na' gulu'e Le' tu lu xędxu ba, da ba gudęne' tu le'e xi'a xiaj, naga quebe nu ne gáchequeze. <sup>54</sup> Naca na zra dxulucueze' cheę zra dxulupá'ane', da ba zua su lau na.

<sup>55</sup> Nu'ula ca' xjácalęne' Jesús gate bezé'e xęzre ca' zaj nababa Galilea, xjaque' na', ne belelé'ene' ba na', ne belené'e ájala zaj nagu'e Le' xędxu ba.

<sup>56</sup> Gate belexezrine' xu'u naga zaj zre'e, na' bulucueze' da du ca' dxelelále'e zixre, ne da zaj naca na ca za dxelelále'e na zixre. Belexezi' lazre' zra dxulupá'ane' cáteze naca da gunná bea Dios.

## 24

### *Ca guca gate bebán Jesús*

*(Mt. 28.1-10; Mr. 16.1-8; Jn. 20.1-10)*

<sup>1</sup> Zra nedxu cheę da gazre zra, nu'ula ca' belezrine' dxu'a ba na' dxani'sise', zaj nu'e ca naca da ca' dxelelá zixre da bulucueze', na' xeballa nu'ula xjácalęne' le'. <sup>2</sup> Gate belezrine' na', belelé'ene' xiaj da guduse dxu'a ba na', québedxa naduse na naga guduse na. <sup>3</sup> Belú'e lu ba na', san quebe belexezrelne' Xránadxu Jesús na'. <sup>4</sup> Na' belezrébele'e, ne quebe zaj nézene' ájala xelune', na' belelé'ene' chupa benne' zaj ze' cuitę', zaj nacue' zra lane' dxácatite na. <sup>5</sup> Nu'ula ca' belezúe' sudxú'ala lu xu, ne belezrébele'e. Na' benne' cá gulę'e le':

—¿Bizr cheę na' dxexílajle le'e tu benne' naca banę' lówela benne' gate? <sup>6</sup> Quebe zue' nigá, lawe' da ba bebanę'. Le gusá lázre' da bchálajlęne' le'e

gate ne zué' Galilea. <sup>7</sup> Gunné': "Benne' Gulje' Bénneache dxal-la' xuludé'e Le' lu na' benne' dul-la ca', na' xuludé'e Le' xaga béguaj, na' zra guxunne' zra xebane'."

<sup>8</sup> Nadxa nu'ula ca' xeajlesá lazre' ca naca da gunná Jesús. <sup>9</sup> Ca gudé besia'que' dxu'a ba na', na' belexezrine' lu xezre na', na' buluchálajlene' benne' chinéaj gubáz ca' chee Jesús, ne xúgute benne' ca' xezica, ca naca da guca na'. <sup>10</sup> Nu'ula ca' xjaque' xeajlezenne' gubáz ca', zaj naque' María Magdalena, ne Juana, ne María xrna Jacobo, ne xebal-la nu'ula ca'. <sup>11</sup> Benne' gubáz ca' guléquene' da xálaze dxelenná nu'ula caní, na' quebe guléajle'e chee'.

<sup>12</sup> Nadxa bdxuaj Pedro, zeaj chégüe' dxu'a ba na', na' gate guné'e lu ba na', blé'ene' ladxe' da bedxela Jesús xu'u na chalá'ala, na' bezé'e zexíaje' xu'u naga guzé'e, dxexebáne'e ca naca da guca.

*Da guca lu neza da zeaj xezre Emaús  
(Mr. 16.12-13)*

<sup>13</sup> Lu zra ná'queze, zjaca chupa benne' ca' busede Jesús xezre Emaús, da naca na láte'ze zitu' naga zua Jerusalén. <sup>14</sup> Zjaque' dxuluchálaje' ca naca da guca lu zra ca'. <sup>15</sup> Dxácate na' dxuluchálaje' caní, na' Jesús ná'queze gubigue' cuita benne' ca', na' guzú lawe' zéajlene' le'. <sup>16</sup> Quebe belexúnbe'e Jesús, lawe' da guzúa tu da guxúa na xiaj lau benne' ca'. <sup>17</sup> Nadxa bchebe Jesús benne' ca':

—¿Bizra da na' dxuchálajle ljawézrele dxácate xu'ule neza? ¿Bizra chee na' zale dxewí'ine lázrele?

<sup>18</sup> Tu benne' ca' le' Cleofas bechebe':

—Xúgute benne' zaj nézene' ca da guca xezre Jerusalén lu zra caní. ¿Nacu' lue' benne' zitu' zu' Jerusalén, na' tuze lue' quebe nézenu' ca da guca na'?

<sup>19</sup> Nadxa Le' guzre' benne' ca':

—¿Bizra guca na'?

Gulé'e Le':

—Da guca chee Jesús, benne' Nazaret. Guque' tu benne' bchálaje' waláz chee Dios, na' xel-la waca zren ca' bene', ne bchálaje' dizra' lau Dios, ne lau xúgute bénneache. <sup>20</sup> Na' benne' xíchaje' ca' chee bxruze ca', ne benne' xu'u lawe' cheentu' ca' buludé'e Le' chee gulechugue' chee' gatie', na' buludé'e Le' xaga béguaj. <sup>21</sup> Netu' guleza lázrentu' Le' naque' Benne' dxal-la' guselé' xezr la xu Israel. Na'a, ba zeaj chunna zra guca da ca'. <sup>22</sup> Bal-la nu'ula ca' ládujla netu' buluzúaqueze' netu' lu da stebe, lawe' da xjaque' dxaní'sise' dxu'a ba chee' na', <sup>23</sup> na' gate quebe belexezrelne' Le', na' belex-elé'e naga zúantu', ne gulenné' belelé'ene' chupa gubáz chee xabáa ca' bululé'e lawe' nu'ula ca', na' gulé'e le' nabán Jesús. <sup>24</sup> Nadxa bal-la benne' ljwézrentu' ca' xjaque' dxu'a ba na', na' belelé'ene' cáteze na' gulenná nu'ula ca', san quebe belelé'ene' Jesús.

<sup>25</sup> Nadxa gunná Jesús:

—Le'e quebe dxéajni'ile, na' ne naca zide' lázrdaule chee quebe chéajlele xúgute da gulenná benne' ca' buluchálaje' waláz chee Dios. <sup>26</sup> ¿Quebe dxal-la' saca Cristo da caní nédxudxa ca xegá'ane' szren?

<sup>27</sup> Nadxa guzú lawe' dxuzéajni'ine' benne' ca' ca naca xúgute da naxúaj lu xiche chee Dios naga

dxuchalaj na chee Le'. Guzú lawe' lu xiche ca' chee Moisés, na' ne zéajdxaqueze na lu xiche ca' chee benne' ca' buluchálaje' waláz chee Dios.

<sup>28</sup> Gate belezrine' lu xezre naga zjaque', Jesús bene' ca' benne' zeajteze' xu'e neza. <sup>29</sup> Na' benne' ca' buluxucá'ane' Le' xadía, dxelenné':

—Begá'anale netu', lawe' da ba zeaj dxezré', ne ba dxe' xrínnequeze na'a.

Nadxa Jesús guxú'ulene' benne' ca'. <sup>30</sup> Gate na' dxé'lene' le' dxelawe', guqué'e xeta xtila, ne bzúzruje' na, na' guzre' Dios "Xcalenu", ne bnézruje' na benne' ca'. <sup>31</sup> La' ná'queze becuasa ca naca da guxúa na xiaj lau benne' ca', na' belexúnbe'e Jesús, san la' ná'queze benite Le' lau benne' ca'. <sup>32</sup> Na' gulé ljwezre':

—¿Quebe guxúa xel-la dxebé lu lázrdaudxu gate ze'e dxuchálajlene' dxi'u tu neza, ne bzéajni'ine' dxi'u ca naca da naxúaj lu xiche chee Dios?

<sup>33</sup> Nadxa, ne québedxa gulezrene', belexegu'e neza, zeajxaque' Jerusalén, naga belelé'ene' zaj nazraga benne' chinéaj gubáz ca', ne benne' ljwezre' ca'. <sup>34</sup> Benne' ca' zaj nazrague' na' gulé'e benne' chupa ca':

—Da li bebán Xránadxu, na' Simón ba blé'ene' Le'.

<sup>35</sup> Nadxa benne' chupa ca' buluzenne' le' ca naca da guca la neza, ne ca belexúnbe'e Jesús gate bzúzruje' xeta xtila na'.

*Jesús dxulé'e lawe' benne' ca' xjácálene' Le'  
(Mt. 28.16-20; Mr. 16.14-18; Jn. 20.19-23)*

<sup>36</sup> Ne dxuluchálajte' caní gate ble'e lau Jesús gachaj lawe' benne' ca', na' bgape' le' diuzre, dxenné':

—Xela dxebeza zri lazre' súale na le'e.

<sup>37</sup> Na' benne' ca' belexruse', ne belezrébele'e. Guléquene' dxelelé'ene' bxinne dxela. <sup>38</sup> Na' Jesús guzre' benne' ca':

—¿Bizr chee na' dxezrébele? ¿Bizr chee na' dxaca chupa lázrele? <sup>39</sup> Le na' na'a caní, ne le na' ni'a. Nédá'queza' na'. Le gutá neda', ne le guxúe xque neda'. Tu bxinne dxela quebe napa na bēla' zrita, ca dxel'éle le'e napa' neda'.

<sup>40</sup> Ca dxē'e benne' ca' da nigá, na' blé'ene' le' ne'e, ne ni'e. <sup>41</sup> Benne' ca' québequeze dxeléajlē'e chee' lawe' da dxelebéle'ene', ne dxexebánele'ene', na' guzre Jesús le':

—¿De late' da gawa' nigá?

<sup>42</sup> Nadxa bulunézruje' Le' late' bēla' guzrúa xi', ne late' da zixre che bézudau', <sup>43</sup> na' gucá'a Jesús da ca', ne gudawe' na lau benne' ca'. <sup>44</sup> Nadxa guzre' benne' ca':

—Da ba guca chia' naca na ca da gucha' le'e gate ne zúalequeza' le'e, gunnéa' dxal-la' gaca li ca naca xúgute da naxúaj lu da bdxixruj be'e Moisés, ne lu xiche naga zaj naxúaj salmo ca', ne lu xiche ca' chee benne' ca' buluchálaje' waláz chee Dios.

<sup>45</sup> Nadxa bzéajni'ine' benne' ca' ca da naxúaj lu xiche chee Dios, <sup>46</sup> na' guzre' benne' ca':

—Caní naxúaj na dxal-la' gate Cristo, na' zra guxunne' zra dxal-la' xebane' ládujla benne' gate ca', <sup>47</sup> na' lu La Le' dxal-la' xuluchalaj bēneache lau xúgute xezr la xu ca'. Su lau gunle na lu xezre Jerusalén, xele bēneache dxal-la' xelexebí'i lazre' chee gunite lau Dios dul-la zaj nabaga benne' ca'.

<sup>48</sup> Le'e nácale benne' xelexechebe' da caní. <sup>49</sup> ¡Le nna'xque! Neda' sel-la' cheele ca da guchebe lazre'

Xra'. Le xegá'ana nigá lu xezre Jerusalén, cadxa si'le xel-la waca da za xabáa.

*Jesús dxexegüéne' xabáa*  
(Mr. 16.19-20)

<sup>50</sup> Nadxa Jesús beche'e benne' ca', belexedxúaje' Jerusalén, xejxaque' xezre Betania, na' guchisa na' Jesús, ne gunabe' gaca chawe' chee benne' ca'.  
<sup>51</sup> Ne dxúnte'e ca', na' bezé'e naga zaj zra' benne' ca', begüéne' zexíaje' xabáa. <sup>52</sup> Ca bexuzre belúe lá'ane' Le', besiá'que' zeajxaque' Jerusalén lu dute xel-la dxelebé, <sup>53</sup> na' gulezráqueze' chale'aj xudau' dxelúe lá'ane' Dios. Ca' naca na.



**Xela wezria cube nen salmo ca’  
New Testament and Psalms in Zapotec, Tabaa  
(MX:zat:Zapotec, Tabaa)**

copyright © 1981 Wycliffe Bible Translators, Inc.

Language: Zapotec, Tabaa

Translation by: Wycliffe Bible Translators, Inc.

Zapoteco, Tabaa [zat], Mexico

**Copyright Information**

© 1981, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament and Psalms**

in Zapotec, Tabaa

**© 1981, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

80626b72-93df-58ae-9f5e-9d86733fab46